

南勢一帶山口。勒石分爲番界。如有偷越運貨者。專管之官失察降調。該管上司罰俸一年。又臺地人民不得與番民結親。違者離異治罪。地方官參處。從前已娶者。毋許往來番社。違者治罪。以上三條。皆嚴禁臺民私入番界之舊例也。際此開山伊始。招墾方興。臣等揆度時勢。仰懇天恩。請將一切舊禁。盡與開豁。以廣招徠。俾無顧慮。許之。於是葆楨奏明開山。竝請移駐福建巡撫於臺灣。以海防同知袁聞柝率兵三營分二路。一自鳳山之赤山而至卑南。聞柝當之。計程一百七十五里。一自射藁亦至卑南。總兵張其光當之。凡二百十四里。是爲南路。以總兵吳光亮率兵三營。自彰化之林圯埔而至璞石閣。凡二百六十五里。是爲中路。以提督羅大春率兵十三營。自噶瑪蘭之蘇澳而至奇萊。凡二百零五里。是爲北路。軍過之時。沿途野番雖有狙擊。以阻前進。而或剿或撫。建壘駐兵。以警衛之。一年之間。遂告成功。而東西之途。闢矣。臺東沃野數百里。可建一府三縣。葆楨以爲建城之地。應在奇萊。若新城三層馬隣。鯉浪不過營汎之區。尤必截大清水以南。隸奇萊。以北隸大南澳。方足以資控制。十二月十三日。葆楨率知府周懋琦前署臺灣鎮曾元福至琅璠。駐柴城。查勘地勢。以柴城以南十五里之猴洞。可建縣治。擬名恒春。以其常煥也。巡道夏獻綸稟請南北兩路理番同知。

均應移駐番地。各奏請。部議核准。光緒元年。詔設臺北府。置卑南埔裡社兩廳。以南路同知駐卑南。北路同知爲中路。駐埔裡社。各加撫民。以辦民番交涉之事。設恆春淡水兩縣。改淡水廳爲新竹縣。噶瑪蘭廳爲宜蘭縣。令福建巡撫春冬駐臺。析疆增吏。撫墾並行。而番政一新。當開山之際。募民隨往。與地使耕。至是乃設撫墾委員。分臺東爲三路。以總兵吳光亮辦之。南爲卑南。中爲璞石閣。北爲花蓮港。而恆春別設一局。以知縣兼之。廈門汕頭香港各設招墾局。立章程。任保護。凡應募者與以便宜。日給口糧。人授地一甲。助以牛種農器。三年之後。始徵其租。當是時。閩粵之人多赴南洋。遠至澳洲。謂萬金可立致。故來者較少。恆春知縣黃延昭稟言。臺灣開拓後山。於茲三年。生番漸次受撫。而招墾尙無成效。今大軍分駐後山。需糧較多。米糧價貴。輸運甚難。宜廣募農民。以開荒土。從之。於是招集臺人。假以農器。人月給口糧六兩。墾成之地。三年免租。以爲鼓勵。然臺東土地雖肥。瘴癘尙盛。居者多病沒。故農功猶未大啓也。先是日軍撤退之時。獅頭社番乘虛出。戕殺兵民。元年二月。葆楨奏請進討。以提督唐定奎統淮軍。三路而入。別募鄉勇千餘爲道。隨山刊木。二十日。中軍提督周志本副營提督章高元采入其地。番伏險拒。未能進。二十二日。志本督所部自南勢湖而前。左巖

右溪徑窄不易行。番五百餘突起迎擊。官軍攀緣上。激戰兩時。乃敗之。直搗草山。燬其社。陣斬十數級。副營左哨官游擊束維清死焉。三月十七日。定奎進攻竹坑社。爲獅頭出入之道。以提督張光亮率武毅左軍爲中鋒。左軍游擊陳有元何迪華爲左。右軍副將宋先聘爲右。又以武毅營總兵章高元候補知府田勤生繞竹坑山後。以拊其背。殪番數十。遂破之。進攻龜紋。先聘軍其巔。以絕接濟。兼旬不雨。酷暑如蒸。光亮遂沒。德成高元亦病莫能興。四月十五日。定奎自督各軍。攻內獅頭。連破其卡。龜紋以二百餘人來援。遇伏而潰。斬其番酋之弟。而提督周志本率副將劉朝林以中軍前營進攻外獅頭。提督梁善明爲左。總兵余光德爲右。併進破之。各有斬獲。番窮乞降。定奎許之。示以七約。曰。遵籬髮。編戶口。交兇犯。禁仇殺。立總目。墾番地。設社學。乃以龜紋社酋野艾爲總土目。俾率其衆。改竹坑社爲永平。本武社爲永福。草山社爲永安。內獅外頭社爲內外永化。六月。班師歸。勅建昭忠祠於鳳山。祀將士。是年北路統領羅大春通道奇萊。頻與番戰。至大南澳。番拒阻。輒殺行人。乃別闢一路。旁通新城。以避海濱懸崖。而阻兇。番歧出之途。十一月。命千總馮安國率兵涉溪。番突出擊。衆可千人。官兵力戰。殪其數人。乃退。官兵亦略有死傷。十五日。行至谷中。高山壁立。忽聞銃聲。番大

呼而至。鑿戰兩時。番至愈多。守備黃明厚語國安曰。彼傾衆而來。其中必虛。可取之。遂分一隊搗其社。闐然無人。唯見髑髏滿架。燬之。番見火起。如鳥獸散。千總吳金標亦沿途招撫木瓜大巴壘等二十有九社。番丁一萬七千七百十九人。木瓜最悍。以窮來歸。乃以宣武左右兩軍。分戍東澳大南澳大濁水。得其黎新城加禮宛花蓮港吳全城等。以備不虞。唯中路一隊少遭番害而已。二年。太魯閣番亂。討之。太魯閣爲臺東野番。負其險阻。輒出殺人。大春進兵破其社。番伏山上。下巨石。幸少死傷。乃戍兵於三棧溪畔。曰順安城。爲久住計。番無可歸。介通事乞降。許之。獲兇首三人。戮於臺北。三年。奇密社番殺總通事林東涯以叛。八月。統領吳光亮檄林福喜往討。不克。乃自將合孫開華羅魁林新吉之兵伐之。番降。約以明春各獻米一擔。至期果至。光亮命閉門屠之。濺血聲喧。死者百六十有五人。僅餘五人幸免。自是遂弱。紅頭嶼在恒春海中。距縣東八十里。土番居之。性馴良。牧羊山中。翦耳爲誌。無相爭詐。地沃多椰樹。蒔雜穀。漁畜爲生。周可六十餘里。山高至五六十丈。有社七。錯居四隅。男女不及千人。語言略似西洋。實莫測其所由。前時漢人曾與互市。然未隸版圖。是年知縣周有基率船政學生游學詩汪喬年始至其地。撫之。又有火燒嶼者。橫直二十餘里。與紅頭嶼並峙。距

卑南六十里。居民五百餘人。商船避風。間有至者。四年春正月。商人陳文禮至加禮宛墾田。爲番所殺。營官命贖罪。不從。且殺兵丁。與竹篙宛番謀叛。報至六月。陳得勝率新城之兵討。不利。光亮自將。以張兆連自花蓮港。列風順自吳全城。吳乾初自六合莊。吳孝祿自農兵莊。劉國志自濁水營。進兵合剿。七月二十六日。攻竹篙宛。破之。乘勢擣加禮宛。番不能支。竄於東角山。會大風雨。多餓死。老番乞降。許之。以酒布賈其地。東至加禮宛溪。西至山。南至荳蘭。北至加禮宛山。凡荳蘭溪以北爲官地。南爲番地。各事開墾。毋相侵凌。改加禮宛爲佳落。竹篙宛爲歸化。番乃服命。十年。率芒社番亂。討之。法人之役。劉銘傳視師臺灣。及平。經畫善後。奏言辦防練兵清賦撫番四事。語在其傳。銘傳以經畫臺灣。必須開疆拓土。廣徠人民。庶足自爲一省。詔設臺灣府於臺中。改臺灣縣爲安平。置雲林苗栗兩縣。陞臺東廳爲直隸州。基隆通判爲北路撫民理番同知。十二年四月。銘傳任巡撫。奏設臺灣撫墾大臣。巡撫兼任。以在籍太僕寺正卿林維源爲幫辦。駐大嵙崁。分全臺番地爲三路。自埔裡社以北至宜蘭爲北路。以南至恒春爲南路。臺東一帶爲東路。置撫墾局及其分局。設番市司事。以理貿易。振興茶腦。充其經費。以是拓地日多。租稅驟增。臺灣局面爲之一新。初開山之後。臺東埔裡社。

恒春鳳山各開義塾。教番童。頒訓番俚言。俾之誦讀。將以陶鎔其蠻性。而吳光亮亦撰化番俚言三十二條。縷縷數千言。飭通事時爲講解。俾之同化。至是又頒教條五。教一曰正朔。二曰恒業。三曰體制。四曰法度。五曰善行。五禁一做饗。二仇殺。三爭佔。四佩帶。五遷避。設番學堂於臺北府治。擇土目之子弟而教之。一道同風。漸革頑陋。其不服者則移師討之。剿撫竝用。可謂能得其宜矣。當開墾單蘭之時。移民日至。伐木治田。每遭番害。十一年四月。統領林朝棟率棟軍三營。以鄭以金爲副。統領柳泰和亦率所部二營。進駐單蘭。遣人說蘇魯馬臘邦兩社歸順。不從。且結束勢角大湖各番以抗。五月。分兵三路而入。相持數月。地險不可攻。翌年七月。朝棟進兵陷圍。報至。銘傳自將麾下百名及兵勇屯丁九千五百人。大舉以剿。番懼而竄。駐大營於埋伏坪。大隙什隻屋兩山各建礮臺。爲合圍計。然番每匿林中。以時狙擊。死傷頗多。九月。進兵。擣其社。不見一人。歸途遇覆。又損數百。於是戍兵三百五十名。以絕其道。番困無所得食。介老屋峨社土目請款。十月。始撤兵歸。銘傳以土目有功。授六品銜。改名白麻鳳。先是屈尺番污來社亦每出殺人。十一年九月。統領劉朝佑率銘軍三營討之。番降。十二年春正月。大料坎番亂。銘傳自將三營。至甘指坪。討之。番懼乞降。頒以衣食而鎮撫之。

己而盍文坪之番叛。八月。甘指坪亦動。頗不受約束。乃議剿之。分兵兩路。一自水流東以攻盍文坪。一自甘指坪而進竹頭角。宜興社土目糾合各社。竭力以抗。山路危峻。瘴毒盛。未易進兵。官軍戰病而沒者數百人。相持四月。乃諭番約和。撤兵歸。十月。巡道陳鳴志統帶鎮海後軍副將張兆連先後稟請。後山番社尙多未撫。南至卑南恒春。北抵蘇澳奇萊。若由水尾適中之地。與前山彰化開通道路。聯絡聲氣。先撫後山中路。則南北望風向化。否則一撫之後。仍然隔絕。徒糜經費。難求實效。銘傳從之。檄署臺灣鎮總兵章高元率礮隊。竝鎮海中軍前營定字左營及練兵七百。附以人工。由集集開山而東。兆連由水尾而西。尅期會辦。高元乃自拔埔社而至丹社嶺。計程一百二十有二里。兆連亦至。計程六十里。自冬徂春。一律開關。當是時。兆連以管帶黃定國畢寶印招撫水尾南北川丁仔老二十有四社。次由花蓮港至蘇奇沿山一帶。又撫他良等十有二社。兆連以太魯閣木瓜等勢最強。若得內附。餘番可服。乃率兵三營進駐山口。勸其納款。否則開礮以攻。土目懼乞撫。而大馬鞍大巴壘等五十有三社亦就撫。移軍卑南。以次而進。平埔之南。以呂家旺爲最強。恃其丁衆。抗不奉命。附近各社多觀望。兆連進兵山麓。命通事米清吉讓之。土目知不敵。乃就撫。竝約附近巴六凡等

二十有六社歸化。而八柵等十有三社亦來。卑南與鳳恒地相毗連。危峯疊嶂。人跡不通。野番盤踞其間。其在鳳山者以三條崙爲大。在恒春者以牡丹灣爲雄。兆連督鳳山營都司藍鳳春管帶林維楨分道而進。招撫六儀等十有五社。阿眉等二十有二社。中心崙等四十有二社。管帶黃定國畢寶印亦撫大蘭大打臘等十有二社。地極深密。皆處山上。素不與人往來。至是乃出。先是銘傳檄統帶鎮海前軍副將陶茂森招撫鳳山前山各番。於是沙摩溪等六社柏葉等十八社糞箕等四社。均內附。當高元開山之時。自水底藪至埔裡社。沿途招撫北港萬霧等五大社。眉加臘吻吻等四十有四小社。又自拔埔至丹社之時。亦撫卓大意東等六十有一社。嘉彰之交有番據焉。斗六門縣丞陳世烈設撫墾局於雲林坪。郡番巒番丹番等五十有三社。均內附。籬髮輸誠。此爲最悍之族。而跳梁於中路山谷者也。巡道陳鳴志檄鎮標中軍易豫俊以撫大喃等二十有四社。又以游擊劉智坤續撫大武壠內攸等四社。唯新竹五指山番憑其險阻。頗不受約束。疊戕墾戶。衆請討。十二月。銘傳檄統領林朝棟自十八孩兒社以攻石加碌之南。營官鄭有勤率副營攻其北。各以化番爲道。深入七十餘里。開路築卡。以壓迫之。石加碌五社及哇西熬等十有七社皆乞降。竝撫密拿柵等二十有四

社而歸。十三年。銘傳奏言。臣自上年十月。親督大隊。剿撫中北兩路生番。歸化後。現在數月之間。所有後山各路生番二百十八社。番丁五萬餘人。一律歸化。前山各路續撫生番至二百六十餘社。番丁籬髮者三萬八千餘人。水尾花蓮港雲林東勢角等處。可墾水旱田數十萬畝。不獨開疆闢地。且可免民番仇殺之禍。此皆朝廷威靈。遠播遐荒。遂使深山幽谷茹毛飲血之類。咸知向化歸仁。化狃榛而登衽席。實非臣所敢逆料。唯撫招愈多。經費愈巨。現已捐輸截止。支絀異常。經飭各軍仍回防所。籌畫設官分治。俟有經費。再行續撫。以期全臺生番一律歸化。初北港溪番就撫後。人民多往開墾。而林朝棟亦給墾內國姓乾溪灣抽藤坑等處。鋤耨竝進。可闢田園數百甲。然阿冷白毛兩社。番輒出殺人。朝棟止之不聽。請討。八月以兵二千五百。分四道而入。扼要之地。各建礮臺。番不敢出。伏叢莽以狙。頗多死傷。稍來社土目乃爲斡旋。願受約。十月。撤兵歸。設隘於險。駐勇守之。是年埔裡社熟番水社田頭貓蘭沈鹿與卓大社合以叛。戍兵不支。退焉。中路之山。往來暫絕。十四年六月。臺東平埔番大社以有司暴斂。憤而謀叛。水尾溪南北各社俱起。大巴壟馬太鞍各番應之。勢頗猖獗。遂迫花蓮港營。李得勝邀擊之。番敗走。依其族七脚川薄薄二社。二社已歸順。佯許之。醉以酒而戮。

之。以其頭來獻。越二日。平埔番合亞米士之族。可數千人。大舉至卑南。環攻州署。統領張兆連督兵戰。防守半月。不退。適兵艦自臺北來。開礮擊。以兵上陸助戰。番不敵。始解圍去。八月。統領劉朝祐率兵四百。自宜蘭小坡塘坑入山。至凍死人坑。爲南澳番老狗社所襲。力戰。免十五年。銘傳議討。調福建兵艦來援。以同安水師副將傅德高爲先鋒。蟻舟蘇澳。大軍繼之。游擊王冠英率鎮海前營。自小南澳上陸。以拊老狗社之背。總兵竇如田以銘字各營扼其前。定海永保兩艦爲運船。靖遠護之。游弋海上。備策應。銘傳自督全軍。駐蘇澳。德高以數人偵察。爲番所殺。如田率兵二千。竄入其地。番懼而竄。匿荒谷。不敢出。相持兩月。頗爲瘴毒所苦。乃班師。以鎮海前營駐蘇澳。是時呂家望社亦亂。張兆連討之。九月。大崙崁馬速社殺隘勇二十餘人。銘傳派兵討。乃降。十六年三月。牡丹社土目率番丁數人至田中央莊。狙殺莊民三人。莊民亦殺其番。烹之。牡丹番怒。合高士滑加芝來等社。可五六百人。以攻柴城田中央二莊。莊民禦之。激戰數日。恒春知縣呂兆璜接報。命柴城把總以兵彈壓。番不從。且殺兵。乃請討。十二月。總兵萬國本率兩營至。聲言大舉。而按兵不動。嗣派通事與番和各毋相仇殺。十七年春正月。兵退。番復跋扈。再請討。國本以兵千餘。駐牡丹山下。不敢進。數月再派通

事。申前約。撤兵而去。十八年六月。射不力社番殺楓港莊民。民亦殺之。番遂夜襲。有衆千餘。莊民聞警。併力拒戰。赴縣請救。知縣高晉翰與恒春營游擊張世香率兵至。命和。不從。晉翰病歸。未幾而沒。世香請討。總兵萬國本以兵千餘至。分戍各地。命通事入山說降。又不從。乃先攻老佛巴士墨二社。破之。燬其屋。又募楓港莊民六十爲道。進攻他社。汎官汪斌素有力。率壯士數人。入其內。猝禽土目。出斬之以徇。八月。大風雨。山水暴發。不可駐。新任知縣陳文煒謂國本曰。懸軍深入。空老我師。不如且約之。和以待後舉。派通事集土目。與莊民約。國本歸。而民番仍相仇殺。當是時。銘傳已去。邵友濂任巡撫。百事俱廢。然人民之墾番地者。前茅後勁。再接再厲。合力一心。以自成其都聚。二十年。遂設南雅廳於大崙崁。二十一年春正月。臺東觀音山莊平埔番亂。殺大莊總理宋梅芳。十五日。花蓮港營官邱光斗平之。

鄭氏各鎮屯田表

參軍莊今鳳山長治二圖里爲參軍陳永華所墾

前鎮莊今鳳山大竹里爲中提督前鎮所墾

前鋒莊今鳳山仁壽上里爲前鋒鎮所墾

後勁莊今鳳山半屏里爲後勁鎮所墾

後協莊今鳳山仁壽上里爲先鋒鎮後協所墾

右衝莊今鳳山半屏里爲右衝鋒鎮所墾

中衝莊今鳳山仁壽上里爲中衝鎮所墾

援剿中莊今鳳山觀音上里爲援剿中鎮所墾

援剿右莊今鳳山觀音里爲援剿右鎮所墾

中權莊今鳳山小竹下里爲中權鎮所墾

角宿莊今鳳山觀音上里爲角宿鎮所墾

仁武莊今鳳山觀音下里爲仁武鎮所墾而嘉義鐵線橋堡亦有仁武埔與查畝營莊相近

北領旗莊今鳳山維新里爲侍衛領旗協所墾並有水圳

三鎮莊今鳳山維新里爲戎旗三鎮所墾

左鎮莊今鳳山興隆外里爲宣毅左鎮所墾

營前莊今鳳山長治一圖里必爲某鎮營前故名營後亦同

營後莊今鳳山長治一圖里

五軍營莊今嘉義赤山堡爲五軍戎政所墾

查畝營莊今嘉義鐵線橋堡爲清查田畝之地

果毅後莊今嘉義果毅後堡爲果毅後鎮所墾

新營莊今嘉義鐵線橋堡鎮名未詳

舊營莊今嘉義鐵線橋堡鎮名未詳

中營莊今嘉義茅港尾西堡鎮名未詳

後營莊今嘉義蘇壹堡鎮名未詳

下營莊今嘉義蕭壠堡鎮名未詳

大營莊今嘉義新化北里鎮名未詳

二鎮莊今嘉義赤山堡爲戎旗二鎮所墾

左鎮莊今嘉義外新化南里爲折衝左鎮所墾

中協莊今嘉義赤山堡爲左先鋒鎮中協所墾

林鳳營莊今嘉義赤山堡爲參軍林鳳所墾

林圯埔莊今雲林沙連堡爲參軍林圯所墾林內亦同

統領埔莊今恆春興文里爲統領某所墾在柴城近附

臺灣撫墾局管轄表

撫墾總局光緒十二年設駐大崙崁隸巡撫總理全臺撫墾事務

大崙崁撫墾局隸總局掌理該管撫墾事務下設分局

雙溪分局

三角湧分局

咸菜甕分局

五指山分局

南莊分局

東勢角撫墾局

大湖分局

馬鞍龍分局光緒十四年裁

大茅埔分局光緒十四年設

水長流分局同上

北港分局同上

埔裡社撫墾局

蜈蚣崙分局

木屐蘭分局

叭哩沙撫墾局

阿里央分局

蘇澳分局

林圯埔撫墾局

蕃薯藔撫墾局

隘藔分局

枋寮分局

恒春撫墾局

臺東撫墾局

璞石閣分局

花蓮港分局

臺灣撫墾局局制表

總辦一員以三品文員任之總理局中一切事務

委員一員以七品文員任之或以營官兼任掌理撫墾事務

幕賓總局四員局二員隨時聘用處理文案等事

司事二名或四名分辦庶務會計

通事人數不等分任通譯

局勇人數不等保護墾務並監督隘勇

醫生各局置一二名以任醫務

教讀各社置一名以教番人讀書

教耕各社置一名以教番人耕田

臺灣通史卷十六

臺南

連雅堂

撰

城池志

易曰。王公設險。以守其國。是故有百里之封者。必有十里之城。有五十里之封者。必有三里之城。所以駐軍旅而衛人民也。連橫曰。臺灣之建城。古矣。澎湖虎井嶼之東南。有沈城焉。天空浪靜。望之在目。繚垣相錯。周可數十丈。漁者常得其磚。色紅堅若鐵。然當沒水鑿之。上生蠣蚌。似千數百年物。或曰。隋代之所建也。而文獻無徵。摺紳之士難言之。明嘉靖末年。海寇林道乾亂。據澎湖。都督俞大猷征之。乃駐偏師。築城暗澳。其趾猶存。天啓二年。荷人來此。築城媽宮。周百二十丈。役死者千三百人。外建礮臺。分守海道。臺人謂之紅毛城。四年八月。入臺灣。築城於一鯤身。俯瞰大海。基廣二百七十六丈。有六尺。高三丈。有寄。爲兩層。四隅各置巨礮。駐兵以守。曰熱蘭遮。六年五月。西班牙人入雞籠。築山嘉魯城。嗣入淡水。築羅岷古城。

各戍兵爲犄角。已而荷人逐之。永歷十五年。延平郡王克臺灣。就荷蘭城以居。改建內府。臺人謂之玉城。別闢一門曰桔株。以春秋鄭國有此門也。官署市肆。別建於永康下里。則今之臺南郡治。當是時。統治僅在承天。而雞籠淡水尙荒蕪。三十七年。聞清軍有伐臺之舉。二月。命左武衛何祐城淡水。增戍兵。六月。清軍破澎湖。克隸降。改承天府爲臺灣。設縣三。尙未築城也。朱一貴之役。旣平。總督滿保議築城。僅圍衙署倉庫於中。總兵藍廷珍以爲不可。覆之曰。夫設兵本以衛民。而兵在城內。民在城外。彼蚩蚩者。不知居重馭輕之意。謂出力築城。衛兵而置室家婦子於外。以當蹂躪。夜半賊來。呼城門而求救。無及矣。理宜包羅民居爲是。北從總兵大營後圍起。環臺灣縣署而東。跨溝爲水門。遂包東嶽廟臺灣縣學鳳山公館。南包郡庠防廳臺廈道公署。西包天后宮。而北環左營游擊署。計一週不過十里。北跨高坡。南瞰鬼子山。西俯海岸。東北當北路要衝。東南控南中二路。方得建郡形勝。幸卽具題請旨。開輸磚石城工事例。諸羅鳳山皆可尅日行之。不然道旁築舍。偷安目前。寔非經國安邦之道也。書上不行。雍正十一年。巡撫鄂彌達奏請築城。旨下大學士等議覆。總督郝玉麟等奏言。臺灣城工浩繁。或可因地制宜。先於城基之外。栽植刺竹。可資捍衛。再於刺竹圍內。建造城垣。

工作亦易。奉旨以郝玉麟等所奏。不過慮其地濱大海。工費浩繁。故有茨竹藩籬之議。殊不知城垣之設。所以防外患。如必當建城。雖重費何惜。而臺灣變亂。率皆自內生。非禦外寇比。不但城可以不建。且建城寔有所不可。臺郡門戶曰鹿耳門。與府治近。號稱天險。內設礮臺。可恃爲固。其法最善。從前平定鄭克塽。朱一貴。皆乘風潮舟行入港。故旬日可克。向使有城可據。收其府庫。人民以自固。攻之不拔。坐守安平。曠日相持。克敵不易。蓋重洋形勢。與內地異。固未可輕議建制也。今郝玉麟等所奏。因地制宜。甚有裨益。其淡水各處礮臺。務須建造。各屬并應增修。不可惜費。於是植竹爲城。泊林爽文之役。再議建築。是爲今日之臺南。城先是乾隆四十年。知府蔣元樞以府城未建。而各屬之城易圯。乃率廳縣公捐一萬二千圓。分交四縣。各三千圓。置田收息。歲得租穀可八千石。以備修繕之費。謂之城租。然遇有大繇役。則由紳富捐出。或奏發國帑。以爲之用。光緒十一年。建省。擇地於東大墩之麓。命棟軍築之。以控制南北。而各縣亦以時建造。故得記其工事。次於篇。

臺南府城附郭安平

雍正元年。臺灣縣知縣周鍾瑄始建木柵。周二千六百六十有二丈。建七門。正東倚龍山。

寺曰大東門。南抱山川壇。曰小南門。度南拱文廟之前。曰大南門。自東以北。亘右營廳。曰小東門。北近城守營。曰大北門。西北逼烏鬼井。曰小北門。迤西外逼船廠。南折跨溝。爲水門。過媽祖樓之西而終焉。獨缺其西。十一年。巡撫鄂彌達奏請植竹爲城。乃自小北以至大南。計植一萬七千九百八十有三株。亦缺其西。而於小北小西兩門。各建礮臺一座。并設敵臺。城門望樓焉。乾隆元年。發國帑。斲石建七門。護以女牆。每門周二十五丈。高二丈八尺。又建窩鋪十五座。二十四年。知縣夏瑚增植綠珊瑚爲外護。四十年。知府蔣元樞修之。且建小西門於土墜埕西。五十三年。大學士福康安工部侍郎德成巡撫徐嗣曾等會奏。改築磚城。以臺未燒磚。用土。進士鄭光策以臺地多震。不宜築城。請仍舊制。加鑿濠溝。足以爲守。不從。是年十月二十七日。起工。東南北三方。悉用舊址。唯西方近海。內縮一百五十餘丈。畫自小北以至小西。狀如半月。沈江。故謂之半月城。壁高一丈八尺。頂廣一丈五尺。基廣二丈。新建大西門樓。凡八門。東曰迎春。西曰鎮海。南曰甯南。北曰拱辰。置窩鋪十六座。以五十六年四月十一日告成。計費十二萬四千六十餘兩。蔡牽之亂。郡治戒嚴。郊商多在西城外。乃捐建甕城於新港墩。以防海道。道光四年。許尙之變。十二年。張丙之

變。南北相擾。官紳議建外郭。不許。僅築東郭之門。旁植刺竹。設仁和永康二門以出入之。同治元年五月十一日。地大震。城壁多壞。修之。光緒元年。欽差大臣沈葆楨又發國帑大修之。十三年。移臺灣府縣於臺中。改稱臺南。而縣曰安平。

嘉義縣城

康熙二十三年。置諸羅縣於佳里興堡。則昔之諸羅番社。四十三年。遷今治。知縣宋永清始設木柵。周六百八十丈。建四門。雍正元年。知縣孫魯改築土城。周七百九十五丈。有二尺。壁厚二丈四尺。上廣一丈四尺。池深一丈四尺。濶二丈四尺。周八百三十五丈。有五尺。五年。知縣劉良璧建城樓。東曰襟山。西曰帶海。南曰崇陽。北曰拱辰。各門置二礮。十二年。知縣陸鶴又於城外環植刺竹。用以爲固。林爽文之變。環攻數月。死守不下。事聞。詔改嘉義。其後屢遭兵燹。城半傾圮。道光十三年。紳士王得祿等捐款重修。并築礮壘。以九月起工。十六年二月告竣。用費十一萬九千三百六十兩。同治九年。大震復圮。光緒十五年。知縣包容與紳士林啓東等重修。

鳳山縣城

前在興隆內里前鋒莊。康熙二十三年建。以其地有鳳山故名。六十一年。知縣劉光泗始築土城。周八百有十丈。高一丈三尺。建四門。左倚龜山。右連蛇山。池廣一丈。深八尺。雍正十二年。知縣錢洙奉命環植刺竹。乾隆五十一年。林爽文之變。莊大田應之。城破。文武多死。乃移於埤頭店。環植刺竹。嘉慶十一年。蔡牽之亂。吳淮泗陷新城。將軍賽冲阿議復舊城。且建石嗣。以費大而止。道光三年。總督趙慎軫議建。飭知府方傳穉查復。翌年。巡撫孫爾準巡臺。奏請再建。而是時適有楊良斌之變。潛入新城。其議遂定。十一月。傳穉謀於紳民。捐款十四萬兩。五年七月起工。以知縣杜紹箕爲監督。紳士黃化鯉。吳尙新。黃名標。劉伊仲等爲董事。擴其舊址。內包龜山。外接蛇山。壘石爲之。高一丈有二尺。廣一丈有五寸。上建雉堞。闢四門。東爲鳳儀。西爲奠海。南爲啓文。北爲拱辰。四隅各築礮臺。計費九萬二千一百兩。六年八月竣工。擇吉告遷。而紹箕忽死。衆以爲不祥。無敢移者。衙署漸就荒廢。於是乃建新城。積土以築。略具規模。則今之縣治也。

恒春縣城

同治十三年。欽差大臣沈葆楨至琅璠。奏建縣治。擇地於猴洞。山勢廻環。左趨海岸。而右

廓平原。似爲全臺收局。名曰恒春。以其地爲極南。四時皆春也。光緒元年起工。翌年告竣。城高二丈有八尺。周九百七十二丈。用土石築之。建四門。

臺灣府城附郭臺灣

光緒十三年建省。移臺灣府於此。附郭亦曰臺灣。先是巡撫岑毓英來巡。擇地於藍興堡東大墩之麓。劉銘傳亦以爲可。十五年起工。先建八門四樓。東爲靈威樓。曰朝陽。西爲兌悅樓。曰聽濤。南爲離照樓。曰鎮平。北爲坎孚樓。曰明遠。而小東爲良安。小西爲坤順。小南爲巽正。小北爲乾健。十六年。檄棟軍統領林朝棟督勇築城。以紳士吳鸞旂等董工。十七年二月略成。周六百五十丈。費欸二十一萬五千兩。而銘傳一去。其事遂止。

彰化縣城

雍正元年建縣治於半線。十二年。知縣秦士望環植刺竹。建四門。林爽文之役。剪伐殆盡。嘉慶二年。知縣胡應魁再植。十四年。總督方維甸巡臺。紳士王松林文濬等請捐建。以城東倚八卦山。形勢不利。議包圍之。而工巨。乃仍舊址。別建礮臺於山上。知縣楊桂森先捐欸。衆從之。計得十四萬餘兩。以十六年起工。二十年告竣。周九百二十二丈。二尺有八寸。

高一丈五尺。雉堞高三尺。基寬一丈五尺。爲門四。東曰樂耕。西曰慶豐。南曰宣平。北曰拱辰。樓二層。高三丈九尺。礮臺十二。水洞六。堆房十六。先是林爽文之役。陽湖趙翼從軍。議移治鹿港。其後陳震曜亦有鹿港建城之議。皆不行。以城在山下。每攻必破也。

雲林縣城

光緒十三年建縣。擇地林圯埔之雲林坪。固鄭氏部將林圯所闢也。翌年二月。知縣陳世烈奉命築城。周一千三百丈有奇。寬六尺。外植竹三重。旣成。建旌義亭。以志工事。題曰前山第一城。然其地當濁水清水兩溪之域。每逢汎濫。往來杜絕。十九年知縣李烱請移治斗六。築城以居。周一千一百六十丈。高五尺。廣八尺。外植刺竹。闢四門。竹外環池。深七尺。寬八尺。

苗栗縣城

未建

臺北府城附郭淡水

光緒元年。欽差大臣沈葆楨奏建府治。擇地於大佳臘堡。四年。知府陳星聚謀於紳士。捐

款二十餘萬兩。以五年正月起工。八年告竣。壘石爲之。周一千五百有六丈。池略大之。關五門。東曰照正。西曰寶成。南曰麗正。北曰承恩。小南曰重熙。而東北兩門又築一郭。題曰巖疆鎖鑰。旣成。聚者漸多。其後復建巡撫衙門。遂爲省會。

新竹縣城

雍正元年。設淡防廳於竹塹埔。固番社也。十一年。同知徐治民始植竹。周四百四十餘丈。關四門。建樓。嘉慶十一年。蔡牽之亂。城民增築土垣。十八年。同知查廷華擴之。周一千四百有四丈。高廣各一丈。池深一丈。董事林超英。吳國步等亦改建四門。且增窩鋪。道光六年。總督孫爾準巡臺。同知李慎彝從紳士鄭用錫之議。稟請改建。砌石爲之。周八百六十六丈。高一丈五尺。堞三尺。基廣一丈六尺。上廣一丈。雖較舊略小。而旣高且固。仍關四門。東曰迎曦。西曰挹爽。南曰歌薰。北曰拱辰。樓二層。高一丈九尺。各建礮臺。以七年六月起工。九年八月告竣。計費十四萬七千四百九十八兩。均爲官民捐出。是役巡道孔昭虔親勘其地。紳士鄭用錫。林國華。林祥麟等各董其事。其後疊圯疊修。光緒十九年四月。知縣葉意深再發國帑重修。凡支三千八百二十四兩。先是道光十九年。巡道姚瑩命同知龍大

惇別建一城於西門之外。爲犄角。以地當港口。用以防海也。二十年英軍之役。同知曹謹乃擴之。周四百九十五丈。高一丈。建四門樓。東爲賓暘。西爲告成。南爲解阜。北爲承恩。又闢四小門。小東曰卯耕。小西曰觀海。小南曰耀文。小北曰天樞。城外植竹鑿池。廣二丈。深一丈五尺。紳士鄭用錫等董之。二十三年修。同治九年。增建礮臺。今圯。

宜蘭縣城

宜蘭故蛤仔難也。嘉慶十五年。建噶瑪蘭廳。擇地五圍。委辨知府楊廷理始築土城。周約三里。長六百四十丈。東西互均。南北相距一百八十丈。垣高六尺。有奇。環種九芎。故曰九芎城。十七年。通判翟淦增植刺竹。并建四門。各以方向名之。二十四年。通判高大鏞重建。道光十年。薩廉修之。城內舊有水圳兩道。自西而東。乃引以爲池。深七尺。寬一丈五尺。光緒元年。改爲宜蘭縣。

臺東直隸州城

未建

埔里社廳城

光緒四年。改北路理番同知爲中路撫民理番同知。駐埔里社。總兵吳光亮以官帑四千圓。建築廳署。壘土爲城。外植刺竹。爲四門。周二里許。曰大埔城。

基隆廳城

未建

南雅廳城

未建

澎湖廳城

鄭氏之時。置安撫司。駐暗澳舊城。歸清後。設巡檢。而城已圯。康熙五十六年。乃築小城。稱新城。雍正五年。改廳。猶未建也。光緒十一年。法軍之役。城陷。十三年十二月。總兵吳宏洛乃發兵築城。十五年十月告竣。周七百八十九丈。有二尺二寸。高一丈五尺。堞高三尺。凡五百七十。基深三尺五寸。寬二丈四尺。關四門。西南各增一門。皆建樓壯麗。東南臨海。西接金龜頭。北浚護濠。計費二萬三千五百三十七兩。爲臺灣善後局支辦。是年移廳署於今治。

衙署

延平郡王府在安平鎮王城內今圯

東都總制府在承天府治西定坊下大堤土名統領巷同治間陳氏子孫以陳永華曾爲總制改建宗祠

承天府在府治東安坊南向歸清後改爲臺灣府署

天興縣在府治鎮北坊米市今廢

萬年縣在興隆里卽鳳山舊城今廢

臺灣撫巡衙門在臺北府治撫臺街光緒十三年巡撫劉銘傳建

臺灣布政使衙門在臺北府治舊爲巡撫行臺光緒十三年布政使沈應奎建

滿漢兩察院在臺南府治東安坊雍正元年建今圯

臺灣撫墾大臣衙門在南雅廳治光緒十二年幫辦撫墾林維源就其別莊暫用

分巡臺澎道署在臺南府治西定坊康熙二十三年巡道周昌建

臺南府在府治東安坊原臺灣府署雍正七年知府倪象愷就明承天府改建

經歷司在府署東南

臺北府在府治光緒四年知府陳星聚建

經歷司在府署之南

臺灣府未建暫設彰化縣治以舊時北路理番廳署充用

經歷司在府署

臺東直隸州光緒十三年南路撫民理番同知袁聞栢建十四年秋番亂被燬十二月知州吳本杰乃就故址之南

畔詳請築壘四圍各寬三十丈

臺灣海防廳舊在鹿耳門雍正八年移建臺南府治西定坊光緒十一年裁今廢

淡水海防廳原在竹塹士林莊雍正二年同知王汧建乾隆二十一年同知王錫縉移建於廳治光緒元年裁暫充

臺北府署

澎湖海防廳原巡檢署在大山嶼西澳康熙二十三年建

北路理番廳原在彰化縣治乾隆五十三年移鹿港嘉慶二年同知汪楠建於粟倉南畔光緒九年裁

中路理番廳在埔里社大埔城光緒四年總兵吳光亮建

基隆海防廳原基隆通判署

南雅理番廳在大崙崁莊光緒二十年建

噶瑪蘭通判署在廳治東街嘉慶十八年通判翟淦建光緒元年改爲宜蘭縣署

基隆通判署在廳治光緒元年建十三年改爲海防同知署

卑南州同署在卑南莊寄治於安撫軍營內

花蓮港州判署未建

安平縣署原臺灣縣署舊在臺南府治東安坊乾隆十五年知縣魯鼎梅移建鎮北坊

典史署在縣署之右

鳳山縣署原在舊城康熙四十三年知縣宋永清建乾隆五十三年移建今治埤頭街

典史署原在舊城後移今治縣署之右

嘉義縣署原在佳里興康熙四十三年移駐今治四十五年攝縣事同知孫元衡建乾隆二十七年知縣衛克靖重建

典史署在縣署之右雍正二年建

恒春縣署在縣治光緒元年知縣周有基建

典史署在縣署之右

淡水縣署在臺北府治光緒四年建

典史署在縣署之右

新竹縣署在縣治光緒元年建

典史署在縣署之右

宜蘭縣署原噶瑪蘭廳署

典史署在縣署之右

臺灣縣署在府治新莊仔莊光緒十四年建

典史署在縣署之右

彰化縣署在縣治之中雍正六年知縣湯啓聲建林爽文之役燬乾隆五十三年知縣宋學灝重建戴潮春之役復燬

同治十二年知縣孫繼祖再建

典史署在縣署之右乾隆十二年典史朱江重建

雲林縣署原斗六門巡檢署

典史署在縣署之右

苗栗縣署在縣治光緒十四年建

典史署在縣署之右

羅漢門縣丞署乾隆二十七年建五十四年改爲巡檢署

萬丹縣丞署乾隆二十六年移駐阿里港

笨港縣丞署原在笨港雍正十一年移建於坂頭厝

下淡水縣丞署原下淡水巡檢署

頭圍縣丞署嘉慶二十五年縣丞朱懋移建於烏石港之南

南投縣丞署乾隆二十四年縣丞張成器建林爽文之役燬五十三年縣丞徐英重建

新莊縣丞署乾隆五十五年建後移駐艋舺

大武隴巡檢署康熙間建

佳里與巡檢署雍正十年建

新港巡檢署康熙間建

斗六門巡檢署乾隆二十六年建後改爲雲林縣署

鹿仔港巡檢署雍正六年建

大甲巡檢署嘉慶十四年建

貓霧揀巡檢署在犁頭店雍正十年建乾隆五十三年重建今廢

葫蘆墩巡檢署光緒十一年建

枋藁巡檢署光緒元年建

竹塹巡檢署乾隆二十一年建

八里坌巡檢署雍正十一年建乾隆十五年風災圯移駐新莊

羅漢門巡檢署原縣丞署

八罩巡檢署光緒十一年建

鎮守臺澎總兵官署在臺南府治鎮北坊康熙二十五年總兵楊文魁建乾隆五年總兵何勉添築土城高一丈

一尺周三百二十丈關東西兩門

中營游擊署在臺南府治鎮北坊

左營游擊署在臺南府治鎮北坊光緒元年移駐恒春

右營游擊署在臺南府治鎮北坊光緒元年裁

城守營參將署在臺南府治鎮北坊

道標營都司署原鎮標右營游擊署

南路營參將署在鳳山縣治

北路營副將署在彰化縣治縣署之東雍正十一年建乾隆五十三年重建

噶瑪蘭營都司署在宜蘭縣治原守備署嘉慶十八年守備黃廷耀建

鎮守澎湖水師總兵官署在媽宮城內原水師副將署

左營游擊署在媽宮城

右營游擊署在媽宮城

安平水師副將署在安平鎮乾隆五年副將王清建

中營游擊署在安平鎮

左營游擊署原在安平鎮乾隆五十三年移建鹿港北頭六十年燬改建於土城內

右營游擊署在安平鎮

艋舺水師參將署在艋舺原淡水營都司署嘉慶十三年建

局所

全臺團練總局在臺南府治咸豐二年設自後凡有軍事則開辦焉法人之役臺北亦設各廳縣皆設分局

培元總局光緒七年臺灣道劉璈改團練總局爲培元總局仍委紳士理之以辦地方公事法人之役復爲團練

全臺籌防總局一在臺北府治一在臺南府治均光緒十年設二十年復設

保甲局各府廳縣皆設無事之時則辦冬防

臺灣通商總局在臺灣道署咸豐九年設以辦通商事務光緒十三年臺北亦設此局歸布政使督辦

全臺清賦總局一在臺南府治一在臺北府治均光緒十二年設各廳縣皆設分局十八年事竣裁撤

全臺撫墾總局在淡水縣轄大崙崁光緒十二年設各地多設分局

轉運局在上海光緒十年設委蘇松太道辦之以理臺灣軍械餉項轉運之事

支應局在臺北府治光緒十一年設由布政使督辦而臺南設分局

捐輸局在臺北府治光緒十一年設由布政使督辦而臺南設分局

善後局在臺北府治光緒十二年設由布政使督辦以理戰後之事

招墾局光緒元年設於廈門汕頭香港以辦閩粵人來臺開墾之事

招商局光緒十二年設於新嘉坡以辨南洋華僑來臺經營之事

鑄錢局在臺南府治東安坊康熙二十四年設後裁

官銀號同治二年設於滬尾以收解關稅其後旗後安平雞籠以次開辦

官銀局在臺北府治光緒十六年設

臺南官票局在臺南府治光緒二十一年設

法審局在臺北撫署內光緒十二年設

官醫局在臺北考棚內光緒十二年設十七年裁

軍器局在臺北大稻埕光緒十一年八月設翌年十月竣工費款十二萬餘圓以記名提督劉朝幹爲總辦聘德國工

師以製軍器

電報總局在臺北府治光緒十二年設各地多設分局

釐金總局在臺北府治由布政使督辦先是通商之後奏設釐金局於滬尾安平以徵各貨釐金其後各處添設計

有二十八分局

烙號局同治五年設於滬尾安平以烙阿片之號而徵其釐歸道督辦其後改由商人攬辦

金沙局在基隆廳轄瑞芳光緒十七年設而暖暖六堵七堵四脚亭頂雙溪各設分局

腦磺總局在臺北府治光緒十三年設由巡撫督辦而大崙崁彰化恒春宜蘭各設分局其外又設支局十七年改

歸撫墾局兼辦

煤務總局在基隆光緒五年設聘用西人以機器開採煤炭

磺油局在苗栗縣治光緒十三年設十七年裁

鐵路總局在臺北府治光緒十三年設

軍裝局在臺北府治光緒十一年設而臺南設分局

火藥局在臺北大隆同莊光緒十二年設而臺南在小北門外

水雷局一在滬尾一在基隆均光緒十二年設

硝藥局在臺北大稻埕光緒十二年設歸軍器局兼辦以自製火藥

伐木局在臺北大稻埕光緒十二年設歸軍器局兼辦以機器切鋸材木配售上海並爲鐵路枕木之用

蠶桑局在臺北大稻埕光緒十六年設

臺北通商局在臺北東門外光緒十三年設以辦建築城內鋪屋之事

清道局光緒十三年設凡臺北及通商口岸各設一局以清街道十七年裁

郵政總局在臺北府治光緒十四年設各地多設分局

通誌局在臺北登瀛書院內光緒十七年設各廳縣皆設採訪局以編纂臺灣通誌

臺南樂局在臺南府治奎樓內由紳士辦之以司文廟祀典歲收租穀數千石

臺灣通史卷十七

臺南

連雅堂

撰

關征志

昔禹平洪水。畫九州。任土作貢。賦稅之義始此。賦以足兵。稅以足食。國用既足。民亦安寧。而暴君汙吏。以天下爲私有。橫征倍斂。吸食脂膏。兆民怨怒。起而逐之。國亡身戮。爲天下笑。連橫曰。明以前尙矣。臺灣遠隔海外。爲古荒服。土番所處。海寇所踞。未有先王之制也。明季荷蘭人始闢斯土。以通東洋貿易之途。設官行政。制王田。募民耕之。而納其賦。語在田賦志。是時歸附土番。歲納鹿皮。視社之大小爲差。其後因之。每年五月初二日。主計官集公所。召民。賸社衆環視之。官歷舉各社餉銀之數。高呼於上。賸者應之。至最多者而畀之。乃具姓名及社餉於冊。取殷戶爲保。以四季分納。謂之社商。社商時率夥記。至番社貿易。夥主財物。記任會計。而社商領之。凡番耕獵之物。悉與社商。而以布帛鹽鐵烟草火藥易之。其令嚴密。番不

敢私社餉之入。大社數千金。小亦數百。是爲雜稅之一。當是時。土地初闢。地廣而腴。一歲三熟。閩粵沿海之氓相率而至。以逐什一之利。歲率數千人。荷人課其丁稅。每丁年納四盾。領臺之初。歲收三千一百盾。其後二十年。增至三萬三千七百盾。蓋移殖者衆。而歲入亦多也。臺灣之山多麋鹿。獵者領照納稅。月課一盾。逐犬入山。肆其捕殺。於是麋鹿漸少。其後增至十五盾。歲入三萬六千盾。少亦二萬餘盾。其脯皮販運中國日本。歲率十餘萬金。設關權稅。以稽市物。歲亦十餘萬金。若夫山林川澤之利。商工之所計。虞衡之所入。莫不權其輕重。以佐行政之費。荷官俸養所入。歲不足用。各自私賈。以罔市利。暴待細民。侵奪田宅。上下交爭。賄賂成習。甲螺郭懷一因民之怨。糾合同志謀逐之事。敗被殺。株連數千人。亡命之徒。轉相嘯聚。以與抵抗。又聞延平郡王將興光復之師。荷人懼。乃請爪哇總督增兵戍臺。多課雜稅。以助兵食。而內訌不息。搶攘昏墊。以至於亡。夫國以民爲本。富則國富。貧則國貧。故曰。不患寡而患不均。不患貧而患不安。今荷人之有臺灣也。肆其橫暴。剪食我土地。侮虐我人民。剝奪我權利。而世之論者曰。是殖民之策也。烏乎痛哉。延平入臺。國用不足。多沿荷人舊制。及經嗣位。諮議參軍陳永華乃籌長治之策。盡心經畫。建保里之方。布屯田之制。開魚鹽之利。

伐林木之材。內課農桑。外興貿易。十數年來。移民大至。多至數十萬人。拓地遠及兩鄙。臺灣之人。以是大集。孔子曰。道千乘之國。敬事而信。節用而愛人。使民以時。故民皆勤功樂業。先公而後私。故曰。衣食足而知榮辱。廉讓生而息爭訟。夫自延平入臺以來。與民休息。而永華又咻噢之道。之以政。閑之以誼。教之以務。使之以和。漸之以忠。厲之以勇。勸之以利。嚴之以刑。民於是乎可任也。二十年間。臺灣大有取其餘。以供國用。民亦樂輸。不怠善乎。德化之入。人深也。洎永華亡。政教偷薄。而雜稅之徵濫矣。清人得臺之際。議遷其民。而墟其地。靖海將軍施琅力陳不可。乃設一府三縣。田賦之制略同行省。而雜稅仍舊。或更立之。名目繁多。變本加厲。其設於陸者曰。陸餉。麗於水者曰。水餉。厝餉始於荷人。大小有差。歲徵銀一千四百六十六兩有奇。雍正元年五月。有司查驗府治家屋。除破壞者。凡得大厝七千七十四間。間徵一錢五分一釐九毫。小厝一千七百零三間。徵半之。按戶給照。納餉後有倒塌者。許繳照註銷。而新建者。餉亦如之。著爲例。磨餉者。鄭氏所立也。一首徵銀五兩六錢。蔗車新餉也。一張亦徵銀五兩六錢。當舖者。以權子母者也。年徵五兩。謂之官典。官保護之。雖收贓不罪。然多勢豪所設。而地方官稍分潤焉。不徵餉者爲小典。則武營弁兵。以薄資而弋重利者也。

瓦窰也。菜園也。樣宅也。檳榔宅也。亦以大小徵餉。其稅微不足道。此陸餉之大略也。塭養魚也。潭亦養魚也。而塭之出息優於潭。其後塭視下園徵稅。而編於田賦焉。澎湖產魚盛。以海爲田。琅入臺後。據爲私有。歲收規費千二百兩。及許良彬至。奏請歸官。以充提督衙門公費。而行家任意苛求。漁民多受剝。深以爲苦。乾隆二年。下諭禁革。命總督郝玉麟飭地方官照例編列魚舟號數。以時稽查。夫魚舟有大小。計擔徵餉。每擔七分七釐。次曰尖艚。每隻八錢四分。次曰杉板。每隻四錢二分。網一張則三兩五錢。小者一兩七錢五分。箔者削竹如簾。長十餘丈。立海坪。乘潮汐以捕魚也。每張一兩二錢六分。滬者築土圍。高尺餘。缺其門以入潮水。而置網以捕魚也。每口八錢四分。滾垂餌以釣也。每條五兩八錢八分。纏亦釣也。餉與滾同。罟也。罟也。罟也。均用以捕魚。而得魚之多少不同。故徵餉之輕重亦別。罟一張十一兩七錢六分。罟五兩八錢八分。罟四兩二錢。烏魚旗者亦謂之藏。每冬至前。烏魚自北而南。多以萬計。漁戶先時領旗。旗徵餉一兩二錢。鈐蓋縣印。列號備查。鳳邑最多。此水餉之大略也。同治十三年冬十二月。欽差大臣沈葆楨奏言。舊例臺灣鼓鑄鍋皿農具之人。須向地方官舉充。由藩司給照。通臺祇二十七家。名曰鑄戶。其鐵由內地漳州採買。私販者治罪。邇來海口

通商。鐵劬載在進口稅則。昔杜內地之出。今自西洋而來。情形迥異。而不肖兵役人等。往往藉端勒索。該鑄戶亦恃官舉。任意把持。民甚苦之。又臺產竹竿。向因洋民不靖。恐有接濟。因禁出口。以致竹竿經過口岸。均須稽查。不知海船蒲布皆可爲帆。無須用竹。立之厲禁。徒爲兵役留一索詐之端。民間多一受害之事。應請無庸查禁。詔可。光緒三年春。巡撫丁日昌既視臺灣。親見雜稅之苦。奏請蠲除。其言曰。查臺郡當鄭克塽歸誠時。僅有臺灣鳳山嘉義三縣之地。其彰化縣淡水噶瑪蘭兩廳。皆係後闢之土。東至內山。西至海地。皆淺狹。唯南北袤長。計臺鳳嘉三縣合長二百九十里。共額徵供穀十三萬餘石。而後闢之一縣兩廳合長五百八十里。僅徵供穀五萬六千餘石。核計彰淡蘭之地。比臺鳳嘉幾多一半。而所徵之穀。反不及一半。何也。蓋臺鳳嘉開闢之地較早。所徵稅則皆沿鄭氏之舊。而彰淡蘭新墾之地。則由朝廷新定科則。故賦課較輕也。然其爲民累者。則莫如雜餉。查雜餉名目繁多。內如歸化生番。無畝可計。無糧可科。以納鹿皮爲餉。而所謂塹餉者。則徵於畜魚之所。所謂廊餉者。則徵於熬糖之所。雖謂苛細。而稽其贏利。酌取一二。以益正供。於民尙無大損也。他如海水支流曰港。窪深積水曰潭。凡可養魚之所。則如塹餉徵收。而小道可通之處。竹筏小艇運貨往

來亦按照徵收。又如建屋之基。磨麪之場。瓦窰菜園檳榔番樣之類。莫不按數徵餉。若其徵諸漁戶者。曰罟曰簷曰罾曰箔曰滾曰網曰滬曰烏魚旗。吏役勒索。橫取窮民。而傭戶漁人又多去來無定。官役不能盡悉。假手土豪。出爲攬辦。豫納承充之費。壟斷浮收。舐糠及米。輸於官者十取於民者百。民奈何而不困耶。臣到臺後。查悉各弊。則擬稍爲釐剔。而各項名目瑣碎。影射牽連。非盡斷葛藤。終難以絕弊竇。除番餉塹餉廊餉之外。其港潭等項雜餉。統計各屬共徵銀五千二百二十三兩九錢六分五釐。均應豁免。以除民累。伏查臺鳳嘉三縣正供徵收既重。而雜餉名目猶繁。小民終歲勤勞。所得無幾。而一經吏役隳突叫囂。遂有枷棒在手。鷄犬無聲之歎。民困何由而蘇。元氣何由而復乎。且此項雜餉徵收不過數千餘兩。就地支發。歸入奏銷。臺灣近年出產茶葉樟腦等釐稅。均屬新徵。較此多至數倍。而臺北現議開鑛。則地利更可勃興。謹將前項雜餉查列清單。請自光緒三年起。永遠一律蠲除。詔可。臺人大說。至今猶稱頌焉。契稅爲入款之一。亦雜稅也。舊例每百圓繳稅并費共十三圓。人民以爲過巨。多不投稅。光緒二年。郡紳蔡霞潭囑御史某出奏。旨下部議。定自三年起。減爲一半。卽百圓徵稅六圓五角。外費悉裁。然經辨者猶不能盡廢。每宗加繳司單六角。若在

千兩以上者。由縣送府加印。或由業戶自送。每宗規費二三十圓。而稅額之中。以三圓解府轉藩。知縣例得一圓八角。餘由書吏家丁房總差役分肥。故知縣下車之後。則示民稅契。按期輪比。而私其利。多者數萬圓。少亦數千。已稅之契曰紅契。未稅者白契。衆不以爲憑。故人民亦自知爲要也。安平爲府治通商之口。向由臺防同知管理。徵收船費。謂之文口。派員查之。凡內地商船來臺者。應驗牌照。出口之時。船上須掛紅旗。巡丁到船。丈量擔位。報明無差。乃由委員給照收費。每百擔五圓六占六瓣。歲約五千餘圓。不換照者以爲走私。船貨充公。光緒元年。臺防同知移駐卑南。仍歸收費。至十四年。改由安平縣收之。以抵津貼一半之額。其時帆船漸少。歲約三四千圓。而輪船則由海關收之。又有武口。歸安平水師副將管理。亦派弁兵以驗出入。詰盜賊。每船徵費二圓。歲約二千餘圓。天津之約。許開臺灣互市。咸豐九年。兩江總督何桂清奏准美國先在潮州臺灣通商。福州將軍東純閩浙總督慶端福建巡撫瑞璜會奏在臺開設海關。已而英法兩國請照美國徵稅。復奏准一律辦理。其稅項仍解關庫。歸將軍督辦。統併南臺廈門兩口奏銷。十年。奏派道員區天民會同臺灣鎮林向榮兵備道孔昭慈知府洪毓琛等商辦。議以淡水八里坌爲通商馬頭。而於對岸滬尾設關。其北

路之雞籠香山後壠中港南路之鹿耳門打鼓大小各口一律禁止洋船貿易同治元年六月二十二日滬尾開關徵稅二年正月奏派道員馬樞輝接辦適彰化亂各地俶擾未到乃委淡水同知恩煜代之恩煜請設關渡驗卡以查洋商進出巡邏仍用關船稅務司又稟總理衙門請於雞籠旗後安平三處照例通商部議許之八月十九日雞籠開口派副稅務司以辨三年四月安平旗後亦開辨以滬尾爲正口雞籠安平旗後爲外口徵稅銀冊均由總口轉繳關庫歸福州將軍督辦四年春二月旗後稅務司以安平徵收洋稅遞年加多各商赴旗完納諸多不便請於安平添設銀號管出入將軍慶麟調查原案以安平僅爲驗口祇准洋船寄碇起貨不許開設而打鼓委員德協領復以此舉寔爲華商之便嗣經戶部核准以六年十月開辨既又設船政廳理港務徵船鈔其時貿易未盛稅項亦少蓋以中國協定稅率甚輕而土貨之往來者別課釐金釐金之設始於道光之季時當軍事旁午徵賦爲難故爲權宜之計取以助軍凡貨物出入照擔徵收不論粗細故謂之釐咸豐十一年知府洪毓琛奉飭遵辦省中亦派候補知府程榮春至淡水設局開徵以阿片爲大宗分局之外又有驗卞徵釐如前而胥吏舞文弄弊格外苛求以飽私橐商賈病之夫釐金之設爲救一時

之急。而非可以永遠也。故自事平之後。士大夫多請裁撤。歸併海關。而清廷不聽。然自通商以來。地利日闢。物產日興。糖米茶腦之出口。歲率數百萬圓。米爲民食之本。供給福建。故無釐糖每擔二錢。以天津上海爲銷路。香港日本次之。茶別徵釐。設局於大稻埕。樟腦之利。或歸官。或歸民。其釐較多。而煤炭金沙之利。前後以興。故其詳可得而聞焉。光緒十八年。旗後商人以波羅麻一宗。每百斤徵釐六角。合銀四錢三分二釐。而海關向徵稅銀七錢。自十六年三月。併入苧麻類。一律改徵。減爲三錢五分。是前本稅重釐輕。今反稅輕釐重。故請核減。波羅麻者。卽鳳梨絲。配至汕頭。以績夏布。其額頗多。全臺釐金局以爲出口貨物。如土茯苓。百斤。洋關稅徵銀一錢三分。釐金定章爲一圓。牛皮膠百斤。洋關一錢五分。而釐金爲五角。此稅輕而釐重也。又如芝麻百斤。洋關徵一錢三分五釐。而釐金爲一角四瓣。樟腦洋關徵七錢五分四釐。而釐金爲五角五瓣。此稅重而釐輕也。是則關稅之與釐金。原有參差。不得以百貨釐金。俱照關稅減半徵收。其子口半稅。原指洋商請領之三聯票。運貨到最後子口完納半稅而言。若華商則逢關納稅。遇下抽釐。何得援出口半稅爲例。但該商人近來市景蕭條。銷路尤滯。旗後波羅麻出口。每年徵釐約二三百金。爲數甚少。姑准核減。併入苧麻章。

程。每百斤改徵四角二瓣。合銀三錢二釐。以恤商艱。夫稅釐之設。所以供國之用也。而民間亦有私徵。城廂之市。村落之墟。牛豚之畜。蔬菓之場。凡至此販者。每收其費。以充廟祀義舉之款。然必稟官出示。以杜分爭。故人肯樂輸也。初道光間。郡中商務繁盛。牛車入城。日數百輛。城兵欺其鄉愚。勒索規費。每輛收錢百文。多至數百文。鄉人不堪其苦。群籲郡紳。鎮道合示禁止。違者治罪。而弊稍革矣。

鄭氏徵收雜稅表

厝稅 每間六錢二分凡六千二百七十間半年徵三千八百八十七兩七錢一分

驥社 凡二十七所年徵三千六十兩

港潭 年徵一萬九千三百八十八兩

樑頭牌 每擔一錢一分凡一萬三千六百三十七擔年徵一千五百兩七分

澎湖船隻 凡一百一十一隻年徵七十三兩八錢

安平鎮渡船 凡三十四隻年徵四百兩

牛磨 每首二十四兩凡二十七首年徵六百四十八兩

蔗車 凡一百張年徵一千九百七十六兩

大小網箔 凡八十張年徵二百零八兩四錢

晉譽純綾等 年徵八百四十兩

烏魚旗 凡九十四枝年徵一百四十一兩

入港貨稅 年徵一萬三千兩

出港鹽稅 年徵二百兩

僧道度牒 僧每名二兩道士五兩年徵二百兩

清代陸餉徵收表據乾隆二十九年臺灣府志

款日	廳縣	臺	灣	鳳	山	諸	羅	彰	化	淡	水	澎湖(終位釐)
厝	餉	一、二五六、一九三				二〇〇、五〇〇						
牛	磨	二二五、二〇四						一〇〇、八〇〇		五、六〇〇		
蔗	車	二七四、四〇〇		五六二、八〇〇		八七一、九〇〇		三四七、二〇〇		一一、二〇〇		
棧	宅	七〇、〇〇〇		六、〇〇〇								
檳	榔					六〇、〇〇〇						
菜	園					三、〇〇〇						

臺灣海關徵收船鈔表

十三年	五三四、五二三	三三七、五七六	八七二、〇九九
十四年	五九八、三八三	四〇四、二〇五	一、〇〇二、五八八
十五年	五九〇、九四四	三九九、二〇二	九九〇、一四六
十六年	五八四、二四一	四六一、〇三一	一、〇四五、二七二

年分	淡水及基隆	安平及旗後	合計(兩)
光緒八年	一、八九七	五、〇六七	六、九六四
九年	二、二八三	四、九三九	七、二二二
十年	一、九六一	五、四九一	七、四五二
十一年	六五六	二、五四八	三、二〇四
十二年	一、四四二	二、四一五	三、八五七
十三年	七〇七	二、四七五	三、一八二
十四年	四、八六九	三、四二二	八、二九一

十	十	十
七	六	五
年	年	年

二、〇六五	一、六三〇	三、一九一
-------	-------	-------

一、七二七	四、〇五九	二、七二四
-------	-------	-------

三、七九二	五、六八九	五、九二三
-------	-------	-------

臺灣通史卷十八

臺南 連雅堂 撰

權賣志

連橫曰。昔者太公治齊。官山海。以殖其利。管仲因之。齊以富強。故能霸諸侯。攘夷狄。功傳數世。漢興至武帝時。拓地用兵。軍旅歲動。國計不足。設鹽鐵之官。權酒酤之稅。文學之臣。以爲聚斂。而功利者。且以爲富國焉。臺灣權賣之制。始於清代。初理鹽礦。後及煤腦。蓋此爲天地自然之利。苟振興之。足以裕國而益民焉。先是臺灣鼓鑄鍋皿農具之人。例由地方官舉充。藩司給照。而納其稅。全臺定二十有七家。名曰鑄戶。其鐵由漳州採辦。私販治罪。蓋以臺灣孤立海上。慮造兵器。故官督之。然自通商以來。洋鐵入口。載在稅則。而舊例遂成虛文。同治十三年。欽差大臣沈葆楨奏請廢止。用者便之。夫權賣之制。各國皆有。大小輕重。或有不。同。而臺灣之所行者。則此。記曰。百姓足。君孰與不足。旨深哉。

鹽

臺灣濱海之地。煮水爲鹽。其利甚溥。前時鹽味苦澀。不適於用。多自漳泉運入。永歷十九年。諮議參軍陳永華始教民晒鹽。擇地於天興之南。則今之瀨口也。其法築埕海隅。鋪以碎磚。引水於池。俟其發瀾。潑而晒之。卽日可成。色白而鹹。用功甚少。許民自賣。而課其稅。歸清以後。鹽戶日多。消路愈廣。爭晒競售。市價不一。雍正四年春。奏歸官辦。由府管理。分設鹽場四處。曰州南。曰州北。爲臺邑武定里。曰瀨北。爲今附郭之鹽埕莊。曰瀨南。則鳳邑之大竹里。而毗於打鼓山麓也。每場設管事一名。巡丁十人。或八人。或六人。視其大小。以防私漏。鹽戶晒鹽。例於春冬。春曰大汎。冬曰小汎。以夏秋多雨也。鹽成運納於場。而發其價。每石時銀一錢二分。瀨南稍遜。減二分。歲收約九萬石。或至十萬石。府中設總館一。市鎮各設分館。販戶赴館繳課。領引而出。其鹽石銀三錢。水運陸載。視路遠近。以定市價。故各地不均。鹽課所入。每月支發鹽戶及經費外。悉存府庫。造冊申報。以充兵餉。乾隆二十年。增設瀨東。爲嘉邑之井仔脚。而布袋嘴北門嶼亦先後分設。蓋以彰淡設治。墾戶日進。故由此給之。五十五年。議定臺灣定額之外。所有埕底泥鹽。歲約二萬石。分撥各廳縣銷售。每年徵課一千八百十八兩。

餘入冊奏銷。嘉慶十五年。設噶瑪蘭廳。鹽用瀨北。歲消七千石。歸廳採運。每石售銀三錢三分。共徵二千三百十兩。除原價及折紋銀外。可得盈餘紋銀一千三百三十七兩。先是興化惠安魚船。每當春夏之交。遭風收泊蘭屬。運鹽散賣。斤錢七八文。間有收積居奇。至秋冬時。價至二三十文。及設官後。禁私販。議照汀州行銷廣潮鹽引。募雞籠小船。給照至莆田惠安。就場購運。以資民食。蓋以蘭地僻處北東。府鹽運至淡水。又須待風而入。費大時久。或虞斷絕。故其價昂。而司道不許。以蘭爲臺屬。行銷府鹽。可杜私販。且緩急足濟。乃議定歸廳。自十八年三月爲始。每斤價十六文。用者便之。道光四年閏七月。省議以南靖長泰二縣鹽引阻滯。奏請臺灣代銷。於是歲課一萬七千石。合以臺灣自晒者十三萬石。入款頗巨。自是以來。北鄙日關。淡屬住民幾數十萬。而仍行銷府鹽。採配不便。咸豐中始許於虎仔山自晒。一時私鹽充斥。課項銳減。同治六年二月。改歸道辦。嚴緝捕。虎仔山場亦歸官。七年移府。九年二月復歸道。十年仍歸府辦。而鹽引愈多矣。澎湖四面皆海。小島錯立。其地斥鹵。可以自晒。仍銷府鹽。每銀一圓售八十斤。色灰稍苦。澎人以海爲田。需鹽較重。一旦不至。人受其病。光緒初。議設鹽場。不許。十一年建省。十四年整飭鹽務。南北兩府各設總局。以攬其事。南歸兵備。

道。而北歸布政使。基隆艋舺宜蘭新竹大甲鹿港嘉義鳳山恒春澎湖各設總館。各地仍置小館。由民攬辦。其館主多鄉紳宦戚。獲利不少。大者歲盈萬金。小亦一二千圓。臺灣消鹽約按人口。每人日用三錢。年須六斤十二兩。以三百萬人計之。則當鹽二千二十有五萬斤。勻銀一分。爲二十萬二千五百兩。寔歲入之一大宗也。生番渾噩。僻處內山。茹毛飲血。需鹽孔亟。其歸化者由官給之。或以互市。而舊志載崇爻山有鹹泉。掘地汲之。編竹爲鑊。內外塗泥。煮之成鹽。若中壠後壠各地熟番。有以挑沙瀝鹵自煮者。官不徵課。蓋歸化時。曾經奏准者也。

硫磺

硫磺產於淡水。爲今北投之地。當西班牙人據臺時。曾掘取之。而瘴毒披猖。蟲滋水惡。工人多病。歸清後。康熙三十五年冬。福州火藥局災。典守者負償。欲派吏往。無敢至。仁和諸生郁永河適在省。慨然請行。三十六年春二月至郡。四月北上。先命淡水社通事張大入北投築屋。既至。集番酋飲。告以採磺事。與約一筐易布七尺。番喜。各負磺至。命工煮之。磺有黃黑二種。質沉有光。以指燃之。颯颯有聲者佳。反是則劣。先碎爲粉。暴日極乾。鑊中置油。徐入土。以

兩人持竹桿攪之。土既得油。則磺自出。油土相融。而後成物。一鑊可得四五百斤。或一二百斤。唯視火候之純疵爾。產磺之地爲內北投。石作藍靛色。有沸泉。草色萎黃。無生意。山麓白氣縷縷如雲。乍吐。是爲磺穴。風至磺氣甚惡。更進半里。草木不生。地熱如炙。白氣五十餘道。皆從地底騰激。怒雷震撼。地岌岌欲動。所以不陷者。熱氣鼓之爾。穴中毒焰撲人。觸腦欲裂。左傍一溪。聲如倒峽。卽沸泉所出源也。永河著裨海記游。其所言略如此。當是時淡水未闢。而北投又在番境。奸宄潛至。私製火藥。乾隆中。出示禁止。嗣命屯丁守之。每年四季。北路營副將派弁入山。焚燬草木。以杜私製。同治二年。福建巡撫徐宗幹奏請開採。以俾軍務。六年。淡水同知嚴金清稟請不可。以採之有四可慮。八年。盧璧山奉南洋通商大臣之命。來臺採辦。募工煮之。旣而閩浙總督英桂飭總兵楊在元兵備道黎兆棠派員會勘。蓋以其時整軍經武。多用火藥。故議開採。然以所產未巨。恐耗經費。九年。復封。及劉銘傳任巡撫。謀殖地利。光緒十三年。奏設腦磺總局。與樟腦皆歸官辦。而所產日盛。以至於今。

煤

煤爲礦產大宗。臺灣多有。而基隆最盛。當西班牙據北時。則掘用之。其跡猶存。爲今之仙洞。

歸清以後。仍事採掘。乾隆中。移民漸衆。以其有傷龍脈。請官禁止。然尙有私掘者。道光十五年。淡水同知婁雲再示禁。十七年。同知曹謹復禁。而是時海通已啓。東西往來。以臺爲徑。各國遂多注目。禁烟之役。英艦窺基隆。及平。英人輒來臺灣。謀通商。二十八年。英國水師游擊吳倫至基隆。查勘煤層。歸報其國。三十年。英公使請准英人開採。不許咸豐四年。美國水師提督彼里亦來勘。以煤層豐富。謀據此地。建軍港。以開美國貿易之途。而臺人不知也。天津之約。許開基隆通商。同治三年。福州稅務司上書。陳採煤之利。請准英商租地開辦。淡水稅務司亦爲是言。巡撫徐宗幹奏言不可。而紳民亦立公約曰。雞籠山一帶。爲合境來龍。靈秀所鍾。風脈攸關。近有沿海奸民。訛言山根生有煤炭。難保無人偷掘。一經損傷。全臺不利。如遇偷挖。卽行圍捕送官。倘敢抗拒。格殺勿論。有不遵者。公議懲罰。然其後私掘愈多。勢不能禁。九年春正月。總督英桂命署道黎兆棠派員查勘。乃委江蘇候補道胡斌與淡水同知會勘。據復海港東邊之深澳八堵土地。公坑竹篙厝偏坑田藁港后山石梗港暖暖四脚亭大水堀等處。皆屬旁山。無碍正脈。遠隔民居。且於田園廬墓亦無妨碍。計得九十二洞。閉歇者二十三洞。其煤已竭。地歸山主。停辦者二十一洞。以價賤滯銷。流淺難運。現開者四十八洞。

而中如四脚亭四洞。夏秋之間亦流淺難運。俟八九月方可配出。於是傳集山主及鄉人士。妥定開採章程。立石爲界。不許租與外人。并私相典賣。各洞相距南北二十五里。東西五六里。閉者不得再開。以七十洞爲限。而煤戶須本地人。又有親族廬墓者。互相環保。其曾爲洋行辦事者不許。煤工亦須土著。家在五十里以內者方可用。每洞不得過二十人。煤戶具保所出之煤。投行仲賣。官爲督辨。違者照罰。禁約雖開。而約束尙嚴也。當是時。基隆滬尾已爲通商之口。輪船出入。用煤日多。或運至福州廈門。每年出產多至三四十萬擔。少亦十餘萬擔。其煤三等。上曰角煤。擔值錢二百次。中煤稍降。又次煤粉最賤。僅得五六十文。此爲在山之價。若運出市上。則視路之遠近而差。照例每擔徵稅五釐。唯船政局採用者豁免。而煤戶亦無稅。光緒元年。欽差大臣沈葆楨奏言。臺灣之地。病於土曠。而土曠之病。由於人稀。重洋遠隔。勢必獲利三倍。而後內地力食之衆。不召而來。然墾田之利。微不若開煤之利。鉅墾田之利。緩不若開煤之利。速。南北各省。按日以煤炊爨。入冬以煤禦寒。若出口暢旺。煤價必昂。於民間不無窒碍。而臺灣則炊爨禦寒均無需此。除出口外。別無銷路。雖其煤質鬆脆。不敵西洋之產。而較之東洋。尙去不遠。然臺煤雖富。年來開採仍不甚旺。其故由於滯銷。西洋之

煤。金山最夥。從前船隻皆繞金山而來。貨物之外。以煤壓載。煤佳價平。固非臺煤所能敵。自埃及紅海開通以後。洋船無須繞道金山。而金山之煤遂稀。價亦日昂。而臺煤仍不暢銷。則必減輕稅率。以廣招徠。此後稅率雖減。而入款仍不懸殊。則於民間生計當有起色。至船局所用臺煤。向係免稅。不在定則之內。今擬將出口之煤。每噸減爲稅銀一錢。如蒙天恩允准。伏懇飭下總理各國事務衙門。札行總稅務司。言明臺煤無關民間日用。爲洋船所必需。是以減稅惠商。南北洋各口均不得援以爲例。詔可。三年。聘英人臺札爲礦師。并購機器裝置八堵。大爲開採。出口亦多。而經費繁雜。不敷開用。委員浮冒。積弊日深。八年二月。臺灣道劉璈稟請督撫。略曰。臺北煤務爲臺灣漏卮。中外疑議。已非一日。職道履任以來。亟思設法整頓。以期除弊興利。蓋以煤務事屬創辦。職道又未親履其地。遠觀懸揣。漫議章程。失刻失疏。均虞未協。然屢奉鈞批。又不敢以月耗巨帑責歸臺防之事。置諸後圖。從前張升道深知其難。請由船政主辦。寔由於此。嗣後黎星憲復稱統歸船政辦理。蓋以煤務之壞。壞於歷辦不得其人。浮費過多。成本過重。隨處浮冒。任意報銷。爾鄭倅接辦以來。自稟牘觀之。較前諸員似有把握。然以冊報論之。似其不寔不盡之處。仍所不免。八堵以總炭一萬九千八百五十

餘石起解。基隆祇收一萬六千五百五十餘石。十餘里間。少去三千三百餘石。已屬不解。而八堵以粉炭九千零十石起解。基隆僅收三千四百三十石。竟少去五千一百八十石。基隆收發之時。又各有失耗。大較又去一成。既減成色。又失斤重。一轉移間。一月之內。耗至八千餘石。揆之於理。似欠圓通。又工匠等聽燒官煤。月至數千石。洋人三名。月燒官煤九千斤。路旁三燈。月燒官煤四萬斤。其間不應濫支之處。不可勝數。此煤斤濫耗之情形也。至於銀錢數目。採煤工價。浮於所收之額。多至三千四百餘石。車運之價。亦難寔按。種種糜費。悉難枚舉。今擬委補用同知史悠棻。候補通判李嘉棠。會同辨理。不過欲於臺灣漏卮。稍求補苴爾。於是安定章程八條。竭力整飭。時有畢德衛洋行。攬消總炭。船局以爲不可。乃於上海自設臺灣煤務分局。又於汕頭香港廈門。託商代售。統計每年出煤一百四五十萬石。可得二十餘萬圓。而局費不過數萬圓。入多出少。漸有起色。若能擴充銷路。尤足以興其利也。法人之役。基隆失守。煤局被燬。及平。巡撫劉銘傳奏設煤務局。委張鴻祿辦之。投資四十餘萬兩。新置機器。又聘外國礦師。召工開採。至十三年。每日出煤可百噸。而辨理未得其宜。銘傳委用粵商代辦。衆多訾議。部議以爲不可。復歸官辦。及邵友濂至。遂裁撤之。

煤油

煤油或稱石油。其利溥。而前人未知也。臺人燃燈多用豆油。及西人發見煤油以來。運入臺。其始僅見於城市。不十數年遍村野。以其價廉而光倍也。油煤之用。以美國彗星標者爲最多。次爲俄奧之產。歲率數十萬圓。然臺自有煤油。而未知採法。爲足惜爾。咸豐末年。粵人邱苟通事也。勾引生番殺人。官捕之急。遁入山。至猫裡溪上流。見水面有油。味殊惡。時乏燭。燃之絕光。竊喜。以告吳某某。以百金賈之。而不知用。苟復賈寶順洋行。歲得銀千餘兩。遂互爭權。集衆械鬪。久不息。九年二月。淡水同知逮苟治罪。又以外商無在內地開礦之權。封之。及沈葆楨巡臺。聞其事。光緒四年。聘美國工師二人勘驗。以後壠油脈最旺。乃購機器取之。其始多鹽水。掘至百數十丈。達油脈。滾滾而出。日得十五擔。久之。工師與有司不洽。竟辭去。遂廢。光緒十三年。巡撫劉銘傳乃設煤油局。委棟軍統領林朝棟兼辦。而出產未多。入不敷出。十七年。巡撫邵友濂撤之。聞礦學家謂臺灣油脈甚長。自苗栗而至安屬之礁吧岬。蜿蜒千里。如能取之。足以供用而有餘。又臺多火山。間有瓦斯質。若炭。光勝於煤。其用尤宏。

樟腦爲臺灣特產。當鄭芝龍居臺時。其徒入山開墾。伐樟熬腦。爲今嘉義縣轄。配售日本。以供藥料。其法傳自泉州。歸清以後。封禁番地。犯者死。康熙五十九年。曾逮熬腦者百數十人。治罪。其業漸廢。而山麓細民。猶有私熬者。雍正三年。閩浙總督滿保奏准。臺灣澎湖水師戰船。令於臺灣設廠脩造。以臺道臺協監督。於是南北二路各設軍工料館。採伐大木。以爲船料。而檄匠首任之。臺灣產樟北路較盛。樟有兩種。香者可熬腦。臭者僅爲器具。故匠首率衆入山。并許熬腦。以私其利。而他人皆禁也。道光五年。始設軍工廠於艋舺。并設軍工料館。兼辦腦務。內山所熬之腦。皆歸所收。而後配出。禁烟之役。英船輒至雞籠。潛以阿片易腦。奸人牟利。私熬日盛。法令幾不能禁。咸豐五年。英商德記洋行始與臺灣道訂約購腦。每擔價十六圓。配赴歐洲。而發腦戶僅八圓。利入道署。十年。臺灣開港。外商漸至。樟腦爲出口之貨。歲約二十萬圓。臺灣道陳方伯議歸官辦。設局收之。同治二年。艋舺料館改爲腦館。竹塹後壠大甲等處均設小館。以理其事。其時艋舺大甲所出特多。歲各一萬二三千擔。竹塹後壠亦各有二三千擔。而噶瑪蘭彰化之內山。且有熬者。消用日廣。然爲官辦故。外商不能獲利。五年。安平英領事請歸民辦。兵備道吳大廷不許。駐京英公使以爲有阻通商。遂向總理各國事務

衙門交涉。六年。閩浙總督派興泉永道曾獻德至臺。與英領事議。八年。廢官辦。新立購腦章程。凡外商入內地採腦。須先向總稅務司請給護照。填明行號姓名。完納出口稅之半。以代內地稅。運至口岸。報明海關。照章納稅。而後出口。若無護照者。將腦充公。人亦治罪。然非通商口岸。外國商船不得入泊。亦不得私自貿易。九年。始設釐金局。徵收腦釐。每百斤課銀五錢。初由商人攬辦。其後歸局。光緒十三年。巡撫劉銘傳奏言。樟腦一項。近來日本出產甚多。而香港腦價日落。如歸官辦。每石可獲利二三圓。臺灣產腦每年約出萬石。硫磺則臺產最佳。前兩江督臣沈葆楨奏請開禁。採備官用。歷年辦有舊章。每石成本洋一圓。官買每石洋三圓。每年出產六七千石。上等硫磺每年祇出千石。均歸官用。其次積聚三千餘石。官既不用。商禁未開。不能出口。日久月聚。愈積愈多。不獨糜費棄置可惜。且香港年銷硫磺至萬餘石。運至江南天津一帶。薰炙葵扇草帽。蒸炊餗餗。製造爆竹。銷路甚廣。臺灣硫磺既佳。奸民私熬販運。出口不少。夫以自採之磺。禁不出口。既聽日本暢銷。又不能禁止私熬。若設法經理。獲利雖尙未多。而於撫番經費不無少補等因。臣查樟腦硫磺兩項。民間私熬私售。每多械鬪滋事。懇請歸官收買出賣。發給執照出口。以目前情形而論。年可獲利三萬餘圓。以後

若能出產較多。銷路較暢。經理得人。日漸推廣。以自有之財。供無窮之用。寔於國計民生。兩有裨益也。詔可。乃設全臺腦磺總局。隸巡撫。而於北路之大崙。坎。中路之彰化。各設腦務總局。若南莊。若三角湧。若雙溪。若罩蘭。若集集。若埔里。社。皆設分局。以委員辨之。又有司事執秤查竈勇丁。分任其職。而宜蘭恒春。別設總局。以獎勵腦務。按照竈數。徵收防費。以充撫番之款。製出之腦。悉歸官局。每擔八兩。售之商人。爲十二兩。年可獲利百餘萬兩。時爲臺北德商公泰洋行攬辦。配赴香港。每擔可售二十兩。多至二十餘兩。十六年五月。臺北改歸蔡南生。而彰化由林朝棟。繳價三十圓。釐金防費在內。以十二圓給腦戶。餘入官。是年出口六千四百八十餘擔。十七年爲一萬五千九百八十餘擔。十八年爲一萬三千一百二十餘擔。而腦價亦漸起。蓋以歐美市場消用愈巨。化學日精。藉以製器合藥也。初德人晦寔祿。在南開設瑞興洋行。先至集集。設館熬腦。自配香港。數年之間。獲利不貲。及歸官辦。頓失其益。去之汕頭。以腦業交英商怡記洋行承辦。十六年五月。怡記自集集運腦七百餘擔。至鹿港。九月又運五百四十擔。彰化局丁以爲走私。要而奪之。安平英領事照會巡撫索還。不聽。彼此相持。勢將決裂。駐京英公使乃與總理各國事務衙門交涉。而各國亦以有碍通商。請撤官辦。

旨下戶部議覆。奏曰。熟考古今律例。鹽硝硫磺均歸官辦。嚴禁私販。除此三項之外。未常別有所禁也。臺灣內山。今以出產樟腦之多。奸商夤緣賄賂。挾謀其間。不准他人售賣。寔屬無謂。今英商收腦數萬斤。爲巡察委員所沒。是則奸商之故意而後至此。卽臺灣巡撫亦難辭其責。況樟腦一物。原係藥材。未可禁止私販。如英國地多蟲蟻。以腦薰屍。可免蟲蝕。此消用之所以較多也。此後各省新出。不論利益多寡。應先奏明而後舉辦。方爲得策。伏乞諭飭臺灣巡撫劉銘傳。則將樟腦一項改爲民辦。官府但可徵稅。詔可。十一月。廢官辦。撤防勇。生番乘隙出草。燬藁殺人。沿山紛擾。腦務大損。於是請設隘勇而納防費。凡腦百斤徵稅八圓。腦丁每竈一粒月徵八角。以十竈爲一份。其出口者則海關稅一圓一角五分五釐。釐金五角五分。所入仍屬不少。十七年。改腦磺事務隸布政使司。仍於北路之大崙。崁中路之彰化。各設腦務稽查總局。下設分局。悉以撫墾分局委員兼之。以其事相關連也。二十一年。裁竈費。每百斤改徵釐金四圓。其時外國消用愈宏。香港每擔至七八十圓。或至百圓。

沙金

臺灣採金始於三百年前。舊志稱鄭氏末葉。遣官陳廷輝往哆囉滿採金。老番訝之曰。臺其

有事乎。或問之曰。日本採金而荷蘭來。荷蘭採金而鄭氏至。今鄭氏又採。其能晏然耶。已而清軍果入臺。語雖不經。亦足以知採金之古。海上事略曰。鄭氏時。上淡水通事李滄請取金自效。監紀陳福偕行至淡水。率宣毅鎮兵。將至卑南。覓土番伏莽以俟。曰。吾輩以此爲生。漢人來取。必死戰。福不敢進。歸至半途。遇土番泛舟。福攻之。禽其酋。獲金二百兩。令道取。不從。又曰。金出山後。其番爲傀儡種。人跡罕至。自淡水乘蟒甲。自西徂東。返而自北而南。溯溪進。匝月方至。土番善泅者。從水底取之。如小豆。藏之竹篋。或秘之甌甌。間出交易。番境補遺曰。哆囉滿產金。淘沙出之。與瓜子金相似。土番鑄成條。藏巨甕中。客至每開甕自炫。然不知所用。近歲始有攜至雞籠淡水易布者。臺灣志略曰。港底金在蛤仔難內山。港水深且冷。生番沈入。信手撈之。亟起。口噤不能言。熱火良久乃定。金如碎米。據此數說。則臺之產金已久。而多在東北。乾隆三十六年。波蘭人麥禮荷斯奇謀拓臺東。與馬波奧時科番戰。番降。獻金二十斤。銀八百斤。皆此地之產。其地爲今之瑞芳附近。然則臺之產金早爲外人所涎矣。光緒十一年。法事已平。巡撫劉銘傳築鐵路。十五年。架八堵車站之橋。工人入水造礎。偶見沙中有金。取出淘之。其時造橋監督爲都司李家德。廣東順德人。曾游美國。而路工亦多閩粵。

人有至新舊金山者。聞之爭取。居民亦從之。各獲利。每兩易銀八兩。十六年九月。採者三千餘人。地亦日廣。十七年八月。出示禁止。而逐利之徒。昏夜偷取。犯者多。基隆同知黎景嵩議歸官。巡撫邵友濂許之。十八年二月。奏准開辦。設金沙總局於基隆。瑞芳暖暖四脚亭六堵七堵頂雙溪各設分局。派員理之。採者領照納稅。駐勇彈壓。是年冬。商人金寶泉稟請承辦。每年認繳二萬兩。一切費用及勇餉。悉由支理。許之以十九年起。撤局歸商。而自十八年二月至歲終。計收釐金二萬七千一百十二兩餘。除開局費一成。并新勇一哨薪糧衣器帳房等款。定剩一萬七千六百六十二兩餘。以此劃入海防費內。奏明存案。未幾。金瓜石大石坑亦發見金苗。採者日盛。時金價頗廉。每兩在山易銀十八圓。後漸貴。歲可值銀一百數十萬圓。而臺東之新城秀姑巒花蓮港得其犁。宜蘭之蘇澳叭哩沙等。橫亘六十餘里。亦有金苗。然以開闢未久。野番出沒。居民輒遭害。取之尙少。

阿片釐金

臺灣之有阿片。始於荷蘭之時。荷人貿易以此爲巨。消售閩粵兩省。漸乃及於內地。當明之際。華人已有吸用。然僅以爲藥。故本草綱目謂之合敷融。或曰阿芙蓉。則以罌粟實之漿而

熬之也。阿片出於印度。以此爲國課之大宗。而突厥埃及波斯皆有產。上者曰公班。則黑土也。味濃力大。次曰白皮。又次曰金花。則紅土也。臺灣之銷阿片。其始多用黑土。繼乃合用紅土。價較賤。故吸之者衆。乾嘉以來。宇內無事。上自士夫。下至走卒。莫不以此爲樂。及道光十八年。下詔禁止。以林則徐督兩粵。燬英人阿片一萬三千六百餘箱。英人不服。遂至構兵。臺灣道姚瑩亦奉旨禁止。初犯者刑。再犯死。一時阿片幾絕。然英人輒以夾板至雞籠。潛與奸民授受。而易樟腦。山陬海澨。猶有吸者。及媾和後。徐宗幹任兵備道。著防夷論。又謀禁止。其言曰。銀何以日少。洋烟愈甚也。民何以日貧。喫烟愈多也。以每日每人約計之。須銀二錢。就臺地富貴貧賤良莠男女。約略喫烟者不下數十萬人。以五十萬計之。每日耗銀十萬兩矣。而臺人亦自立禁烟公約。吸烟者幾不以人齒。雷厲風行。一時殆盡。咸豐元年。洋商始來貿易。照例徵稅。十一年。設釐金局。以阿片爲大宗。謂之洋藥。同治五年。淡水同知王鏞詳請入口阿片。不論內地。已徵與否。每箱徵釐五十圓。大吏許之。歲率十餘萬兩。而安平之入款亦如之。光緒五年。改歸道署。召殷商攬辦。各地設局。按枚烙號。始得出售市上。否則以私貨論。充公而重罰之。然走私者時有所聞。而局員防不勝防也。十年。法人之役。南北禁港。商船杜

絕。阿片不至。市價日昂。每箱漲至千圓。兵備道劉璈奏言。臺灣通商。以洋藥為大宗。每年進口售銀四五百萬兩。今法人封口。洋藥不通。曾經紳耆公請。從權劃出官莊。准民自種。照例納稅。於是嘉彰各屬多有種者。其味較淡。而雲南四川福建亦有產。然臺灣銷者以印土為多。洋人運來易貨。臺商亦自採辦。臺南販土之商。合設一會。曰芙蓉郊。輪年值理。每箱徵費二圓。以充義舉。售烟者曰芙蓉舖。亦有公會。銷用之廣。幾於粟米麻絲矣。先是商人陳郁堂攬辦臺南阿片釐金。欠款四萬六千兩。防務之時。軍費浩大。疊催不繳。巡撫劉銘傳札飭撤辦。提轅訊究。而璈仍任之。銘傳大怒。以其通同作弊。奏請革職。璈遂以此獲罪。

臺灣阿片進口表

年	分	滬尾及基隆	安平及旗後	合計
光緒	四年	一、八四八	二、八五三	四、七〇一
五	年	二、一六五	三、三八七	五、五五二
六	年	二、一四九	三、六四七	五、七九六
七	年	二、一四二	三、七三九	五、八八一

臺灣徵收阿片釐金表

年	分	滬尾及基隆	安平及旗後	合	計(兩)
光緒十三年	八	一、五八四	三、〇一二	四、五九六	
	九	一、二六五	二、七五二	四、〇一七	
	十	一、二七〇	二、三〇八	三、五七八	
	十一	一、四三六	二、三三九	三、七七五	
	十二	一、六三三	二、九一三	四、五七六	
	十三	一、六二二	二、六二六	四、二四八	
	十四	一、九七四	二、六七二	四、六四六	
	十五	一、九八三	二、七五二	四、七三五	
	十六	一、九六七	三、〇七六	五、〇四三	
	十七	二、一八一	三、四〇一	五、五八二	
	十八	二、一〇三	三、〇三六	五、一三九	
					二九九、二八八

十	十	十	十	十
八	七	六	五	四
年	年	年	年	年
一六九、一五八	一七四、五五三	一五七、六〇三	一五八、八〇九	一五七、九五七
二四二、九〇二	二七二、〇八七	二四六、二〇〇	二一九、九〇三	二一三、六〇八
四一八、〇六〇	四四六、六四〇	四〇三、八〇三	三七八、七一二	三七一、五六五

臺灣通史卷十九

臺南

連雅堂

撰

郵傳志

連橫曰。臺灣海國也。四面皆水。荒古以來。久不與世接矣。而高山摩漢。平野生雲。獸蹄鳥跡之交。爲土番盤踞者。又不知幾千載。夫臺與閩粵比鄰。順風揚帆。尅日可至。隋代旣鎮撫東番。宋人又從而貿易。而皆不隸版圖。則以交通未便也。明季葡船發見此土。荷西二國遂分據之。各主其地。中間數百里。抑未有往來者焉。當是時。臺灣之名遠播歐土。而日本之八幡船亦出沒海上。瀛壖片壤。遂爲東西洋人交接之區矣。延平相宅。萬衆偕來。閩粵之人扶攜而至。閩居近海。粵處山陬。守望相助。出入相友。而交通關矣。歸清以後。拓地日廣。南船北馬。昔昔往來。而陸輸海運。仍從舊轍。尙未足以促群治之進也。及劉銘傳任巡撫。乃立富強之策。購輪船。築鐵路。設郵遞。通電綫。經營布置。面目一新。惜功未全成。而解任去。寧不可恨。然

銘傳之功。固宜特書而不容泯者。記曰。登高自卑。行遠自邇。今試著於篇。曰陸運。曰海運。曰郵電。而燈臺附焉。

陸運

臺灣當鄭氏之時。統治僅及承天半線以北。尙委荒蕪。唯巡防一至而已。清人得臺。沿用舊法。置驛戍兵。漸及北鄙。康熙三十六年。仁和郁永河始至北投探礦。其時斗六門以上。猶是未闢之地也。中葉以後。至者日多。南達琅璫。北及三貂。而臺東之遠。且有至焉。然自極南以至極北。計程幾八百里。行者須十三四日。急亦八九日。而溪流廣漠。每逢大水。阻遏不前。或至浹旬不渡。且臺之陸運。僅藉人力。未曾以車馬往來。其駕牛車者。但爲載糖輪穀之用。日行二三十里。牛車之制。夾以兩輪。輪徑幾二丈。每輛可載十石。笨重難行。其有溪流者。則多用筏焉。臺人謂之渡。曰官渡。由官司之。不取其賃。曰義渡。由鄉司之。而收其稅。以充善舉。或爲寺廟香火。請官准給。曰私渡。由民司之。以載客貨。而時有勒索之弊。有司示禁。其風稍息。溪之小者。多架竹橋。或積石爲杠。深山大谷中。則多縛藤橋。兩旁繫於巨樹。長十數丈。人行其上。如步虛空。搖蕩殊甚。懦者至不敢過。然山居谷飲之民。趨之若夷。習險故也。近則多附

鐵線行者便之。臺地無車。故用轎。轎制略同漳泉。日行可五六十里。漢書淮南王諫伐南粵。謂乘轎踰嶺。其時南粵之道路未治。猶臺灣也。同治十三年。欽差大臣沈葆楨奏請開山撫番。以總兵吳光亮帥中軍。同知袁聞柝帥南軍。提督羅大春帥北軍。分兵三路而入。自前山以達後山。測地繪圖。建標計里。而獸蹄鳥跡之區。始爲行旅往來之道矣。葆楨之疏曰。南路一帶。自九月間。袁聞柝率綏靖一軍。越崑崙坳而東。張其光隨派副將李光領前隊。繼之。十月初一日。李營至坳東。袁聞柝乃拔營前進。自崑崙坳至諸也葛。計程不過數十里。而荒險異常。上崖懸升。下壑胥墜。山皆北向。日光不到。古木慘碧。陰風怒號。相顧失色。不能不中途暫駐。以待後隊之來。當袁聞柝駐營諸也葛之日。正張其光內埔辦理兇番之時。有老鴉石者。崑崙坳之西境也。初八日。張其光左營有勇丁五人。暮經該處。突有數番殺傷二人。都司張欣守備周恩培等。卽派隊追趕。該番逃散無踪。隨傳內埔社頭人。查係七家蛋社兇番。二十四日。參將周善初出哨雙溪。途見無首勇丁橫臥血漬。旋見兇番多人。執械狂竄。鷹勇追之。適周恩培出哨橫截坡前。槍斃其一。擒其三。餘悉散走。俱爲陳阿修社番。卽將三人就地正法。二十日。都司張朝光率兩哨營於大石巖。都司張天德亦率隊至諸也葛。袁聞柝乃得

拔營前赴卑南。諸葛以下地略平坦。然榛蕪未剪。焚萊伐木。頗費人功。聞柝露宿空山。染病甚重。輿疾率旅。逕抵卑南。張天德一軍亦已趨紮大貓裡。與之犄角。辰下卑南一帶。業已開通。崑崙坳左近。雖有兇番出沒。已分別懲儆。諒無敢生心。惟山道險遠。糧運殊艱。而卑南一帶海口。波濤拍岸。船不能泊。自內埔至卑南。均已派營分布。聲勢尙能聯絡。此南路近日開山之情形也。臺北一帶。提臣羅大春自九月十八日。派都司陳光華爲首隊。守備李英千總。王得凱爲次隊。游擊李得升爲三隊。前赴新城。別遣軍功陳輝煌率兩哨。赴大清水溪。總兵戴德祥以三哨紮大南澳。二哨紮大濁水溪。時正風雨連山。諸軍阻不能進。二十五日天晴。陳輝煌先至大濁水溪。旋有兇番抗拒。擊斃二人。遂卽走散。李得升、李英、陳光華等踵至。會勘形勢。近溪荒壤。周圍約寬數十里。惟地皆砂石。不及大南澳之膏腴。溪岸南北約距三十餘丈。波流陡急。副將周維光等連日趕造正河支河水橋各一。工程旣竣。各軍乃得越溪而前。自大濁水溪以往。前者曰小清水溪。後者曰大清水溪。十月初八日。陳光華一營紮小清水。而陳輝煌等進紮大清水。卽有新城通事李阿隆等率太魯閣番目十二人來迎。願爲嚮導。隨至新城。營於溪東。又有符吻、豆蘭等社番目來迎。我軍遂進駐奇萊花蓮港之北。爲

後山橫走秀姑巒之道。自蘇澳至新城。計山路二萬七千餘丈。自新城至花蓮港。計平路九千餘丈。統計二百里有奇。而沿途碉堡。除蘇澳至大南澳已設者不計外。應添建十有二處。均已興工。惟大南澳至大濁水溪一帶。兇番充斥。狙殺行人。乃於大南澳山腰。再闢一路。旁通新城。一以避海濱懸崖之險。一以塞兇番歧出之途。經派千總馮安國帶勇往辦。涉溪五重。方開十餘里。十一月十一十三等日。正在開路。突有兇番千餘。分伏放槍。我軍竭力抵敵。擊斃四人始退。而我軍陣亡者四人。傷者十八人。十五日。行至崇山之麓。我兵正在峽中開鑿。忽聞槍聲四起。抵禦兩時。至者愈多。黃明厚馮安國以該番傾社而至。其中必虛。分兵繞擣。闌其無人。惟見新舊髑髏。每藁或數十顆。或百餘顆。乘風縱火。燬藁十數。陣番始散。是日計亡兵勇四名。重傷二十名。其駐大濁水溪之勇。由小南澳運糧而歸。於十三日。途過石壁。突遇兇番蜂擁包抄。陣亡二人。溺死四人。重傷一人。經守備朱榮彪馳隊赴救。始各駭散。羅大春以番族肆擾。難疏提防。而山地遼濶。不敷分布。飛函商請添兵。臣等卽檄駐彰化之宣義左右兩軍馳赴。日內可到。惟新城奇萊一帶。應如何設立營汛。建造墩臺。俟羅大春親至相度。再籌布置。此北路近日開山之情形也。又曰。羅大春以本年正月初五日。自蘇澳起程。

初九日。至新城。履勘三層城馬隣溪等處。旁繞加禮宛南勢。直抵花蓮港之北。中界得其黎。得其黎以北百四十里。山道崎嶇。沙洲間之。而大濁水大小清水一帶。峭壁插雲。陡趾浸海。怒濤上擊。眩目驚心。軍行束馬。捫壁而過。尤稱險絕。以南六十里。則皆平地。背山面海。如悉墾種。非無良田。然地曠人稀。新城漢民僅三十餘戶。外盡番社。自大濁水至三層城。依山之番。統名太魯閣。曰九宛。曰寔仔眼。曰龜女。曰女沙。曰符吻。曰崙頂。曰寔空。曰寔亞八眼。凡八社。憑高恃險。野性靡常。奇萊平埔之番。居鯉浪港之北者。曰加禮宛。曰竹仔林。曰武暖。曰七結仔。曰談仔秉。曰瑤歌。凡六社。統名加禮宛番。其性畏強欺弱。而居鯉浪港之南者。曰根老爺。曰匏干。曰薄薄。曰斗難。曰七脚川。曰理劉。曰脂厝。凡七社。統名南勢番。男女共七千七百有七人。雖悉就撫。而薄薄理劉二社。既順復。武除薄薄能羹鹽。加禮宛頗耕種。餘則茄毛飲血。叛復不常。時當防範。他日建城之地。宜在奇萊。若新城三層馬鄰鯉浪。不過營汎之區。然必截大清水以南。隸奇萊。以北隸大南澳。方足以資控制。羅大春自率大隊入新城。添設礮堡。該番驟生疑慮。呼聚悍黨。晝則伏莽。夜則撲礮。疊經奮擊。時有斬獲。自蘇澳之五里亭起。至秀姑巒之鵠子埔止。計地三百四五十里。擬分五段。沿途建礮三十有二。各派營哨屯

之。俾得一氣聯絡。卽以宣義左營駐三層城。策應鷓子埔以北。宣義右營駐加禮宛。策應鷓子埔以南。此花蓮港以北籌辦之情形也。其南爲走秀姑巒之道。固木瓜番游獵之場也。登高一望。平沙無垠。茅葦盈丈。人跡不到。該番兇悍不亞斗史。故沃壤曠如。南北溪道濶及三十餘丈。欲造木橋。苦無巨材。乃先建支河一道。陳輝煌業率所部。結筏以濟。直趨吳全城。距秀姑巒祇數十里。卽有成廣澳番目來營乞撫。別有大巴壠社馬達庵社皆近附強番。亦就撫。平埔之番。聞已盡此。平埔旣附。以之專圖高山。事勢較易。此花蓮港以南籌辦之情形也。中路原派前南澳鎮總兵吳光亮帶兩營駐集集埔一帶。嗣經臣等奏派臺灣道夏獻綸督理開山撫番諸事。吳光亮以本年正月初九日。率勇由林圯埔社蔡分開兩路。至大坪頂。合爲一路。進向大水窟。至頂城。計開七千八百三十五丈有奇。二月初七日復開工。直抵鳳凰山麓。躋半山。越平溪。經大坵田。跨扒不坑等處。而入茅埔。又開三千七百七十五丈有奇。兩處凡建塘防八所。沿途橋道溝渠木圍宿站俱漸興修。分派兵勇。自集集至社蔡大水窟大坵田茅埔南仔脚萬東埔各隘。逐節配駐。并招撫水裡沈鹿等三十九社。男女七千二百九十有二人。現方循途漸入。斬棘披榛。以出秀姑巒之背。倘能因勢開通。將與北路諸軍聯爲

一氣。此又中路一帶開山之情形也。又曰。吳光亮以三月初九日起。至四月初八日止。自茅埔越紅魁頭。經頭社仔坪。過南仔脚萬。至合水。計開四千六百八十丈。遞建塘坊四。營壘一。茶亭木圍公所各二。以便往來。自初九日。至於五月初八。大雨兼旬。工程稍滯。然自合水歷東埔社中。走霜山。至東埔坑頭。又開三千七百九十丈。公所兵房隨地建置。當再陸續前進。別以人工從牛輻轆旁開一道。側接茅埔。俾得分達埔裡集社。蒙南投各處。以便商旅時通。於是中路自東埔坑頭。越八通關而過。爲群山之最高者。與臺東秀姑巒對峙。氣象雄偉。喬木蔽天。亘古以來。不通人跡。光亮名之。摩崖刻字。至今尙存。過關而東。爲雉公關。爲先鋒印。爲雷風洞。地皆險峻。遂經黃祈山。以光緒元年冬十一月。至璞石閣。而南路自恒春之四林格。經牡丹灣吧壘。衛卑南。竟而至大莊。北路自宜蘭之蘇澳。經新城花蓮港。而至大巴壘。均以是年秋竣工。南北相通。東西可達。理番開墾。爲之一進。是役開路八百五十有九里。爲時幾一載。而經費不過三萬餘圓。多藉兵勇之力。然以山谷深峻。瘴癘披猖。生番剽殺。頗多損失。而乃臨危遇險。不屈不撓。困苦備嘗。奮邁前進。以闢此曠古未闢之道。可謂勞矣。於是葆楨奏請獎叙。羅大春以革職提督。開復原官。吳光亮袁聞柝各進一級。餘亦嘉賞。光緒七

年。福建巡撫岑毓英巡臺。以大甲溪爲南北要道。溪大流急。每苦難涉。乃勸紳富捐款。助以官帑。築隄架橋。以鐵桶積石爲礎。橋長百五十丈。費款二十萬圓。越年六月十七八日。山水驟漲。奔流挾木而下。橋礎斷絕。隄潰六百丈。巡道劉璈擬脩。飭臺北府查勘。費須數萬圓。璈再集紳富議捐。衆以溪險流大。恐無益。其時秋漲方盛。驟難施工。遂止。璈以臺南爲首善之區。而道路湫隘。市廛櫛比。非以安民居而興商務也。乃議開運河。導水入城。東引五空橋之水。南引二層行之水。北引柴頭港之水。以出於海。宣積穢。利運輸。河之兩旁。改築大道。植樹列屋。爲郡之表。前時安平之水。可達郡中。其船至大井頭街。而河道漸淤。水多溷濁。故璈欲疏之。而郡人以折屋多損。持不可。其議又止。安平距郡治六里。中隔帶水。往來乘舟。璈命防兵築之。旁樹榕柳。於是始有馬車。行者稱便。十三年。巡道陳鳴志鎮海後營副將張兆連合請巡撫劉銘傳。別闢後山之路。自彰化之集集。以達臺東之水尾。尅期進工。東西並舉。自正月以至三月。大功告成。而前後山之連絡較縮矣。先是光緒六年。銘傳上疏。請造鐵路。以圖自強。略曰。臣嘗私患竊歎。以爲失今不圖自強。後雖欲爲。終恐無及。夫自強之道。練兵製器。固宜次第舉行。然其機括莫急於築造鐵路。夫鐵路之利於漕務賑務商務鑛務釐捐行旅。

者不遑殫述。而於用兵之道尤急不可緩之圖也。查中國要道。南路宜開二條。一自清江經山東。一自漢口經河南。俱達京師。北路宜自京師。東通盛京。西通甘肅。惟是經費浩繁。急切未能盡舉。擬請先修清江至京師一路。與本年議修之電線相爲表裡。事關軍國安危。繁之若輾轉遷延。視爲緩圖。徒託空言。永無自強之日矣。旨下內外大臣議奏。李鴻章劉坤一均贊其議。而駐德公使劉錫鴻方歸自歐洲。亟言不可議遂寢。及銘傳任臺灣巡撫。十二年奏請試辦鐵路。略曰。臺灣旣爲我國海防之要。當此建省之時。宜速振興殖產。招徠工商。以爲富強之計。而欲行其事。必先利其器。曩者奏派革職道張鴻祿候補同知李彤恩等。考察南洋商務。今旣歸臺復命。新設輪船公司。以往來淡水新嘉坡西貢等港。然以臺灣內地運輸未便。遂致沿山貨物不能配至港口。據該委員稟稱。南洋僑商素聞臺灣土地肥沃。出產繁盛。官府又竭力鼓勵。多欲來臺經營。然荆棘滿地。道路崎嶇。欲期工商聚集。貿易勃興。寔非易事。擬請築造鐵路。起自基隆。以達臺北。與各港連絡。不特可以振全臺之商務。而亦大有裨於海防也。又據該委員等稟請。當此國家財政困難之秋。官辦非易。請招募商款壹百萬兩。發行鐵路股票。以其得利。攤還母息。則不動公款。而鐵路可成。誠計之善者也。臣愚以爲

臺灣不獨海外之孤島。寔爲東南七省之屏蔽。將來通商惠工。開闢利源。全臺經費。足以自給。而臺北駐防之兵。調轉自在。永保巖疆。如練軍清賦。以及架設電線。次第舉辦。本年內外。當可陸續告竣。至如築造鐵路。臣已深信不疑。唯以經費之故。躊躇至今。茲幸該委員等。請以商款措辦。唯由官府保護。將來坐收其利。其議甚善。似可舉行。至如築造鐵路之利。除驛遞。開墾。商務之外。尙有益於現今臺事者三。請略陳之。臺灣四面皆海。防不勝防。基隆。滬尾。安平。旗後。四口。現雖建造礮臺。駐兵防守。而新竹。彰化。沿海一帶。港汊分歧。一旦有事。敵兵上陸。南北隔絕。全臺立危。若築造鐵路。則調撥軍隊。朝發夕至。是其便於海防者一也。臺灣旣建一省。選擇省城。控制南北。其地襟山帶海。最爲適當。然距海較遠。將來建築衙署。廟宇。鳩工治材。運輸不便。若鐵路開通。則商業可致繁盛。是其便於建省者二也。自臺北至臺南。計程六百餘里。中多巨溪。春夏之際。山水暴漲。行旅遏絕。臣今擬於大小各溪。上流窄處。架設橋梁。通算工費。須銀三十萬兩。今若許准建築鐵路。則此橋梁二十餘條。一齊興工。可爲朝廷節省巨款。是其便於臺灣工事者三也。疏上下旨照議。於是設鐵路總局於臺北。以記名提督劉朝幹爲總辦。從事招股。應者甚多。以德人墨爾溪爲監督。英人馬禮遜爲工程長。

測量路線。自臺北至基隆二十英里。是年六月。自大稻埕起工。以余得昌所帶昌字四營爲工役。中經獅球嶺。開鑿墜道。長十八鎖。翌年。由臺北而南。涉淡水河。架橋以渡。長千五百二十英尺。以時啓閉。下通舟楫。越龜崙嶺。經桃園中壢大湖口。而至新竹。計長四十二英里。中有巨橋三。如紅毛田溪之七百五十英尺。鳳山崎溪之六百八十英尺。荳仔埔溪之六百十七英尺。此工事之難者。而臺北至基隆以十七年十月開車。臺北至新竹則至十九年正月告竣。路廣十一二尺。軌條濶三尺六寸。重三十六封度。其機關車十五噸。或二十五噸。列號之外。又錫以名。曰騰雲。曰御風。曰超塵。曰掣電。言其速也。分上下兩等。設備頗簡。每車長約二丈。貨車略同。凡設車站十六處。均以土造。曰火車房。其驛長曰司事。顧當草創之時。站中不設信號機。亦無昇降場。其始每日開車六次。後乃減爲四次。然途中遇車。隨時可以搭乘。故時刻不定。每逢大稻埕致祭城隍之日。臨時增駛。以便往來。而歲首臘底以及五節均停車焉。乘車之費。自臺北至基隆者四角四尖。而至新竹者八角六尖。上等倍之。每里約當二尖一釐。貨物則擔抵一人。平均一日之客。臺北基隆五百人。臺北新竹四百人。顧是時民用未慣。物產未盛。而基隆河之水尙深。舟運較廉。鐵道未足與競。以是入款尙少。每月搭客一

萬六千圓。貨物四千圓。收支不足相償。然銘傳又欲達至南路。以速全臺交通。而自新竹以南。溪多且廣。非可易過。乃命德國工師測量大安大甲兩溪。籌架鐵橋。其策果成。臺人之福也。當是時。銘傳以勵行新政。清賦加稅。民怨其苛。而政府又多方掣肘。物議沸騰。工事遲進。十七年。遂稱病辭職。邵友濂繼之。疏言經營鐵路之難。略曰。臣查臺灣爲海外孤島。港汊分歧。欲爲居中控制之策。固宜建築鐵路。然經營七年之久。僅得臺北竣工。從前籌劃不爲不善。而卒未能相副。何也。臺灣土地鬆浮。田園漫衍。培築不密。隨見崩塌。又或坡陀參差。巒壑倚伏。曲直不定。高下靡常。北穿獅嶺。洞墜百尋。南度龜崙。坂踰九折。路工之難如此。又或谿澗縱橫。宜臨宜束。水流湍急。因勢築防。轟址重淵。構基陡岸。洪波方迅。壘石旋傾。積沙旣深。插樁亦陷。橋梁之難。又如彼。加以工銀料價。共須倍加。此後增進。計難逆料。奉旨批准。而臺灣鐵路爲之一挫矣。顧自基隆至新竹。計程六十二英里。七十鎖。用款壹百二十九萬五千九百六十兩。每英里僅二萬六千五百七十五圓。較之他國所築。工費較省。蓋以使用兵役之故。而所雇路工。其資亦廉。每名日給三角。工師多用粵人。如淡水鐵橋。則張家德所築者。技亦巧矣。鐵路所過之地。大小橋梁七十四。溝渠五百六十八。其軌條雖購之英國。而枕木

則皆用臺產。故別設伐木局。以統領林朝棟辦其事。入山採取。凡松一片為價三角五尖。樟四角五尖。由溪運往。而樟較耐用。且取之不盡。友濂既奏准停工。乃由福建藩庫借撥壹百零四萬兩。贖歸官辦。裁伐木局。併鐵路局於通商。以縮小之。而臺灣鐵路遂不進。

前山道里表

自恒春^{十五里}柴城^{十八里}柴藁^{十五里}楓港^{十五里}枋山^{十三里}嘉鹿塘^{四里}率芒溪^{五里}枋藁^{十二里}蘆竹塢

^{十四里}東港^{七里}王爺宮^{十六里}芎蕉脚^{八里}鳳山東門

自鳳山^{九里}大將廟^{十一里}楠梓坑^{十里}橋仔頭^{十里}阿公店^{二十里}大湖^{七里}二層行溪^{十里}大林莊

三里 安平南門

自安平^{三里}柴頭港^{四里}三崁店^{十里}看西街^{十五里}曾文溪^{九里}茅港尾^{十五里}火燒店^{十五里}下茄苳

莊^{十八里}水堀頭^{十二里}嘉義西門

自嘉義^{五里}牛稠溪^{八里}打猫街^{七里}大莆林^{十里}他里霧^{十二里}虎尾溪^{五里}刺桐巷^{二十里}寶斗街

^{十五里}一抱竹莊^{十二里}茄苳莊^{八里}彰化南門^{由他里霧別行十里至雲林城}

自彰化五里 茄苳脚七里 大肚街十五里 沙轆街八里 牛罵頭八里 大甲溪五里 溪北五里 大甲街十里

房裡街十里 吞霄里二十里 後壠里十五里 中港里十七里 香山八里 新竹西門

自新竹里十三里 鳳山崎十里 大湖口十五里 楊梅壠七里 土牛溝十三里 中壠新街十五里 桃仔園十里 龜崙

嶺十五里 新莊里十二里 淡水南門

自淡水里十二里 錫口里十五里 水返脚里十六里 八堵九里 暖暖街二十五里 三爪仔莊八里 龍潭堵十五里 三貂嶺二十

里 五三貂溪

計七百九十三里

後山道里表

自三貂溪九里 牡丹坑八里 草嶺頭十五里 大里簡二十里 北關九里 頭圍十五里 礁溪十一里 宜蘭北門

自宜蘭里十五里 溪洲渡五里 羅東里十二里 猴猴莊里十八里 蘇澳里二十里 東澳里三十里 大南澳五里 大濁水二十里 大

清水三十里 得其黎十里 新城五十里 花蓮港

自花蓮港二十里 吳全城三十里 大巴壠二十里 周墾社二十里 水尾三里 璞石閣四里 石牌莊五里 卑南草

蔡五十卑南寶桑

自卑南二十里 知本二十五里 大猫裡三十里 千仔關二十里 巴聖衛十里 阿郎壹溪二十里 牡丹灣二十里 八瑤灣二十里 萬里得二十里 射麻裡十三里 恒春東門 計八百零八里

前山至後山道里表一

自林圯埔十七里 大平頂七里 大水窟七里 鳳凰山麓十八里 茅埔十八里 南仔脚十九里 東埔社十里 東埔坑十五里 鐵門洞十八里 八通關十三里 八母坑十八里 雙峰仞九里 大崙溪二十里 雷風洞三十里 打淋社四十里 璞石閣

計二百六十五里

前山至後山道里表二

自楓港十里 射不力十五里 雙溪口二十里 大雲頂十五里 英華嶺二十里 阿郎壹溪十里 巴聖衛二十里 千仔關二十里 千仔崙十三里 大猫裡二十里 知本二十里 卑南

計二百三十六里

前山至後山道里表三

自下淡水^{十二里} 赤山^{十五里} 雙溪口^{二十里} 崑崙坳^{十里} 大石巖^{四十里} 諸也葛^{二十里} 千仔崙^{十三里} 大猫裡

^{二十里}知本^{二十里} 卑南^{五里}

計一百七十五里

前山至後山道里表四

自艋舺^{八里} 梘仔尾^{九里} 樟脚^{六里} 深坑^{十二里} 崙仔洋^{十八里} 銃櫃^{十一里} 頭圍^{十五里} 礁溪^{十五里} 宜蘭北

門

計一百零三里

中路道里表

自鹿港^{十二里} 馬鳴山^{五里} 三塊厝^{三里} 彰化西門^{五里} 大竹圍^{十里} 內快^{十里} 本縣莊^{十里} 營盤口

^{五里}南投^{二十里} 集集街^{十里} 風箏口^{二十里} 頭社^{十里} 水社^{十里} 新城^{十里} 白葉嶺^{十里} 埔里社

計一百五十里

航運

荷蘭爲海上之霸。侵略臺灣。以拓商務。夾板之利。遠暨東西。而以安平爲碇泊之口。其時港道深廣。可至熱蘭遮城。小者且及赤嵌樓下。樓固海中。小島也。安平之北。謂之臺江。舳艫千艘。聚會於此。今則變爲平陸矣。荷人旣據安平。駐兵戍守。開鑿運河。至柴頭港。又北至看西。以通蕭壠。蔴荳諸社。故道猶存。則今之鹽水溪也。安平之南。爲七鯤身。港汊紛錯。今亦淤爲平陸矣。當是時。航運之利。西至閩粵。東及日本。南遍爪哇。安平一口。遂爲交通之紐矣。延平克臺。亦恃航運。故能橫厲重洋。以憑天塹。而清人莫敢抗。永歷十八年。英人來請通商。二十年。呂宋總督派使來聘。二十八年。命戶都事李德赴日本。又造巨舶。往賈暹羅。呂宋。葛拉巴。其後輒相貿易。皆有航運之利。當是時。清廷方嚴海禁。凡入海者。殺無赦。而閩粵人之住南嶠者。已數百萬人。均以臺灣爲內府。故得獨操通海之利。清人來後。雖開海禁。而商船渡臺者。須領照。由廈防廳司之。至則臺防同知驗之。其船皆漳泉富人所造。有糖船。橫洋船。材堅而巨。大者可載六七千石。南至南洋。北暨寧波。上海。天津。牛莊。販運之利。頗操其益。故郡中

商務一時稱盛。其後派運臺米。配載班兵。船戶苦之。積穀日多。遂有雇船官運之議。語在糧運志。續以蔡牽之亂。俶擾海上。凡十數年。商船多毀。於是至者日少。而漁船愈衆。然漁船輕小。向不配差。口員照例僅查出入。積滯公文。數月不至。道光三十一年。巡道徐宗幹議定。漁船兼配公文。以免阻遏。前時郡中有太平船二艘。專以運送兵丁骸骨。并附客樞。招募郊商舉充。廢棄殆將十載。至是議興之。通商以後。外貨紛至。於是始有輪船。設船政廳以理之。同治七年十一月二十二日。總理各國事務衙門咨稱。本年九月初十日。據赫總稅務司將引水章程十五條。改爲引水新章十條。申送本衙門。於九月十五日。照會布俄英法美日各國駐京大臣去後。除日本國未接照復外。茲據布俄英法美各國駐京大臣先後照復。允飭各口領事試辨等因前來。除札知赫總稅務司遵照外。相應抄錄總稅務司所改章程十條。咨行查照。總督接後。卽飭巡道遵辨。於是復訂臺灣各口引水分章十條。與專條略有更改。十年。英船海輪始定臺灣航路。以往來安平淡水廈門汕頭香港。每兩星期一回。其船尙小。載重僅二百七十七噸。而貨客繁夥。獲利厚。乃設得忌利士公司。以爹利士航行香油廈安科摩沙海龍海門行於汕廈淡水。而臺灣航業遂爲所攬矣。光緒七年。巡撫岑毓英巡臺後。以

臺地孤懸海外。非舟莫渡。商諸船政大臣。派撥琛航永保兩輪船。循環來往。以速文報。并准商人配貨。是爲官辦之船。其搭客自安平至廈門。或自基隆滬尾艋舺至福州。每人三圓。自安平至福州及由臺北至廈門者五圓。又自臺南至臺北者亦三圓。貨物之餼。則照招商局所定。酌減二成。一時頗殺外船之利。其後又增伏波萬年清兩船。以速郵遞。而載煤至上海者亦較多。法人之役。沿海被封。出入杜絕。唯帆船時得偷渡。然每遭擊沉。往來殊險。十一年巡撫劉銘傳以飛捷威利萬年清航行臺灣及中國各港。十二年設招商局於新嘉坡。又以三十二萬兩購駕時斯美兩船。往來上海香港。遠至新嘉坡西貢呂宋。而外船之載糖茶者多至日本美國。太古輪船亦時一往來。於是航業漸盛。先是光緒二年。帆船之至淡水者百一十一艘。而輪船僅四十四艘。至十六年。則帆船減爲八艘。而輪船增至百二十六艘。計有十七萬七千五百餘噸。蓋自銘傳治臺以後。物產大興。商務日盛。而航運亦受其利。初銘傳既築鐵路。籌疏基隆港。以連陸運。十三年。以林維源爲總辦。測量港道。擬自牛稠港至蚵壳港。括壘嶼於中。填平海岸。以建車站。又自小基隆至壘嶼。新築市廛。建埠頭。以接車站。其中按造鐵橋。長十有二丈。爲車馬往來之道。惜功尙未竟。而解任去矣。旗後爲臺南商埠。港道稍

隘。歷任稅務司疊請開鑿。巡撫丁日昌亦奏請開浚。兵備道夏獻綸稟請遵辦。而日昌以開浚之時。慮有三難。港底有石一也。形勢有碍二也。經費太巨三也。獻綸復曰。開港與挖煤不同。祇將浮沙挖去。并無石隔。一免慮也。地方形勢。既建礮臺。可以防守。二免慮也。經費一途。可由臺餉提用。似可裕如。三免慮也。且通商以來。中外遭風船隻。時有所聞。如不開浚。設有洋船遭風之事。藉此要求。反落後着。故獻綸以爲開之便。未行而獻綸卒。張夢元接任。仍不欲辦。遂以籌款未定。照會稅務司。并稟總理衙門。以前開浚估價五萬三千餘圓。續估二十萬四千餘圓。爲數太巨。擬照吳淞之例暫止。九年。安平英領事霍必瀾以港道日塞。易致膠舟。遞年險惡。現有浚港之船。爲價不上五千圓。願自發價疏浚。或由中國自辦。不從。及銘傳任巡撫。十六年夏五月。命英人馬禮遜查勘。將大興工事。以張貿易。未行而銘傳去矣。安平至府之運河。例由三郊自浚。數十年來。日形淤塞。而安平港口。又以沙汕之阻。自夏徂秋。波濤澎湃。輪船不能入口。多泊於四草湖外。一遭大風。駛避旗後。遠或繫碇澎湖。貨物起落。以是困難。商務之興。爲之頓挫。夫臺灣處大海之中。又有澎湖隔之。黑潮所經。其流甚急。澎之四圍多礁石。舟觸輒破。故自通商以來。輪船遭難者。凡數十次。雖有巡洋哨船以爲救護。而

事起倉卒。慮有未周。光緒二年夏六月。福建巡撫札飭各廳縣。選舉沿海地甲頭目。分擇地段。責成保護中外船隻。在洋遭風之事。并頒行圖冊章程告示。委員前往各海口確查。由各廳縣給發號旗。以爲憑准。俾其督率鄉民。寔力救護。十年秋八月。英船某自旗後遭風。漂至草湖。時適法人犯臺。沿海戒嚴。莊人見之。以爲敵船也者。持械禦之。躍登船上。刃傷船長。并奪貨物。鹿港同知鄒鴻漸趣往彈壓。北路營游擊郭發祥署彰化知縣蔡祥麟亦至。救其船人。追還所失。兵備道陳鳴志乃與領事霍必瀾商議賠款。而船主不從。旋委鳳山知縣李嘉棠再與領事交涉。往返數次。以七兌銀七千圓賠之。事始息。十一年夏六月。琉球漁人陳文達等十二人。遭風至基隆。莊人救之。給以路費。并修船費六圓。送之歸。十二月。復有日本駁船漂至後山高士佛。恒春知縣派人救之。資遣回國。十四年十一月。英船威定在洋遭難。澎湖右營都司李培林率兵救起五十餘人。十八年八月。澎湖大風。海水群飛。英船卜爾克自上海航行香港。觸礁沒。溺斃洋人一百三十餘名。澎湖官民赴救。得二十三名。載至府治。知府唐贊袞禮之。水師總兵王芝生餽金三百。英人大喜。救護之人各有賞給。初紐西蘭海上保險公司來臺開辦保險事務。委瑞興洋行理之。已而華洋保險公司亦分設南北。商務日

興而航。運往來亦日盛。

郵電

置郵傳命。其來久矣。明制十里設一鋪。每鋪設鋪長一名。鋪兵要路十名。僻路四五名。卽於附近有丁力田糧五斗以上二石以下點充。必須少壯正身。每鋪設十二時晷一個。以驗時刻。鋪首置牌門一座。牌額一方。簿歷二本。鋪兵各備夾板一副。鈴棒一副。纓鎗一把。棍一根。回歷一本。凡遞送公文。照古法。以一晝夜合爲一百刻。每三刻行一鋪。晝夜須行三百里。公文一到。不問多少。隨時遞送。無分晝夜。鳴鈴疾走。以交前鋪。卽於回歷附寫到鋪時刻。以憑稽考。鄭氏因之。南北各設鋪兵。故臺人謂十里爲一鋪。清代沿用明制。乾隆二十一年。乃裁驛丞。而臺灣以遠隔重洋。向未設立。僅置鋪兵。以事遞送。軍務之時。兼用塘兵。顧此爲公家之用。民間私信必覓長足。以寄。市鎮繁盛之區。或設信局。以代傳命。信資之數。按道爲差。而每多阻滯。或致遺失。不能朝發夕至也。同治十三年。牡丹之役。欽差大臣沈葆楨治軍臺南。奏請架設電線。以速軍情。乃由丹墨國人德勒耶攬辦。光緒三年。巡撫丁日昌議由臺南府城至鳳山之旗後。先行開辦。飭游擊沈國先率福州船政電報學堂學生蘇汝灼等。以七月

初十日自郡起工。九月初五日告成。凡二線。一自郡治達安平。一達旗後。計長九十五里。是爲南路電線之始。十年。法人來犯。軍書旁午。巡撫劉銘傳以南北電報未通。不足以輔戎機。十二年。飭通商局委員李彤恩與上海德商泰東洋行立約攬辦。凡兩線。一自臺北郡治分歧而至滬尾基隆。一自臺南與舊線接。計長八百里。而於新竹苗栗彰化雲林嘉義各設局辦理。十四年四月竣工。以候補道張維卿爲總辦。是爲南北交通之線。十三年八月。又自淡水沉設至福州之芭蕉島。而安平亦接至澎湖。是月二十一日。輪船飛捷自福州起工。翌日達滬尾。與陸線連。乃赴澎湖。以接安平。海陸兩線既成。自臺灣可通福州。遠而至於東西各國。莫不瞬息萬里。而臺灣不至孤立矣。當是時。銘傳既築鐵路以利交通。又以鋪遞遲緩。奏請改設郵政。十四年置郵政局於臺北。各地皆設分局。郵票兩種。一爲官用。不徵其費。一爲民用。按站計費。每站長百里。凡信一函重二錢以內者。徵錢二十。付郵之時。交納。自臺南至臺北。凡十三站。每函須二百六十文。郵路以外之地。別加其費。其發中國外洋者。則以輪船代遞。又有郵船兩艘。曰南通。曰飛捷。按期往來於上海福州及臺之各港。以遞送之。唯郵票之式。彫印頗粗。上繪一龍。國徽也。下繪一馬。驛也。所以示中國之郵傳也。十五年十一月。奏

頒臺灣郵政章程。歸巡撫管理。以候補道任其事。每年入款達一萬兩。而民間信局仍開設。頗奪公家之利。使得逐漸更改。臻於至善。必有可觀。是年又設電報學堂。聘西洋教習。以授臺人子弟。而英國醫士梅威令。旣在旗後。自設醫館。傳授醫術。十六年九月。復請架設電話。以廣學業。通商局不從。及邵友濂至。而電報學堂亦廢矣。乙未之役。劉永福駐臺南。安平稅務司麥嘉林。請設郵政。其制略同前時。半取歐州成法。以稅務司兼辦之。票印一虎。民主國之章也。凡三種。分爲三十文。五十文。一百文。以兵遞之。當是時。戎馬倥偬。私信斷絕。故民間多用。乃未幾而臺南亦陷。其制遂止。

燈臺

臺灣爲南海之邦。而東西洋交通之道也。船舶往來。以是爲的。然而礁石隱現。風濤澎湃。稍一不慎。舟輒破碎。往時船舶自厦來南。過澎湖後。遙望王城之老榕。以取航程。漸近漸現。城在安平海隅。址高而望遠。荷人所建也。然當天昏月黑時。四顧茫茫。東西莫辨。則於巡道署內立一燈竿。高可三丈餘。每夜燃燈。用以照遠。是爲燈臺之濫觴。舊例船舶出入。巡道管之。故以是爲航路之準。雍乾之間。商務大盛。帆檣相接。北至天津牛莊。南至暹羅呂宋。皆以澎

湖爲門戶。而澎湖錯立大海。群島相望。沉舟之禍。時有所聞。乾隆三十四年。臺灣府知府蔣元樞檄澎湖通判謝維祺。擇地於西嶼之杙仔尾。建造石塔七級。座約五丈。每夜燃燈。光照海上。是爲燈塔之始。道光八年。修之。光緒元年。乃倣洋式爲燈臺。先是同治六年三月。美國商船那威號遭風。至鳳山之鷺鸞鼻。觸礁而沒。事後美領事請建造燈臺。以利航海。政府許之。而未設也。己而日本來討牡丹社番。駐軍瑯瑤。亦請速建。八年。聘英人爲工師。費款七萬兩。規模宏大。光照二十餘海里。臺成。照會各國。以地邇番界。駐兵守之。

安平燈臺 在安平海關之側。以磚建之。形圓而色白。距水面七丈七尺。燭光三百五十燭。可照遠十四海里。每四秒發光一次。爲第六等閃光白色。光緒十七年建。

打鼓燈臺 在鳳山縣打鼓哨船頭。以石造之。爲四角形。距水面十六丈四尺。燭光三百五十燭。可照遠十海里。爲不動白色。光緒十八年建。

鷺鸞鼻燈臺 在恒春縣鷺鸞鼻莊土名船帆石之南。以石造之。形圓而色白。距水面十八丈。燭光二萬六千燭。可照遠二十餘海里。爲第一等不動白色。

淡水燈臺 在淡水海關之側。以石建之。爲四角形。色白。距水面三丈三尺。燭光一百燭。可

照遠九海里。或紅或綠。以分別之。而滬尾街上別建燈竿。火用瓦斯。色白。每二秒間發一閃光。燈高三丈五尺。距水面十四丈二尺。獨光三百五十獨。可照十五海里。均爲光緒十四年建。

西嶼燈臺 在澎湖廳西嶼。則漁翁島也。廈門航行臺灣之船。均以此爲表幟。乾隆三十四年。始建燈塔。道光八年。修之。光緒元年。改燈臺。其燈爲第四等不動白色。距水面十五丈八尺。獨光五百獨。可照遠十五海里。

臺灣通史卷二十

臺南

連雅堂

撰

糧運志

連橫曰。臺灣爲宇內輿區。土沃宜稻。初闢之時。一歲三熟。故民無饑患。鄭氏養兵七十有二鎮。諮議參軍陳永華乃申屯田之制。以足兵食。又能以其有餘。供給漳泉。以取其利。故國用無匱。清人得臺。分駐戍兵。皆調自福建。三年一換。乃賦其穀曰正供。以備福建兵糈。凡商船赴臺貿易者。須領照。準其樑頭。配載米穀。謂之臺運。其事由廈門海防同知司之。福建水陸官兵五十營。與駐防旗兵不下十萬。歲徵糧米。唯延平建寧邵汀州興化五府產米之區。足給兵食。而福州福甯泉州漳州四府則兵多米少。協濟猶不足。半給折色。督標金廈漳鎮銅山雲霄龍巖南澳諸營。且有全折者。雍正間。先後奏請半支本色。以臺灣額徵供粟內撥運。謂之兵米。嗣增戍臺兵眷米。亦以臺穀運給。於是臺灣歲運福建兵眷米穀八萬五千二

百九十七石。遇閏加運四千二百九十八石。乾隆十一年。巡撫周學健奏定分配商船。運赴各倉。此臺運之由來也。臺灣商船皆漳泉富民所造。渡海貿易。以博贏利。一時商務繁盛。故皆急公樂運。自五十九年水災之後。械鬪又起。續以蔡牽之亂。騷擾海上。軍興幾二十載。漳泉之民困焉。臺灣亦然。百貨蕭條。泛海日少。於是臺穀不能時運。而福建兵精孔亟。廳縣皆借用備儲。而倉穀空矣。商船大者載貨六七千石。小亦二三千石。定例樑頭寬二丈以上者。配運一百八十石。一丈六尺以上者。一百三十石。石給運費六分六釐。初無所苦。既而倉吏多方挑剔。遷延時日。而民貨一石運費三錢。或至六錢。多於官運者數十倍。夫誰肯樂爲哉。且臺船載貨。多赴寧波上海膠州天津。遠至盛京。然後還閩。往返數月。官穀在艙久。懼海氣蒸變。倉吏不收。故多私易銀買貨。其還也亦折色交倉。不可。乃買穀以應。官吏持以爲利。久之。遂成陋規。如江浙之漕焉。嘉慶十四年。總督方維甸以臺穀積滯。奏開八里坌港。與鹿耳門鹿港一律配運。於是鹿耳門應運四萬九千餘石。鹿港二萬二千餘石。八里坌一萬四千餘石。初部議按照樑頭。每船配運自一百石至三百石而止。乾隆三十七年。詳定糖船應配百六十石。橫洋船八十石。四十八年。又奉部議逢閏加運。及開二口之後。議定鹿耳門糖船

配三百六十石。橫洋船百八十石。鹿港之厦船亦百八十石。蚶江船百四十石。蓋以蚶船較小而八里坌漁船之渡海者亦令配運。自三十石以至八十石。然有司奉行不謹。商人又巧爲規避。而臺穀之積滯猶故也。十六年。總督汪志伊奏請自運。飭厦門蚶江兩廳封僱商船二十艘。每艘各載一二千石。照例給費。每石別給銀二分。派丞倅游守各一員監運。以三回運歸十萬石。二十二年。復僱運七萬。商人雖勉強應命。而臺灣一聞專運。米價躍貴。民食被害。彰化知縣楊桂森議請改徵折色。奏罷臺運。省議不可。鹿港盧允霞聞之曰。此奇貨也。謂所善商人。我能革陋規。衆信之。以爲謀主。設館徵各船戶錢。爲訟費。然郡中及泉厦商船未從也。二十五年。巡道葉世倬至鹿港。諭商困歸欲革之。議造官船自運。以語臺灣縣姚瑩。瑩曰。未可。臺穀歲十萬石。舟以二千爲率。當用五十艘。一艘以五千爲率。當費二十五萬圓。弁兵管駕舵工水手每舟不下數十人。歲費又數萬圓。海舟駕駛三年一修。費又數萬。而重洋風濤不測。一有沉失。舟穀兩亡。是漕艘之外。又增國家一病也。世倬疑其有私。及爲巡撫。力持前說。未及改制而去。已而趙慎軫孫爾準爲督撫。患商運不前。命臺灣府方傳穉籌之。傳穉以鹿港口門淤淺。商船不至。道光四年。乃開五條港以利出入。而是年奉旨運米十四萬。

石至天津。免配兵穀者六十艘。配運之船益少。傳稭曰。今雖極力疏通。不足運本年之額。計來歲積欠當十萬以上。勢又必需僱運。然非善策也。重洋險阻。歲有漂沉。平時配運祇百餘石。糖市倍之。失水責償。爲數無多。故行之可久。若僱船專運。每船何止十倍。設有不虞。官商難賠。雖前已三次行之。而未可恃也。昔時商本豐厚。船料堅固。今則商船薄小。沉碎較多。民間買貨千石。猶必分寄數船。以防意外。而官穀豈可不重乎。積穀十三萬。用船六七十艘。廈蚶二廳僱撥。當爲四起。或五六起。每起必有文武正副委員護送。弁兵供應犒賞。取諸四縣。賠累已甚。而內地各倉。旣失商運之利。則必多所挑駁。此累之在官也。官穀運費。每石六分六釐。較之民貨。僅爲十分之二。每船以二千石爲率。船戶僅得運銀一百餘兩。不敷費用。其船本及修整篷索桅碇之需。皆於何出。每逢僱運。行商及通港之船。皆科派津貼。而商戶仍不免賠。此累之在商也。臺灣三口。來往商船祇有此數。旣運積穀。則明年新穀必有短配。是疏積欠。反增新欠。亦非計之得者。況臺地近年米貴。一聞專運。市價忽騰。是官商旣病。復以病。民計唯有漸停新穀。折色支放。請飭廳縣查明積穀。照舊配運。其新穀悉易銀。按中平市價。每石折番銀一圓三角。分四季解至內地。有穀廳縣領回。折放兵食。內地番銀一圓可易

制錢八百餘文。以二穀一米計之。每米一斗可折放制錢二百文。俟積穀運竣。仍配新穀。再有屯積。亦可仿此而行。則免僱運之害。而臺之積穀。可清內地之倉儲。可補矣。慎軫之。而水師提督許松年以爲不可。適盧允霞入京上控。求罷商運。事下督撫議。司道乃採楊桂森之說。停止商運。請臺地供粟。半折本色。以給臺營。半收折色。每穀一石征銀一兩二錢。以給內營。卽全數劃抵臺灣兵餉。可免一領一解之煩。每年又可省運費六千餘兩。慎軫曰。閩省漳泉諸府。負山環海。田少民多。出米不敷民食。臺地產米之區。故令征收本色。運給內營兵糴。原以臺地之有餘。濟內營之不足。今如改解折色。已失立法之意。臺郡各屬征收供粟。向無半本半折之例。方守所議暫解折色一年。猶屬一時權宜之計。尙可由官酌辦。若改征半折。則臺民有穀之家較多。紛紛糶穀完銀。必有平水火耗之加。更滋流弊。是利商以病民也。更易舊章。未可草率。其再議之。於是臺灣道孔昭虔。臺灣府方傳穉。臺防同知杜邵。鹿港同知鄧傳安。淡水同知吳性誠。臺灣縣李慎彝。嘉義縣王衍慶。會議皆謂商運不可罷。臺人聞將改折。大譁。紳士咸曰。民間完納正供。已百餘年。雖今昔情形不同。私有折色。亦皆按時價之低昂。無有一定。若改征折色。每穀一石征銀一兩二錢。轉成定例。行之日久。勢必又有

加征平水火耗。受累更深。且臺民市易。皆用番餅。并無紋銀。全賴每年兵餉散布民間。紋番兩便。故錢價得平。若大餉永停。則紋銀斷絕。番餅增昂。必致民商兩病。大不便。爾準亦以改折抵餉之說。密訪於傳穉。傳穉復書曰。今之紛紛言商病者。皆務虛名。未計其寔。商船往來臺洋一次。販貨之獲利。與船戶之水脚。所得凡數千金。以數千石之船。而僅運百餘石之官穀。復給以每石六分有奇之運費。國家恤商。可謂厚矣。何病之有。所謂病者。有司之陋規爾。有國法在。罪之可也。裁之可也。若改易舊章。設有他弊。又何以處之。自古無不弊之法。利之所在。弊卽生焉。苟鑒於末流。遂并亡其本。是爲因噎廢食。烏可不察。夫商船運穀。雖以養兵。其端原於正供。臺地產穀之區。頗艱銀貨。故昔人因地定賦。有供粟而無地丁。雖有勻丁雜稅。爲數無幾。而漳泉福州兵民繁庶。產穀不足。故以有易無。運臺穀以濟各地之兵糈。發帑金以給全臺之兵餉。各得其所。民便久矣。雖近時臺屬正供不無折收。內地兵米不無折放。船戶運穀不無折交。然名存法在。每有需穀之時。猶可立備。一經改制。則內地永無得穀之期。臺地永無見銀之日。一旦需用。反費周章。其不便者一。臺屬貿易俱用番餅。官民收用紋銀。皆仰給於臺餉。給兵之後。散布民間。舍此則海外紋銀斷絕矣。其不便者二。全臺兵餉歲

發銀二十一萬一千有奇。逢閏發銀二十二萬六千有奇。又加餉銀六萬七千有奇。臺屬額征鹽課。叛產官莊雜項錢糧捐款。盡數劃扣。歷年司中尙應發銀十四五萬有奇。今以通臺運穀折價。即使年清無欠。裁十萬爾。不足抵大餉之數。設歲又歉收。民欠積累。立形支絀。海外兵餉攸關。貽誤匪細。其不便者三。自古三代不廢力役之征。國有徵發。畢出車徒馬牛。惟所用。唐定租庸調之法。史猶稱善。蓋軍國之需。不能不資民力。匪特賴以濟事也。亦陰以維持上下。使民知趨事赴功。尊君親上之義。故民安其分而忘其勞。今西北直省猶有車馬差徭。故其民情愿樸。以奉公爲分所應爾。東南諸省民俗澆偷。一切便民。猶謗其上者。不知分與義也。海船無他徭役。官使往來。皆予僱值。獨過臺配載軍士。回棹配載運穀。此二事尙有奉公之意爾。然亦有水脚之給。雖稍有賠費。亦由船戶自圖巧利。爲口員胥吏之所挾持。遂成陋規。非無故而致也。若裁去運穀。則商船自此不識奉公之義。設一旦有意外之徵發。反與嗟怨。以爲不當役使之意。履霜堅冰。由來有漸。其不便者四。盧允霞一無賴訟棍爾。昔嘗以唆訟擬遣。逢恩赦歸。又盤踞鹿港。煽惑商民。假控革陋規之名。設立公館。每船抽費數十。是以奸民暴斂也。各商船戶唯泉郊數人稍稍附之。餘皆已悟其奸。有赴廳控其假公者。此

前歲鄧丞所以往毀其館也。彼挾此恨。又爲衆船戶所歸尤。故冒死叩關。以塞衆人之責。始因歛費而控陋規。繼因陋規而陳改制。是以一奸民而敢橫議。變亂祖宗成法矣。雖停罷商運之議。啓自楊桂森。然桂森之議。昔已不行。今則因盧允霞之控而行之。是奸民舞智。反優於邑令之建言也。其不便者。五州縣親民之官。必使有力辦公。乃可不形竭蹶。臺穀陋規。不但內地各屬賴之。卽臺屬廳縣亦有折半征收之利。每穀一石。折收番銀二圓。或一圓八角。可當紋銀一兩四錢。或二三錢。今使以半折抵給臺餉。則官無絲毫餘羨。而廳縣從此大困矣。海外經費無一不倍內地。幕友脩金歲常四五千圓。捐賠之款。又一二千兩。廉俸無幾。何以供之。非盡爲私肥之計也。其不便者。六。雖有廉吏。亦必俛能自給。然後不侵國帑。不朘民膏。陋規旣盡。勢必虧空倉庫。否則詞訟案牘。培克賊私。民間受禍更烈。海外隱憂自此深矣。其不便者。七。夫病商之弊。其寔猶小。若以便商之故而病官。與民因以病國。則害更巨。古之爲政者。利均則權之以義。害均則權之以大小輕重。不可不謹也。爾準納之。慎軫亦與書傳。穉曰。比閱陳議。所見正同。事關國制。不可不盡言。然已違衆議。不能商運。傳穉所云運舊停新之策。亦遂置之。明年仍僱運焉。傳穉復議停運眷米。每米一石抵與紋銀一兩。藩司於臺

餉扣發。臺屬以折色納府。抵大餉焉。是時慎軫已去閩。議雖暫行。未及咨奏。傳檄亦改調矣。道光七年。議定不計樑頭之大小。船之名目。凡厦船配穀百五十石。蚶船大者百石。小者八十石。橫洋船百八十石。糖船三百六十石。務欲以清積滯。而積滯猶如故也。於是奏請折色。自是年起。每石易紋銀一兩。令各兵眷自行買米。商船便之。

鹿耳門應運兵眷米穀表

米從△
穀從▲

運出之地		收用之地	倉	兵米兵穀	眷米眷穀
嘉	義	厦防廳	倉	▲ 二四、一五四	▲ 一、九二〇
臺	灣	龍溪縣	安倉	▲ 二、三七〇	▲ 三、八〇六
臺	灣	龍溪同平府	和倉	△ 一、五〇〇	
鳳	山	福州府	倉	▲ 三、六三八	
鳳	山	南澳廳	倉	▲ 五、九一四	
鳳	山	漳浦縣	倉	▲ 九八三	
鳳	山	海澄縣	浦倉		▲ 三、四七六
鳳	山	詔漳	安浦		

鹿港應運兵眷米穀表

彰	彰	彰	彰	嘉	運出之地
化	化	化	化	義	收用之地
南	晉	莆	福	福	收用之地
安	江	田	州	州	收用之地
					兵米兵穀
			▲△▲△		兵米兵穀
				五五 八八 七七 五五	兵米兵穀
					眷米眷穀
			▲		眷米眷穀
			▲		眷米眷穀
			▲		眷米眷穀
				三、七二七	眷米眷穀
				五、四一四	眷米眷穀
				四六五	眷米眷穀

八里坌應運兵眷米穀表

彰	彰	彰	彰	運出之地	
化	化	化	化	收用之地	
侯	福	羅	閩	收用之地	
官	安	源	縣	收用之地	
				兵米兵穀	
			▲	兵米兵穀	
			▲	兵米兵穀	
			▲	兵米兵穀	
			▲	兵米兵穀	
				眷米眷穀	
				眷米眷穀	
			▲	眷米眷穀	
			▲	眷米眷穀	
				五、五〇〇	眷米眷穀
				四六〇	眷米眷穀

彰 彰

化 化

長 連

樂 江



四五六
六四八

倉儲

倉儲之制。倣於成周。所以充兵糈。裕民食。而平市價也。漢時始建常平倉。由官主之。穀賤則糴。穀貴則出。以時調劑。故曰常平。唐時又設義倉。則由官民合置。以備凶年之需。及宋朱熹復立社倉之法。後世行之。民以稱便。臺灣為宇內奧區。土田肥美。一歲三熟。以其有餘。供給福建。漳泉之民賴焉。鄭氏之時。曾建天興萬年二倉。其址猶存。歸清以後。各縣增設。一曰文倉。儲供穀也。前時正供多完本色。故以此收之。或時以撥平糶。一曰武倉。備兵糧也。成臺之兵按月發米。故以此存之。一曰義倉。官民捐設。而人民之自建者。曰社倉。大清會典曰。凡民間收穫時。隨其所贏。聽出粟麥。建倉貯之。以備鄉里借貸。謂之社倉。公舉殷實有行誼者一人為社長。能書者一人副之。按保甲印牌。有習業而貧者。春夏貸米於倉。秋冬大熟。加一以償。中歲則捐其息之半。下歲免息。社長社副執簿檢校。歲以穀數呈官。經理出納。惟民所便。

官不得以法繩之。豐年勸捐社穀。在順民情。禁吏抑派。有好義能捐十石至百石以上者。旌獎有差。社長社副經理有方。亦按年給賞。制甚善也。又有番社倉。以貯熟番口糧。制略同。康熙四十三年。議定福建倉穀存留發糶之數。各州縣照額存留。而常平之穀。則依時價悉糶。唯臺灣孤懸海外。現在捐穀八千六百餘石。常平倉穀十一萬餘石。每縣照例應存之額。餘悉發市易銀。以備荒年振濟。又臺鳳諸三縣所存供穀。現有七十餘萬石。爲數既多。積久易腐。應留二十萬石。以供三載兵糶。餘亦悉賣。充爲兵餉。雍正四年。議定臺灣歲運福建平糶之米五萬石外。別以正項購運十萬石。分儲沿海各處。若臺灣年豐。可酌情形加運。七年。總督高其倬奏言。臺灣之穀。祇可存備全臺及金廈兩處兵糶。若漳泉平糶之米。請將官莊之款採辦。從之。乾隆十一年。省議以福興漳泉之米。不能不藉資臺灣。而臺灣歲有豐歉。又不能不豫爲籌備。乃定臺灣各廳縣買穀四十萬石。永爲定例。存儲臺倉。如逢福建乏糧之時。撥往接濟。卽以藩庫之款。發還買補。越二年。議定福建常平積穀之數。而臺灣應存四十萬石。夫臺灣爲出穀之地。拓地日廣。收成愈多。非遇兵燹水旱之災。粒食無缺。卽有其災。而人民尙義。業戶輒出平糶。樂善之士亦多捐振。故無道饉之慘。道光十七年。淡水同知婁雲又

勸各莊合設社倉。衆多踴躍。後先設立。而正供以改徵折色之故。其後又裁班兵。文武各倉。遂多虛設。漸就傾塌。唯義倉尙存。今舉其所知者著於表。

臺灣官倉表

臺灣府倉一在府治鎮北坊縣署左計七十六間一在東安坊舊縣署右計三十七間儲穀二十萬石其不足額則由臺風諸三縣撥倉收存

臺灣縣倉一在縣署左計五十七間一在縣署右計十四間一在安平鎮計二間一在羅漢門計三間儲穀三萬石又有監倉在縣署左計二十間乾隆二十四年奉文建

鳳山縣倉一在府治錢局計二十八間一在東安坊計二十一間一在大埔街計二十間一在安平鎮計二十五間一在舊縣治計八間乾隆五十四年知縣常明脩儲穀五萬石又監倉在舊縣治倉後計五間乾隆二十四年建
嘉義縣倉一在府治東安坊計一百三十六間一在縣治計八十間一在笨港計一百零九間一在斗六門計九間乾隆五十五年知縣單瑞龍脩儲穀五萬石監倉未建

彰化縣倉一在縣治半線堡計十五間康熙五十四年諸羅知縣周鍾瑄建以儲半線至竹塹兵米則武倉也雍正二年移歸彰化縣嘉慶十六年知縣楊桂森改建城內一在鹿港米市街計十六間一在貓霧揀堡計三間俱雍正年間建儲穀五萬石監倉未建

淡水廳倉一在竹塹計十二間康熙五十五年諸羅知縣周鍾瑄建以儲淡水至南坎兵米雍正二年歸淡水廳

嘉慶二十二年同知薛志亮修一在八里坌計十二間旋圯移於艋舺一在後壠計一間一在南坎計一間均經薛志亮修儲穀二萬石又有監倉二所一在竹塹計五間一在廳署內計六間

澎湖廳倉在廳治媽宮雍正七年議定撥儲倉穀五千石飭臺諸二縣各先撥運正供穀一千五百石候冬收後各再運千石以足其數嗣通判王仁以澎地潮濕貯穀恐爛請飭寄儲原地如遇歲歉乃運至大府不肯始先運到二千石尙缺三千石久不補足其後通判胡建偉詳請知府查照舊案飭臺諸二縣各再撥運一千五百石以敷原議之數乾隆二十四年正月諸羅縣運到其額而臺灣縣仍缺故額存三千五百石以備平糶此外又有官捐之穀每年三石然今已無存倉亦多塌又有武倉亦在媽宮即從前碾支兵米之倉向例澎營赴臺運米每年七千二百石儲倉支給乾隆二十年通判王祖慶稟稱澎不產穀唯藉客米販濟民食然風信靡常每值市上缺乏時幸賴月運兵米六百石照期散給互相調劑而年來每至逾期查媽宮現有武倉十間緣澎地潮濕儲米易爛請改爲穀以一米二穀計之凡七千二百石貯存武倉令文員管之按月碾給則於常例無違而兵民兩益奏准議行其後改穀爲米由澎湖廳向臺灣縣支領米價自行採辦同治年間因接濟遲延戍兵索餉始歸臺灣縣採辦仍由澎湖廳發票監放各兵自向船艙支領而武倉遂虛設近亦多圯

噶瑪蘭廳倉一在廳治一在頭圍嘉慶二十一年通判翟淦建儲穀二萬石

臺灣社倉表

臺灣社倉原在鎮北坊計四間康熙五十年臺廈道陳瓚建乾隆十五年知縣魯鼎梅改建縣署因就縣倉以貯

社穀其後移建於龍王廟左據同治六年紳董黃應清彙造清冊計倉十二間貯穀一萬六千二十一石

鳳山社倉康熙四十四年知縣宋永清捐建一在興隆里一在下中洲一在內土庫一在半路竹一在下埤頭一

在崁頂一在萬丹其中多圯

嘉義社倉一在諸羅山一在安定里一在斗六門一在茅港尾一在新化里一在打貓社各一間至今多圯道光

十五年紳士王得祿倡建一所於縣治貯穀二萬石

彰化社倉在縣治小西門計十九間道光十四年臺灣府周彥彰化縣李廷璧勸諭紳士羅桂芳等捐建一在沙

連堡林圯埔街乾隆十六年莊民捐穀公建

淡水社倉道光十七年同知婁雲創設勸各業戶捐穀尙未建倉業經奏獎在案同治六年署同知嚴金清復捐

廉俸一千圓購穀千石竝諭業戶林恒茂鄭永承等計捐四萬九千石另撥捐穀三千六百石爲義塾經費乃於竹

塹艋舺兩處各設明善堂以理其事而竹塹係購地新築費款二千九百七十二圓餘艋舺舊倉久圯則就址重建

又以大稻埕捐穀較多議設總倉未行此外各地亦多捐設一在大甲文昌祠內之左有倉五間一在後壠一在貓

裡一在桃仔園捐穀各未詳一在北埔業戶江大賓等捐穀五百五十石續捐八十五石一在九芎林業戶詹國和

等捐穀五百七十一石一在中港業戶葉廷祿等捐穀八百四十石一在新埔業戶陳朝綱等捐穀八百五十石一在大湖口業戶張阿龍等捐穀八百五十石一在大溪澗業戶葉從青等捐穀九百石倉俱未建暫由捐戶存儲

澎湖社倉雍正八年福建督撫奏辦社倉飭各屬官民捐穀自九年起到乾隆十六年文武共捐二百五十九石

是年八月臺灣知府陳闢以澎湖係屬臺邑應將社穀歸入臺邑撥貯三萬石內造報通判何器遂將存穀二百五十石碾米移營抵作撥臺之額又於十八年再將八石撥縣尙存三十六石奉文改作溢捐以入官倉存貯道光十一年通判蔣鏞始自捐俸七千文副將吳朝祥亦捐二千文乃勸諭紳富陳均哲黃寬紀春雨等各捐四百二十千文餘亦樂捐計得三千五百八十五千文自十三年起分發各澳總董生息如逢歲歉豫購諸絲雜糧以濟民食俟有盈餘建倉存貯出陳易新以垂永久總理五年一換由紳董舉充以杜私弊光緒十九年鹹雨爲災候補知府朱上泮奉委至澎考察情形以社倉不可終廢稟明撫藩撥款爲倡通判潘文鳳捐俸百圓勸諭紳民黃濟時蔡玉成等共捐一千四百三十五兩三郊合捐一百六十三兩而署總兵王芝生亦捐三百兩竝諭將弁兵勇共捐九百二十四兩計得銀三千兩以爲社倉資本乃就舊文倉修理三間新建三間以儲之舉濟時玉成等爲董事凡捐五十兩以上者給與義舉裏成之匾以嘉之至是而澎湖義倉始成

臺灣番社倉表

臺灣縣番社倉一在大傑顛社一在新港

鳳山縣番社倉一在放綠社一在茄藤社一在力力社一在上淡水社一在下淡水社一在搭樓社一在武洛社一在阿緞社各一間

嘉義縣番社倉一在羅山社一在打貓社一在他里霧社一在柴裡社一在蕭壠社一在大武壠頭社一在加麥社一在芒仔芒社一在哆囉囑社一在阿里山社一在蘇荳社一在灣裡社

彰化縣番社倉未設

淡水廳番社倉一在搭搭攸社一在蜂仔峙社一在擺接社一在雷裡社一在武勝灣社一在圭柔山社一在大浪泉社一在八里坌社一在毛少翁社一在北投社一在奇里岸社一在小雞籠社一在金包裡社一在大雞籠社一在三貂社一在南崁社一在龜崙社一在坑仔口社一在霄裡社一在竹塹社一在後壠社一在中港社一在貓裡社一在新港社一在加志閣社一在吞霄社一在宛裡社一在房裡社一在貓孟社一在德化社一在大甲社一在雙寮社一在南日社一在蘇糍舊社

臺灣通史卷二十一

臺南

連雅堂

撰

鄉治志

連橫曰。古之治民也。築城郭以居之。制廬井以均之。開市肆以通之。設庠序以教之。士農工商各有其業。故朝亡廢官。邑亡敖民。地亡曠土。理民之道。地著爲本。是故五家爲隣。五隣爲里。四里爲族。五族爲黨。五黨爲州。五州爲鄉。鄉萬二千五百戶也。隣長位下士。自此以上。稍登一級。至鄉而爲卿。故其政不令而舉。其教不勞而齊。其兵不養而備。其稅不歛而足。此則鄉治之制也。連橫曰。泰西之政。其知此道乎。故能強其國而富其民。臺灣當鄭氏之時。草昧初啓。萬庶偕來。廣土衆民。蔚爲上國。此則鄉治之效也。當是時。布屯田之法。勵墾土之令。徠避難之民。拓通海之利。故能以彈丸之島。收亡國擁諸王。奏群賢建幕府。以與清人爲難。此固已得霸王之道矣。經立委政勇衛陳永華。改東都爲東寧。分都中爲四坊。曰東安。曰西定。

曰寧南曰鎮北坊置簽首理民事制鄙爲三十四里置總理里有社十戶爲牌牌有長十牌爲甲甲有首十甲爲保保有長理戶籍之事凡人民之遷徙職業婚嫁生死均報於總理仲春之月總理彙報於官考其善惡信其賞罰勸農工禁淫賭計丁庸嚴盜賊而又訓之以詩書申之以禮義範之以刑法勵之以忠敬故民皆有勇知方此則鄭氏鄉治之效也清人得臺沿用其制而有司奉行不謹漸就廢弛朱一貴既平之後地方未靖總兵藍廷珍上書總督滿保請行保甲就各縣簽舉一幹練勤謹家殷品端者使爲鄉長就其所轄數鄉以聯守望相助之心給之游兵以供奔走使令之役如有一家被盜則前後左右齊出救援堵截各處協力獲禽又設大鄉總一二人以統轄之督率稽查專其責成鄉長如有生事擾民縱容奸匪而大鄉長不報者則罪同是雖無鄉兵之名而不啻有鄉兵之寔今臺灣中路擬設鄉長六名南路鳳山八名各立大鄉總一名北路諸羅十二名分立大鄉總二名以統率之鄉長准給養游兵四名而大鄉總與以外委千把總銜准給養游兵十名每兵月給銀一兩米三斗就官莊內支之而鄉長大鄉總則酌量給之凡地方有竊劫之案則飭鄉長限期緝獲初限不獲比游兵再限不獲罰其身三限不獲重懲之凡三次不能獲者革之而大鄉總銷

其銜。其有勤謹辨公。三年無過者。量行擢用。以示鼓勵。從之。於是設大鄉總四名。鄉長二十有六。廷珍慮其未備。復請權行團練。以爲今日郡治。雖有協防之兵二千。足供調遣。然分派南北。所存無多。宜急訓練鄉壯。聯絡村莊。以補不足。無事則農。有事則兵。所謂急則治標。不可順與緩者也。其後遂立爲例。每有兵事。則舉辨之。乾隆五十一年。林爽文之變。南北俱陷。郡治戒嚴。各鄉多辨團練。出義民以資戰守。而鹿港郊商亦募勇自衛。故無害。顧此爲防內之事。而禦外則尤烈。道光季年。禁烟之役。英艦輒窺伺海口。臺人大憤。與之開戰。和成。詔開五口通商。遂倡攘夷之論。且公約曰。曩者英人犯順。罷兵議撫。准其通商。而不通商之地。則不許登岸。違者送其領事治罪。此人人共知者。臺灣非英人應至之地。我等知朝廷寬大。許其和約。不與抗拒。非畏之也。彼既俯首恭順。我等豈敢生事。且所謂和者。但見之不殺爾。非聽彼之使令也。彼先侮我。我豈讓彼。我百姓如爲所用。是逆犯也。是犬羊之奴也。餓死亦不肯爲。我百姓自爲義民報國。地方官亦不得牽制。如彼本無異心。而奸徒從中指引。則我等不殺其人。而殺勾通之人。於撫洋之道。固竝行而不悖也。風聞英人欲於臺地貿易。如果成事。貽禍無窮。習教惑衆。是子弟罹其害也。占地蓋房。是居民遭其殃也。霸攬貨稅。是商賈絕

其生計也。買用男婦。是子女受其荼毒也。臺地孤懸海外。無可徙避。亟宜及早圖之。一曰勸瞭望。沿海城鄉居民。隨時於高處探望。但見洋船踪影。卽飛報該管文武衙門。一面探其駛入何口。再行阻截。不得專恃口岸吏胥。一曰聯聲勢。洋船如來停泊。竝無逞強情形。我百姓多至千人。少數百人。暗藏刀棍。排立港岸。阻其深入。不與鬪。靜以待之。久則自退。一曰查奸細。洋人不足慮。慮土匪勾結爾。如有私與交接者。公同拿送文武衙門。若查出確有勾通證據。或造謠乘間搶劫。應報地方官殺斃。一曰選壯丁。無事之時。各街鄉除鰥寡孤獨及家無次丁外。每家各出一人。年約在五十以下二十以上。殷寔紳商各自添備。不拘定數。先造名冊。存於各義首處。一旦有事。呼之卽至。違者公罰。至有事動支口糧。或由官給。或由民捐。臨時定議。宜從優厚。卽有一二死傷。定邀褒卹。一曰籌經費。防堵軍需。自有帑項。我百姓仍須備儲。同保身家。每街鄉公議。以公正紳耆爲義首。查明現在經商及田產較多者。每家每日捐錢數百文或數十文。一月一支。零星積存。俟有成數。再議生息。除却防洋。不准動用。一曰備器械。刀鎗牌銃。家家俱有人執一器。卽成勁旅。所慮者洋人之礮爾。然彼礮在船。遠不能及。我礮在岸。近而易攻。但令大礮不能登岸。則其技已窮。我不必用礮。唯禦彼之礮。而其

技亦窮。每家或三兩家。各置遮牌一面。以木版高與身齊。或編竹爲之。內安鼻紐。外釘牛皮。鋪棉紙。或加網絲。或塗蔗糖。此臺地所易辨者。得壯士千百人。持此爲前。則礮火不能傷人。人膽壯。有進無退。則一鼓而殲之矣。當是時。徐宗幹任巡道。尤爲鼓勵。故敵愾愈深。宗幹以欲禦外侮。須清內奸。通飭各屬總理。凡所管莊內向來爲匪之人。非無畏法改悔者。許其將功折罪。如願作線緝捕。卽赴附近分防衙門。代爲稟請。願當差者。考其技藝。留充壯勇。願在鄉者。記其姓名。派守村莊。酌給口糧。俾資養贍。其有怙惡不悛者。卽率衆捕拿解送。自應從優獎勵。又以書諭各社家長曰。查姚前道任內。諭各社家長。以各莊丁口萬人。最少數百人。賊雖多不過數十。少僅十餘人。爾族丁十倍於賊。賊雖強。焉敢伺夜深入。此必有與賊通者。通賊者非他。卽本族本莊貧乏人爾。若輩無業忍饑。富者不肯贍給。故怨而通賊。爾社內富家可出公費若干。將社中貧乏無業而年壯者。悉召歸之。日給飯錢。使爲壯丁。大社四十人。中社三十。小社二十。分爲兩班。每夜一班巡社防守。一人執鑼不鳴。一人擊梆。餘執大槌。不許持刀鎗鳥銃。自三更起。繞行社外。向明而止。見賊則鳴鑼大呼。一社之人群起應之。賊必不敢入社。一社鳴鑼。則隣社皆應。不逐賊者罰之。賊旣走。不可遠追擊捕。恐其窮迫傷

人此法一行。則各社貧者有以自養。皆自保其社。不但不通賊。亦不復出而爲外盜矣。姚前道任內。各社遵行。立見安謐。至隆冬以後。平日各須妥議章程。以期閭里益臻清靜。凡子弟爲非。父兄同罪。當綢繆於未雨。期任卹之可風。各社內一人興訟。衆人牽連。一家滋事。大家破費。官兵至則妻孥移散。壯勇來則雞犬皆驚。典田鬻產。爲無益之虛糜。積怨深仇。遭不測之禍患。與其爲難於事後。何如早籌於事前。人無愚智。各具天良。境處饑寒。易成地棍。各社家道殷寔者。公議按捐地畝若干。各家分收近支族中貧苦孤獨子姪若干人。或借給糧食。傭工出力。按年抵扣。或支付銅錢。小本營生。餘利歸還。或祠堂公提生息。或本社捐置贍田。幼而慧者。設義塾。以免游閒。壯而鈍者。習技勇。以防奸宄。如怙惡不悛。公請族長責懲。逐出本支。聯名送官究處。不准回社。如改過自新。或保送衙門。充當壯勇。爾等同心協力。庶幾有安享太平之日。其各勉旃。宗幹爲治。每致意於公務。整剔利弊。循名核寔。而紳民亦相觀感。一時士氣丕振。風俗純美。至今猶稱道焉。淡水據臺之北鄙。地大物溥。閩粵分處。閩居近海。粵宅山陬。各擁一隅。素少來往。而閩人以先來之故。稱粵籍曰客人。粵人則呼閩籍曰福老。風俗不同。語言又異。每有爭端。輒起械鬪。閩粵鬪則漳泉合。漳泉鬪則粵人陰持其後。搶攘

昏墊蔓延數十村落。而有司莫能止也。道光十一年。淡水同知婁雲乃立莊規四條。禁約八條。飭民守之。澎湖爲海中群島。居民好訟。其時亦立鄉約曰。毋非時而賭。以新春六日爲限。毋爲竊盜。毋放牛蹊人之田。毋侵人漁界。毋演淫戲。毋怠公役。毋健訟。違者罰錢一千。其不從者請官治之。初林恭之亂。宗幹以淡水林占梅辨北路團練。彈壓地方。及戴潮春起事。淡水同知秋曰覲遇害。全臺俶擾。占梅又集紳士。籌守禦。時宗幹已任福建巡撫。命以辦理全臺團練事務。頒發鈴記。通飭所屬。然鎮道俱駐府治。籌兵籌餉。須設總局。乃由巡道委派紳士任之。劃城中爲五段。設總簽首。東段二員。一轄六合境。一轄八協境。西段二員。一轄六和境。一轄六興境。南段一員。爲八結境。北段一員。爲十八境。中段一員。爲二十一境。而小西門內外亦設一員。轄四境。大西門外爲商務繁盛之區。分爲南北。各一員。而三郊別有大簽首三名。理其事。三郊者糖郊。南郊。北郊也。其辦事處在水仙宮。曰三益堂。每有交涉。開會平斷。不假於官。凡地方有大繇役。輒捐餉助軍。集資振濟。爲一方之重。蓋其時商務發達。貿易多利。而當事者又能急公好義。故人多尙之。其後乃稍凌夷焉。初各縣紳商均爲義民首領。義民隨軍出戰。則各街鋪戶派出壯丁。每境十名或二十。謂之舖民。每夜登城巡警。及旦始歸。

僅留一人守之。每名夜給點心錢六十文。油燭十文。五日一發。屆期各街簽首向局支領。事平之後。尚存其名。坊里之人。每有爭執。輒向總簽首論其曲直。而有司亦每循其意。以興除利弊。光緒七年。兵備道劉璈。改爲培元總局。以理一切善舉。其總辦由道府札委。下置紳董。凡清溝修道救卹施醫等。歲率數萬圓。悉由洋藥釐金項下開支。其所以整齊市政者至矣。及法人之役。再辨團練。璈手定章程十七條以布之。既又刊漁團章程二十條。通飭紳民暨沿海漁戶遵行。頗收指臂之助。語在軍備志。時福建巡撫劉銘傳駐臺北。亦辨團練。奏簡林維源爲團練大臣。十二年。奏辨清賦。飭屬先辨保甲。查造戶口。十戶爲牌。牌有長。十牌爲甲。甲有長。十甲爲保。保有正。均隸於保甲局。總局在臺北。以補候知府爲總辦。各廳縣皆設分局。札委丞倅任之。按季彙報。先送按察使司查核。乃詳巡撫彙題。登其民於戶部。以知戶口之盈虛。而銘傳尤勵精圖治。欲置臺灣於富強。然以經費之故。未能竟行其志。惜哉。乙未之役。復辨團練。以進士邱逢甲爲團練使。先是臺南府治。每年應辦冬防。以詰盜賊。嚴水火。光緒十年。知縣俞鴻詳請道府。以抄封公款庫平六千圓。發各當舖生息。每千圓月利十圓。歲收七百二十圓。又以外新豐里魚潭贖租二百圓。以充其費。尙有不足。則由鹽課盈餘撥用。

夫保甲之制。所以衛民。使之相安而無事。然而民不能永安也。水旱之不時。疫癘之間作。鰥寡孤獨之無告。則必爲之盡心力。先事而防之。後事而循之。而後得遂其生。夫均是人也。均是一鄉一縣之人也。出入相友。守望相助。疾病相扶持。則百姓親睦。是故建義倉以平之。開醫局以治之。設養濟以卹之。而後可以收鄉治之寔。而後可以爲治國平天下之道。臺人重宗法。敬祖先。故族大者必立家廟。歲時伏臘。聚飲聯歡。公置義田。以供祭祀。又爲育才婚嫁。恤孤振乏之資。其大者則聯全臺之子姓。建立大宗。追祀始祖。深得親親之義。臺灣戍兵多來自福建。瓜期而代。各建公廳。以爲集議之所。故郡城之中。有福州公廳。有詔安公廳。有雲霄公廳。均在鎮北方。糾其黨羽。肆爲不法。道光間。巡道徐宗幹移鎮禁毀。其風始息。而外省之居臺者。有兩廣會館。有浙江會館。亦爲仕商集議之所。聯鄉誼。萃衆志。其有流落不歸者。則資遣之。故無窮途困苦之悲。是亦扮榆之義也。南郡大西門外。有五大姓。蔡爲衆。郭次之。黃許盧又次之。各踞一街。以相憑陵。莫敢侵犯。蓋以其地爲郊商屯集之處。貨物出入。資之輸運。故爭擁其利。夫以一郡之中。而族自爲族。黨自爲黨。能不化離。且因之而生私鬪。然能善用之。亦足以資其力。朱一貴之變。粵人不附者。以省界也。林爽文之變。泉人不應者。以府

分也。若夫蔡牽之亂。協力同袍。爭趣殺敵。卽以寇自外至也。詩曰。兄弟鬩於牆。外禦其侮。爲此詩者。其知鄉治之義乎。故曰。日月食於外。而賊在其內。

臺灣善堂表

臺北官醫局在臺北城內考棚光緒十二年巡撫劉銘傳設以候補知縣爲總理招聘西人爲醫生以醫人民之病不收其費竝設官藥局於內

臺北病院亦在考棚光緒十二年巡撫劉銘傳設以醫兵勇之病

臺灣養濟院在縣治鎮北坊康熙二十三年知縣沈朝聘建

臺灣普濟堂在縣治縣城隍廟內乾隆十一年巡臺御史六十七范咸命臺灣縣李闡權建凡十二間撥公款千

餘圓充用以收養窮民

臺灣棲流所在縣治聖公廟街光緒十二年知縣謝壽昌稟設以收流民其款由普濟堂撥用

臺灣育嬰堂在縣治外新街咸豐四年富戶石時榮倡建自捐家屋充用竝捐五千圓生息以爲經費又勸紳商

集款數千圓稟官批准凡安平出入商船抽稅充用而富戶亦各捐田園鋪屋入款頗多其後巡道黎紹棠以爲義舉更勸紳士辦理竝以洋藥釐金提撥充用及光緒八年巡道劉玟乃廢其例以司庫平餘及鹽課餘款千餘圓撥

爲經費

臺灣郵務局在縣治同治十三年欽差大臣沈葆楨倡設自捐千圓命巡道夏獻綸提撥公款並勸紳富捐款九

千圓購置田園生息以卹嫠婦凡年三十以內家貧守節者鄰右保結每名月給二圓

嘉義養濟堂在縣轄善化里東堡康熙二十三年諸羅知縣季麒光建

嘉義育嬰堂在縣治城隍廟內同治七年紳商捐設額收二十名

鳳山養濟院在縣轄土壠康熙二十三年知縣楊芳遠建

彰化養濟院在縣治八卦山下乾隆元年知縣秦士望建以收養麻瘋殘疾之人約四十名

彰化留養局在養濟院之左乾隆二十九年知縣胡邦翰建以收養窮民一百名捐置田園歲收租銀一千二百

八十四圓以爲經費

彰化育嬰堂在縣治道光年間官紳合建久而荒廢光緒七年知縣朱幹隆乃勸紳富重設以抄封家屋充用

淡水留養局原在竹塹城內乾隆二十九年設以收養窮民及同治元年之亂佃冊紛失收租漸減僅養七十名

光緒十五年分治之際重設此局以舊時局產揆充並捐經費額收四十名

淡水育嬰堂在縣治艋舺學海書院後同治九年官紳合建詳撥三郊洋藥抽捐每箱四圓之半以充經費

淡水保嬰局在縣轄擺接堡枋橋莊富紳林維源倡設自捐五千圓竝勸富戶集款二千圓置田生息以充經費
新竹棲流所在縣轄樹林莊以收孤老窮民百餘名同治三年燬嗣築

新竹育嬰堂在縣治龍王廟之右

澎湖普濟堂道光六年通判蔣鏞籌建捐款四百圓交媽祖宮董事生息嗣以貧民尙可棲身無庸建屋九年澎

湖紳商合捐二百十圓交鹽課館生息續捐制錢四萬七千五百文生息又詳准徵收小船之費歲入一萬九千八百文以充口糧額定三十名每名月給三百文

澎湖棲流所在媽宮嘉慶二十四年郊戶德茂號等捐款置屋以爲難民棲宿稟官存案

澎湖育嬰堂在媽宮紳商捐設後歸廳辦理歲收租息三十二萬四千文每月又於鹽課撥銀五十兩以充經費
約收女嬰三十餘名每名月給八百文又分卹養濟院窮民每名月給三百文如病故者別給四百文

臺灣義塚表

臺灣縣義塚一在縣治大南門外魁斗山歷年已久一在新昌里康熙五十九年監生陳仕俊捐置與魁斗山毗

連一在水蛙潭一在北壇前一在海會寺前俱乾隆十七年知縣魯鼎梅購置又一亦在大南門外俗稱師爺塚爲
江浙游幕人士公置竝建一堂春秋祭祀公舉一人爲董事

嘉義縣義塚一在縣治附近計七所一在打貓堡計六所一在鹽水港堡計五所一在他里霧堡計四所一在下

茄苳堡計三所一在哆囉囑堡計三所一在茅港尾堡計二所一在蔴荳堡計二所

鳳山縣義塚一在縣治西門外蛇頭埔雍正二年知縣錢洙置一在府治南門外魁斗山後

彰化縣義塚一在縣轄內快官莊知縣蘇渭生置一在八卦山及番仔井山等知縣胡邦幹置一在各處官山歷

任知縣秦士望劉辰駿胡應魁吳性誠等出示聽民安葬嘉慶十六年紳士王松等請官詣勘各處官山塚地示禁
侵墾又一在鹿港街外乾隆四十二年紹興魏子鳴與巡檢王坦倡建購地充用曰敬義園以其餘款置業生息歲
舉泉厦郊商爲董事

新竹縣義塚一在縣南巡司埔尾一在中塚傍俱道光十六年紳士捐置一在枕頭山一在土地公埔一在鼻頭

莊均爲乾隆六十年業戶黃意使捐置一在後壠莊一大甲莊今屬苗栗

淡水縣義塚一在艋舺計兩所爲林士快陳長茂捐置一在大隆同乾隆三十年邱文華置一在滬尾嘉慶元年

何宗泮置一在圭柔山嘉慶二年陳晃生置一在新莊同治九年縣丞鄒祖壽置

澎湖廳義塚一在媽宮澳東北一在尖山鄉一在林投坡一在西嶼一在瓦碇港一在網垵澳又一在北山後蔡

灣凡海中漂屍拾葬於此

臺灣通史卷二十二

臺南 連雅堂 撰

宗教志

連橫曰。宙合之中。列邦紛立。而所以治國定民者。曰政。曰禮。夫政者。以輔民志者也。禮者。以齊民俗者也。如車兩輪。相助爲理。然而詩書所載。每言鬼神。降祥降殃。歸之天帝。一若冥冥之上。果有一眞宰者焉。詩曰。赫赫不顯。上帝維辟。書曰。維皇上帝。降衷下民。宗教之興。其來久矣。然而儒者之言。天必指之以人。故曰。天視自我民視。天聽自我民聽。又曰。天討有罪。天秩有禮。跡其所以治國定民者。莫不代天爲之。是以郊社之禮。祝史之告。薦信鬼神。靡敢誕謾。此所謂明德維馨也。夫政者。以輔民志者也。有時而亂。禮者。以定民俗者也。有時而弊。然則其用以範圍一世之人心者。不得不藉之宗教。神道然。佛老然。景回二教。亦無不然。顧善用之。足以助羣德之進。不善用之。反足以推其沉溺。而奸詭邪僻生焉。連橫曰。臺灣之宗教。

雜揉而不可一者也。故論次其得失。

神教

神道設教。本於人情。人情好善而惡惡。趨利而避害。故聖人率之以道。道也者。不可須臾離也。是故廸吉。廸凶。唯天所示。然而天者。空間也。無聲無臭。可見而不得見。可聞而不得聞。以音讀之爲巔。以文觀之爲一大。以義釋之爲自然。是天者爲至高至大之景象。而具自然之作用焉。夫此至高至大之景象。夫婦有所不知。故不得不假之上帝。上帝者。自然者也。故亦曰。天然。臺灣之人無不敬天。無不崇祀上帝。朔望必祈。冠婚必禱。刑牲設醴。至腆至誠。臺南郡治有天公壇者。所祀之神。謂之玉皇上帝。歲以孟春九日爲誕降之辰。此則方士之假藉。而以周易初九見龍在田之說附會爾。古者天子祭天。諸侯祭其域內名山。大川。臺灣爲郡縣之地。山川之禮。見於祀典。而不聞祭天之儀。然則此天公壇者。其爲人民所私建。以奉祀上帝。則當先正其名矣。次爲三官。其禮降於玉皇一等。神仙通鑑謂天官堯也。地官舜也。水官禹也。夫堯定天時。以齊七政。孔子曰。大哉堯之爲君。唯天爲大。唯堯則之。故爲天官。舜畫十有二州。以安百姓。故爲地官。禹平洪水。奠民居。故爲水官。是皆古之聖王。功在後世。沒而

祀之宜也。然而臺人之言曰：天官賜福，地官赦罪，水官消災。此則出於師巫之說。東漢張道陵修煉於蜀鶴鳴山，造作符書，以役鬼卒，令有疾者自書姓名及其服罪之意，爲牒三。一上天，一埋之地，一沒之水。三官之名始於此。及北魏時，尊信道士寇謙，襲道陵之說，以孟春孟秋孟冬之望爲三元，而相傳至今矣。復次爲五帝。五帝之說見於史記封禪書：東方曰青帝，西方曰白帝，南方曰赤帝，北方曰黑帝，中央曰黃帝。秦漢天子以時祀之，其禮特隆。而臺灣所祀之五帝有二，其一爲五顯大帝，廟在臺南郡治之寧南坊。夷堅志謂五聖廟卽五顯之祖祠。七脩類稿謂五通神則五聖，而陔餘叢考謂五聖五顯五通名雖異而實則同。按五通之祀，宋時已盛。清初湯斌巡撫江南，奏毀之，其害始絕。然臺南所祀者爲像一，赤面三眼，則又別爲一神，而爲師巫所假藉，故亦稱爲五顯靈官也。其一爲五福大帝，廟在鎮署之右，爲福州人所建。武營中尤崇奉之，似爲五通矣。然其姓爲張，爲劉，爲鍾，爲史，爲趙，均公爵，稱部堂，僭制若帝王。歲以六月出巡，謂之逐疫。喬粧鬼卒，呵殿前驅，金鼓喧闐，男女雜遝，傾錢酬願，狀殊可憐。越二日以紙糊一舟，大二丈，奉各紙像置船中，凡百器用財賄兵械，均以紙綢爲之，大小靡不具。愚民爭投告牒，賣柴米，舁舟至海隅火之，謂之送王。七月七日，又至海

隅迎之。此瘟神爾。而與靈官皆竊五帝之號。是淫祀也。復次爲王爺。王爺之事。語頗鑿空。或曰。是澎湖將軍澳之神也。舊志謂神之姓名事蹟無考。豈隋開皇中虎賁陳稜略地至此。因祀之歟。又曰。府志載邑治東安坊有開山王廟。今圯。按開山王廟所祀之神。爲明招討大將軍延平郡王。卽我開臺之烈祖也。乾隆間。邑人何燦鳩資重建。同治十三年冬十月。欽差大臣沈葆楨與總督李鶴年巡撫王凱泰將軍文煜合奏。改建專祠。春秋致祭。語在建國紀。是開山王廟。固祀延平也。陳稜之廟。在西定坊新街。面海。曰開山宮。爲鄭氏所建。以稜有開臺之功也。而府志誤爲吳真人。且言臺多漳泉人。以其神醫。建廟特盛。夫吳真人醫者爾。何得當此開山之號。固知所祀之神。必有大勳勞於臺灣也。唯臺灣所祀之王爺。自都邑以至郊鄙。山陬海澨。廟宇巍峩。水旱必告。歲時必禱。尊爲一方之神。田夫牧豎。靡敢瀆謾。而其廟或曰王公。或曰大人。或曰千歲。神像俱雄而毅。其出游也。則曰代天巡狩。而詰其姓名。莫有知者。烏乎是果何神。而令臺人之崇祀。至於此極耶。顧吾聞之故老。延平郡王入臺後。闢土田。興教養。存明朔。抗滿人。精忠大義。震曜古今。及亡。民間建廟以祀。而時已歸清。語多避忌。故閃爍其辭。而以王爺稱。此如花蕊夫人之祀其故君。而假爲梓潼之神也。亡國之痛。可以見。

矣。其言代天巡狩者。以明室旣滅。而王開府東都。禮樂征伐。代行天子之事。故王爺之廟。皆曰代天府。而尊之爲大人。爲千歲。未敢昌言之也。連橫曰。信哉。余嘗游埔裡社。途次內國姓莊。爲右武衛劉國軒駐軍之地。以鎮撫北港溪番者。莊人數十戶。皆祀延平郡王。又嘗登山。謁碧雲寺。寺祀釋迦。而前殿亦奉延平。顧此爲有清中葉之事。法網稍疏。若在雍乾之際。芟夷民志。大獄頻興。火烈水深。何敢稍存故國之念。故府縣舊志。雖載開山王廟。而不言何神。東都之事。一切抹殺。且加以僞鄭之名。此則桀犬吠堯也。夫臺人之祀延平。固爲崇德報功之舉。後人不察。失其本源。遂多怪誕。而師巫之徒。且藉以斂錢。造船建醮。踵事增華。惑世誣民。爲害尤烈。烏乎。先民雖愚。斷無如是之味也。然二百數十年來。無有能糾其謬者。而今乃得抉其微。先民有知。能毋慰乎。復次爲天后。亦稱天上聖母。臺之男女靡不奉之。而郊商海客。且尊爲安瀾之神。按天后姓林。福建莆田人。世居湄洲。父愿。五代時爲都巡檢。配王氏。生五女一子。宋太祖建隆元年三月二十有三日。誕后。曰九娘。彌月不聞啼聲。故又名默娘。八歲就外傳。解奧義。性好禮佛。年十三。老道士元通至其家。曰。是兒具佛性。應得正果。遂授以要典秘法。十六觀井得符。能布席海上。濟人。雍熙四年九月初九日昇化。或言二月十有

九日也。年二十有八。自後常衣朱衣。乘雲氣。遨遊島嶼間。里人祀之。顯聖錄之所言如此。康熙十有九年。閩浙總督姚啓聖奏言。蕩平海島。神佑靈異。請錫崇封。遂封天上聖母。二十有二年。清軍伐臺灣。靖海將軍施琅奏言。澎湖之役。天妃效靈。及入鹿耳門。復見神兵導引。海潮驟漲。遂得傾島投誠。其應如響。詔遣禮部郎中雅虎至澎致祭。文曰。國家茂膺景命。懷柔百神。祀典具陳。罔不祇肅。若乃天休滋至。地紀爲之效靈。國威用張。海若於焉助順。屬三軍之奏凱。當重譯之安瀾。神所憑依。禮宜昭報。惟神鍾靈海表。綏奠閩疆。昔藉威靈。克襄偉績。業隆顯號。禋享有加。比者慮窮島之未平。命大師以致討。時方憂旱。川澤爲枯。神實降祥。泉源驟湧。因之軍聲雷動。直搗荒陬。艦陣風行。竟趨巨險。靈旗下降。助成破竹之功。陰甲排空。遂壯橫戈之勢。至於中山殊域。冊使遙臨。伏波不興。片帆飛渡。凡茲冥祐。豈曰人謀。是用遣官敬脩祀事。溪毛可薦。黍稷維馨。神其佑我邦家。永著祝宗之典。眷茲億兆。益宏利濟之功。維神有靈。尙克鑒之。加封天后。勅建祠原籍。琅旣入臺。以明寧靖王之邸。改建神廟。卽今之天后宮。刻石紀事。五十九年。翰林海寶冊封琉球。歸奏言。神祐封舟。詔飭春秋致祭。編入祀典。於是臺灣府縣之廟。祭以太牢。雍正四年。巡臺御史禪濟布奏言。朱一貴之

役。天后顯靈。克奏膚功。乃賜神昭海表之額。懸於郡治廟中。十一年。總督郝玉麟巡撫趙國麟奏請賜額。御書錫福安瀾。懸於福州南臺之廟。並令江海各省一體葺祠致祭。自是以來。歷朝每賜額表彰。而臺灣各地亦後先建祠。凡此皆所祀之神也。其列於祀典者唯天后。其不列者則載之於表。

道教

道家者流。出於史官。歷記成敗存亡禍福古今之道。以知秉要勢。本清虛以自守。卑弱以自持。此君人南面之術也。及放者爲之。則欲絕去禮學。兼棄仁義。此其所短也。夫道家皆宗老子。老子爲周柱下史。祖述黃帝。故曰黃老。黃老之教。漢用之而治。晉用之而亂。非黃老之道有純駁。而用之能適與否爾。臺灣道教。非黃老之教也。微不足道。而其流衍人間者。則爲張道陵之教。道陵旣以符書役鬼卒。孫魯又吹煽之。從者日多。朝廷士夫亦信其術。封爲真人。尊曰天師。奕世相承。主持劍璽。悍然而據一方。故其徒皆號道士。然臺灣道士。非能脩煉也。憑藉神道。以贍其身。其賤乃不與齊民齒。唯三官堂之道士。來自江西。蓄髮方衣。懸壺賣藥。謂之海上方。頗守道家之律。若市上道士。則僅爲人家作事爾。坊里之中。建廟造像。陳牲設

醴宰割白雞。以血點晴。謂之開光。天災火害。懼而脩省。設壇以禳。謂之建醮。旱魃爲虐。禱告龍宮。朝夕誦經。謂之祈雨。親喪未除。三旬卒哭。表神禮懺。謂之報恩。又或婦孺出門。忽逢不若。畫符吹角。謂之收煞。病人勿藥。合家有喜。上牒焚楮。謂之補運。中婦不孕。乞靈於神。換斗栽花。謂之求子。凡此皆所以用道士也。而道士每張大其辭。以欺罔愚頑。巾幘之中。尤多迷信。顧此猶未甚害也。其足惑世誣民者。莫如巫覡。臺灣巫覡。凡有數種。一曰瞽師。賣卜爲生。所祀之神。爲鬼谷子。師弟相承。秘不授人。造蠱壓勝。以售其奸。二曰法師。不人不道。紅帕白裳。禹步作法。口念真言。手持蛇索。沸油於鼎。謂可驅邪。三曰紅姨。是走無常。能攝鬼魂。與人對語。九天玄女。據之以言。出入閨房。刺人隱事。四曰乩童。裸體散髮。距躍曲踴。狀若中風。割舌刺背。鮮血淋漓。神所憑依。創而不痛。五曰王祿。是有魔術。剪紙爲人。驅之來往。業兼醫卜。亦能念咒。詛人死病。以遂其生。凡此皆道教之末流而變本加厲者也。夫道家以玄默爲主。尙真一。任自然。乃一變而爲煉汞燒丹。長生久視。再變而爲書符作法。役鬼求神。三變而爲惑世誣民。如蛇如蝎。此其所以衰也。而臺灣之道教更不振。

佛教之來。已數百年。其宗派多傳自福建。黃蘗之徒。實授衣鉢。而齋堂則多本禪宗。齋堂者白衣之派也。維摩居士能證上乘。故臺灣之齋堂頗盛。初鄭氏之時。龍溪舉人李茂春避亂來臺。居永康里。築草廬曰夢蝶。朝夕誦經。人稱李菩薩。而太僕寺卿沈光文且逃入羅漢門。結茅爲僧。蓋以立黃之際。干戈板蕩。綱維墜地。懷忠蹈義之士有託而逃。非果以空門爲樂土也。當是時。東寧初建。制度漸完。延平郡王經以承天之內。尙無叢林。乃建彌陀寺於東安坊。延僧主之。殿宇巍峩。花木幽邃。猶爲郡中古刹。其後諮議參軍陳永華師次赤山堡。以其地山水廻抱。境絕清淨。亦建龍湖巖。巖則寺也。蓋當鄭氏之時。臺灣佛教已漸興矣。清人得臺之際。寧靖王術桂閣家殉國。捨其居邸爲寺。靖海將軍施琅就旁改建天后宮。而觀音堂猶在也。當是時。鄭氏部將痛心故國。義不帝胡。改服緇衣。竄身荒谷者。凡數十人。而史文不載。忠義之士未得表彰。傷已。康熙二十九年。巡道王效宗總兵王化行改建北園別墅爲海會寺。霸業銷沉。禪風鼓舞。滄桑之感。能不慨然。自是以後。移民愈多。佛教漸盛。宏轉法輪。以開覺路。徽音古德。代有所聞。而黃蘗寺僧尤特出。豈所謂能仁能勇者非歟。僧不知何許人。逸其名。居寺中。絕勇力。能蹴庭中巨石。躍去數丈。素與官紳往來。而知府蔣元樞尤莫逆。一

日元樞奉總督八百里密札。命拿此僧。不得則罪。潛訪之。知爲海盜魁。恐事變。且得禍。乃邀僧至署。盤桓數日。欲言又止。僧知之。曰。窺公似大有心事者。大丈夫當磊磊落落。披肝見膽。何爲效兒女子態哉。曰。不然。事若行。則上人不利。不行。吾又不能了。故踟躕爾。出札示之。僧默然良久。曰。不慧與公有前世因。故一見如舊。今願爲公死。但勿求吾黨人。不然。竭臺灣之兵。恐不足與我抗。曰。省憲祇索上人爾。餘無問。僧曰。可。命招其徒。至告曰。而歸取籍來。徒率衆肩入署。視之。則兵卒糧餉器械船馬之數。一一付火。元樞大驚。僧曰。我祖爲鄭氏舊將。數十年來。久謀光復臺灣。雖小地肥饒。可霸然。吾不猝發者。以閩粵之黨未勁。爾今謀竟。外洩天也。雖然。公莫謂臺灣終無人者。又曰。公遇我厚。吾禪房穴金百餘萬。將爲他日用。今舉以贈公。公亦好速歸。不然。荆軻聶政之徒。將甘心於公也。元樞送至省。大吏訊之。不諱。問其黨。不答。刑之。亦不答。乃斬之。是日有數男子往來左右。監刑者慮有變。不敢問。待決時。一黑面長髯者。弩目立。僧叱曰。小奴尙不走。吾昨夜諭而速改惡。勿妄動。今如此行跡。欲何爲。勿謂吾此時不能殺汝也。其人忽不見。事後。大吏問獄吏。何以許人出入。曰。旦夕未見人。且僧有神勇。柁楊輒斷。幸彼不走爾。聞者皆愕然。是則湛虛寂靜之中。忽有叱咤風雲之氣。豈非奇。

事。初朱一貴之變。有僧異服怪飾。周游街巷。詭稱天帝使告臺民。四月杪。當有大難。難至。如門設香案。以黃旗書帝令二字。插於案上。可免。及一貴至家。如僧言。官兵見者。以爲民心已附。多敗走。及林爽文戴潮春之役。亦以天地會八卦會爲號召。天地會者。相傳延平郡王所設。以光復爲旨。閩粵之人多從之。故爽文率以起事。而八卦會者。環竹爲城。分四門。中設香案三層。謂之花亭。上供五祖。中置潮春祿位。冠以奉天承運大元帥之號。旁設一几。以一貴爽文爲先賢而配之。入會者爲舊香。跣足散髮。首纏紅布。分執其事。凡入會者。納銀四錢。以夜過香。十數人爲一行。叩門入。問從何來。曰從東方來。問將何爲。曰欲尋兄弟。執事者導跪案前。宰雞誓曰。會中一點訣。毋對妻子說。若對妻子說。七孔便流血。宣示戒約。然後出城。張白布爲長橋。衆由橋下過。問何以不過橋。曰有兵守之。問何以能出。曰五祖導出。又授以八卦隱語。會衆相逢。皆呼兄弟。自是轉相招納。多至數萬人。而潮春遂藉以起事矣。夫佛教以慈悲爲本。宏忍爲宗。普救衆生。誕登彼岸。故佛者覺也。能自覺而後覺人也。六塵不染。五蘊皆空。法界圓融。人天永受。此其所以超絕群倫也。然而臺灣之佛教。則愈失之。誣繙徒既乏高明。檀信亦少智慧。其所以建寺造像者。多存邀倖之心。求福利而禳禍災也。其下者則墜

入外道穢垢心身。歷萬劫而不起。此其可哀也。生有過去。有現在。有未來。是三者不能有因。而無果。因果之說。佛言之矣。是故苦海之中。當求自度。能自度。而後能度人也。臺灣齋堂之設。從者頗多。其派有三。曰先天。曰龍華。曰金幢。皆傳自惠能。而明代始分。先天之中。又分三乘。拋別家園。不事配偶。專行教化。是爲上乘。在家而出家。在塵不染塵。是爲中乘。隨緣隨俗。半凡半聖。是爲下乘。龍華之中。亦分九品。一曰小乘。二曰大乘。三曰三乘。四曰小引。五曰大引。六曰四偈。七曰清虛。八曰太空。九曰空空。金幢之教。但稱護法。餘爲大衆。三派入臺。以龍華爲首。金幢次之。先天最後。初乾隆季年。白蓮教作亂。蔓延四省。用兵數載。詔毀天下齋堂。時郡治樣仔林有龍華之派。聚徒授經。乃改爲培英書院。道光以來。漸事傳播。迨咸豐間。有黃昌成李昌晉者。爲先天之徒。來自福建。昌成在南。建報恩堂於右營埔。而昌晉往北。各興其教。至今頗盛。全臺齋堂。新竹爲多。彰化次之。而又以婦女爲衆。半屬懺悔。且有守貞不字者。夫齋徒以脩淨爲主。禁殺生。絕五辛。可謂能清其體矣。清其體。而後能澄其心。澄其心。而後能絕其慮。絕其慮。而後能明其性。明其性。而後能通其道。通其道。而後可以悟生死。解輪迴。自度而度人也。然而齋徒每多執著。獨善其身。不以衆生爲念。夫獨善可也。佛說所有一

切衆生之類。我皆令人無餘涅槃而滅度之。如是方可爲佛。若乃假藉淨脩。潛行邪慝。情緣未泯。穢德彰聞。則又佛教之罪人也。臺灣居家婦女。多持觀音之齋。逢九之日。必絕暈。又有早齋。有朔望之齋。有元日之齋。若九皇之齋。則男女多持之。禮祭天地。祀百神。先日齋戒。天子徹樂。諸侯止刑。大夫息政。士省身。庶人慎粟。所以潔心志而通幽冥也。持齋之益。可以攝生。可以修德。可以阜財。可以愛物。非僅爲祭祀之儀。而愚民不察。以爲成佛之道。味矣。初臺南郡治呂祖祠。有比邱尼。頗玷清規。郡人逐之。改爲引心書院。自是遂絕。而臺灣佛教亦漸式微矣。

景教

景教有二。曰新教。則基督。曰舊教。則天主。兩派入臺。皆在有明之季。當荷人據臺時。大布福音。以牖土番。建教堂。設學校。譯聖經。授十誡。三十年間。實收其效。當是時。牧師之權特大。擯斥異教。凡拜偶像者。擬定其罪。當衆笞之。荷蘭評議會以爲苛。不可。而西班牙據北鄙。亦布景教。其神甫且遠入蛤仔難。南至竹塹。爲聖神之使者。以感化番人。事各在教育志。然北番性悍。搏人若猛獸。不若南番之馴。故西人之感化。亦未易爲也。延平旣至。荷人出降。牧師之

在番社者。或留其間。而鄭氏仍保之。當是時。意大利神甫李科羅在廈布教。延平禮之。待以上客。克臺之後。召之來。使赴呂宋。謀征略。及歸。延平已薨。遂居東寧。永歷二十年。呂宋來聘。請傳教。諮議參軍陳永華不許。乃申通商之約。歸清以後。閉關自守。禁烟之役。浸啓兵戎。而民間之攘夷者。且與阿片同禁。天津之約。開口通商。西人漸來。新舊教會亦傳播。同治元年。有西班牙人至鳳山。力社設天主教堂。以社番爲同宗。而勾引之。無賴之徒。又爲疏附。於是力力赤山加匏朗三社入教者二百餘人。事聞。鳳山知縣派員偕下淡水縣丞往查。召通事潘永泉。土目潘岐山等。告以此地非通商之埠。外人不得居住。逐之出。而西班牙人乃遷於旗後近附之前金莊。四年。英國長老教會亦派牧師馬雅谷來臺。雅谷精刀圭術。以藥醫人。而傳其教。設教堂於府治看西街。從者頗多。仇教者肆爲蜚語。以排擠之。有司慮禍。照會英領事。請移口岸。雅谷乃去之。旗後別設教堂於鳳治。聚徒傳播。相安無事。已而又派甘爲霖。盧加閱來臺。爲霖赴嘉義。而加閱往彰化。嘉彰非通商之地。見外人至。衆驚訝。每尾其行。加閱乃之岸裡大社。岸裡在葫蘆墩之西。土番郡落也。族大丁多。林爽文之役。效命軍前。頗有功。見而款之。獻其室爲教堂。加閱亦能醫。遂設醫院。社番多就之。初爲霖在嘉傳教。從者

少。至店仔口莊。莊豪吳志高。喉人夜襲之。爲霖逃。伏叢莽中。數日始歸府治。七年八月。前金莊教堂以講教。故與村人齟齬。鳴金集衆。圍而攻之。鄉耆恐僨事。趣出止。風聲一播。鳳治之人亦一呼而集。至者數十。折屋毀物。殺教徒二。並捕堂丁高長以去。雅谷在旗後。聞警將往。而旗後教堂亦被困。商人乃出解之。始城中兒每遺失。或言洋人潛殺。剖其腦製藥。雅谷固業醫。縣役猫角命人盜童骸埋之室中。計欲以實其事。翌日。知縣凌定國往勘。觀者如堵。猫角又力言。堀地及室。見白骨。信之。拘長嚴鞠。不服。下之獄。以狀白郡。並照會英領事。領事以爲誣。馳稟駐京公使。與總理衙門交涉。各執一辭。乃命興泉永道曾獻德偕廈門英領事吉普理渡臺會辨。諗爲猫角所爲。定其罪。流於泉州。償工費千兩。並恤死者之家。案始結。當鳳山教案之起也。郡中莠民聞之。快越三日。亦毀小東門內天主教堂。神甫走逸民家。有司聞警彈壓。衆始散。嗣援鳳山之例以償。而民教稍安矣。雅谷既居府治。益盡心傳教。設教堂於大東門之內。傳授醫術。於是西醫之名聞遠邇。又以上海翻譯西籍。頒之會中。教徒漸知天下大勢。或派子弟肄業於福州香港。攻英文。習西學。以造就人才。然其所學。僅爲景教之學。尙無益於人群也。教徒之中。又多拘囿。臺人敬天法祖禮百神。而肆爲抨擊。欲舉數千年歷

聖相承之綱紀而悉毀棄此其所以鑿柄也。爲霖旣居府治。察民情。習漢語。數年乃之埔里社。亦土番部落也。時尙未設廳。備嘗險阻。以傳其教。故得今日之盛。十一年坎拿太長老教會亦派牧師偕里士至淡水傳教。光緒八年八月。擬照中國義塾。延師設學。以教貧寒子弟。兵備道劉璈以外人設學育才。實爲義舉。特以教學與游藝不同。此端一開。誠恐逐漸推廣。致歧趨向。且以中國之子弟。而受外人之栽培。官斯土者能無歉然。乃議延師束修。歲由臺北府支送。遇有甄別。會同領事官酌給獎賞。以存體制。自是以來。新教漸行。而舊教尙弱。蓋自大甲以南爲倫敦教會。以北爲坎拿太也。法人之役。基隆失守。臺北士民同仇敵愾。而無賴以爲教徒勾引。大呼而起。往燬八甲教堂。已而枋寮錫口亦遭火事。後英領事照會地方官。請保護。乃以萬圓償之。十七年。荷蘭政府以臺灣爲舊時屬地。議派教士再來傳教。以與英西相角逐。嗣以有故而止。

回教

回教之傳。臺灣絕少。其信奉者僅爲外省之人。故臺灣尙無清真之寺也。

連橫曰。宗教之事。各地俱有。所處不同。卽所祀之神亦異。是故山居者祀虎。水居者祀龍。陸

居者祀牛。澤居者祀蛇。則不得以祀虎者爲是。而祀龍者爲非。跡其所以崇奉之者。莫不出於介福禳禍之心。而以此爲神也。夫臺灣之人。閩粵之人也。而又有漳泉之分也。粵人所至之地。多祀三山國王。而漳人則祀開漳聖王。泉人則祀保生大帝。是皆其鄉之神。所以介福禳禍也。若夫士子之祀文昌。商人之祀關帝。農家之祀社公。藥舖之祀神農。木工之祀魯般。日者之祀鬼谷。所業不同。卽所祀亦異。是皆有追遠報本之意。而不敢忘其先德也。

臺灣廟宇表表中所列多屬治內其在鄉里者多略之

臺南府附郭安平

小南天在府治番諸崎上祀社公當荷人時華人多居於此地爲小邱下有溪流水潺湲西入於海所謂竹仔行也其後漸建市廛而廟仍在相傳廟額三字爲明寧靖王手書今已非舊

開山宮在府治內新街鄭氏時建祀隋虎賁中郎將陳稜乾隆五年脩而舊志以爲吳真人且謂臺多漳泉人以其神醫建廟獨盛夫吳真人一醫者爾何得當此開山之號鄭氏之時追溯往哲以稜有開臺之功故建此廟而今又誤爲開仙宮更屬不通

興濟宮在府治鎮北坊鄭氏時建祀吳真人稱保生大帝神名本福建同安白礁人生於宋太平興國四年茹素絕色

精醫術以藥濟人廉恕不苟取景祐二年卒里人祀之有禱輒應勅賜慈濟慶元間復勅爲忠顯開禧二年封英惠侯北極殿在東安坊鄭氏時建祀北極真君或稱玄天上帝按玄武北方七宿也其像龜蛇

東嶽廟在東安坊鄭氏時建祀東嶽泰山之神康熙間脩乾隆十六年舉人許志剛等重修

馬王廟在東安坊鄭氏時建祀天驕之神而俗以爲輔信將軍

總管官在西定坊鄭氏時建神倪姓軼其名爲海船總管歿而爲神又一大西門外中樓仔街康熙三十年巡道高

拱乾建

天公壇在西定坊祀玉皇上帝

三官堂在寧南坊乾隆四十三年建祀三官

五帝廟在寧南坊康熙時建祀五顯大帝又稱五顯靈官

藥王廟在西定坊康熙時邑人建祀神農

水仙宮在西定坊面海康熙五十四年漳泉商郊建祀五神莫詳姓氏或以爲大禹伍員屈平而二人爲項籍魯班

或易以王勃李白按禹平水土功在萬世伍相浮江屈子投汨人以爲忠祀之可也項籍魯班何足當此王勃李白亦不宜余意苟欲實之不如改祀伯益及冥夫禹之治水也益烈山澤其功相若冥勤其官而水死般人祀之皆有合

於五祀者也乾隆六年脩旁有三益堂爲郊商集議之所歷年積款甚多置產生息故其壯麗冠於他廟

奎樓在臺澎道署東南隅雍正四年建祀魁星下爲闕帝廳旁爲觀音堂又名奎樓書院爲士人集議之所

海安宮在大西門外濱海西向乾隆五十三年大將軍福康安建祀天后而府治之祀天后者尙有數處

開漳聖王廟在大南門內咸豐元年漳籍紳商合建祀開漳聖王按王陳元光唐末爲福建觀察使王審知部將帥

軍入漳逐土黎以處華人築寨於龍溪柳江之西置唐化里因爲將軍知州事漳州之開開始於此故漳人多祀之

精忠廟在東安坊祀宋岳忠武王

三山國王廟在鎮北坊雍正七年知縣楊元璽游擊林夢熊率潮州商民建祀潮州中山明山獨山之神三山皆在

揭陽縣界

普濟殿在西定坊祀王爺

元和宮在鎮北坊大銃街祀吳真人

良皇宮在鎮北坊祀吳真人

彌陀寺在大東門內明延平郡王鄭經建康熙五十七年里人董大彩脩五十八年武夷僧一峯募建西堂里人陳仕

俊復增建之殿宇寬敞花木幽邃爲郡治冠

觀音亭在鎮北坊鄭氏時建康熙三十二年脩乾隆五十六年里人陳漳山等重脩

海會寺在縣轄永康里距大北門三里爲鄭氏之北園別墅康熙二十九年巡道王效宗總兵王化行改建爲寺有碑

記尙存置田五十甲園六甲棧圃一所以供香火延僧志中主之花木幽邃殿宇巍峩爲諸寺冠乾隆十五年巡道書

成脩改名榴禪嘉慶元年提督哈當阿重脩又改名海靖亦曰開元其後疊脩寺祀釋迦佛並供明延平郡王神位

黃蘗寺在大北門外康熙二十七年左營守備孟大志建三十一年火三十二寺僧募建地大境幽題詠者多今圯

竹溪寺在大南門外康熙三十年建徑曲林幽清溪環拱頗稱勝概顏其山門曰小西天乾隆五十四年里人蔡和生

倡脩嘉慶元年重脩

法華寺卽夢蝶園故址康熙二十二年改爲寺知府蔣毓英以寺後之地二甲爲香火乾隆二十九年知府蔣允焄重

建並於寺前浚一池曰南湖旁造一樓曰半月

廣慈庵在東安坊康熙三十一年建

慈雲閣在東安坊康熙三十五年諸羅知縣周鍾瑄建乾隆十六年諸羅知縣周芬斗脩嘉慶八年里人王琳等重脩

龍山寺在大東門外雍正時里人公建乾隆五十四年里人王拱照等脩

清水寺在東安坊

萬壽寺在城東永康里康熙五十年建萬壽亭爲朝賀之地雍正元年重建後置僧舍供佛置香火田五十甲乾隆三十年新建萬壽宮於城內而寺仍存然以寺租撥歸崇文書院漸就傾頽今圯

大士殿在鎮北坊海神廟之右光緒十二年建

白龍庵在鎮署之右福州人建祀五福大帝則瘟神也後於亭仔脚街別立扶鸞之所曰西來庵

臨水夫人廟在東安坊

五妃廟在大南門外桂子山康熙年間邑人就明五妃之墓建廟乾隆十一年巡臺御史六十七范咸命海防同知方邦基脩之並刊其詩於石立於大南門城畔今存

辜孝婦廟在東安坊邑人建祀辜氏婦事見列傳其後祀黃寶姑

嘉義縣

龍湖巖在縣轄赤山堡六甲莊鄭氏時謫議參軍陳永華建其前有潭曰龍湖花木幽邃稱勝境乾隆元年六甲莊人文超水漆林莊人蔡壯猷募款重建並祀延平郡王

碧雲寺在縣轄哆囉嘓堡之火山康熙十四年僧參徹自福建來住錫龍湖巖偶至此地以其山林之佳遂闢茅結廬

奉龍湖巖之佛祀之朝夕誦經持戒甚固附近莊人乃謀建寺曰大仙巖嗣命其徒鶴齡居之又建一寺於玉案山之

順後祀如來而前奉延平郡王神位乾隆五十五年二月參徹沒衆葬之寺前建浮屠五十六年邑人洪志商募脩嘉慶二十四年子爵王得祿重脩

鳳山縣

雙慈亭在縣治俗稱大廟建於乾隆初年道光八年重脩前祀觀音後祀天后故曰雙慈

寧靖王廟在縣轄維新里竹窰莊田爲王所闢薨後與元妃羅氏合葬於此個人建廟立像祀至今莊人猶稱老祖每年以七月二十七日九月二十五日致祭廟前古榕兩株蔭大數畝境極清闊

超峯寺在縣轄嘉祥外里崗山之上舊志以崗山樹色爲邑八景之一雍正間有僧紹光者結茅於此乾隆二十八年知府蔣允焄乃建爲寺

興隆寺在舊治龜山之麓則興隆里康熙三十三年建

元興寺在縣轄打鼓山之麓乾隆八年僧經元募建光緒十七年火

清水巖寺在縣治之南則鳳山也縣志稱鳳山有十三勝而清水巖其一道光十四年鄉董簡立募建

澎湖廳

水仙宮在媽宮澳渡頭康熙三十五年右營游擊薛奎建光緒元年媽宮街商人重脩

觀音亭在媽宮澳康熙三十五年右營游擊薛奎建法人之役佛像被毀光緒十七年總兵吳宏洛捐脩

地藏廟在媽宮澳武忠祠之畔

眞武廟在媽宮澳乾隆五十六年通判蔣曾年副將黃象新等捐脩光緒元年董事高其華重脩

祖師廟在廳治東三里許祀清水巖祖師應志云康熙間有僧自泉州清水巖至此不言其名爲人治病有神效不取

藥資酬以錢米亦不受去後里人思之立廟以祀

眞人廟祀保生大帝各澳多建廟

將軍廟在八罩嶼網坡神之姓名事跡無考澳之得名亦因此廟府志云豈隨開皇中虎賁陳稜略地至此因祀之歟

按將軍澳之名已久是此廟應建於明代惜無文獻足徵爾

大王廟一在八罩嶼一在龍門港一在通梁澳各澳亦有澎湖紀略以爲金龍大王之類亦土神之類也西嶼之神尤著靈

異海舶出入必備牲醴投之海中祀之

臺灣府附郭臺灣

天后廟在府治大墩街

彰化縣

慶安宮在縣治東門內嘉慶二十二年建祀吳真人

定光廟在北門內乾隆二十七年北路營副將張世英建祀定光佛

威惠官在南門內雍正十年漳籍人士合建祀開漳聖王

開化寺在北門內雍正二年知縣談經正倡建祀觀世音爲彰化最古之寺

虎山巖在燕霧上堡白沙坑莊乾隆十二年里人賴光高建虎巖聽竹爲邑八景之一

清水巖在武東堡許厝莊乾隆初建寺在大武郡山之麓邱壑林泉頗饒幽趣故清水春光爲邑八景之一

雲林縣

沙連宮在縣轄東埔廩街咸豐六年十一月生員劉漢中倡建祀明延平郡王規模宏敞香火甚盛光緒十三年生員

劉士芳等重修又一在林圯埔街

廣福宮在縣治西南祀開漳聖王光緒十九年紳士陳一尊倡修

吳鳳廟在縣轄嘉義東堡社口莊嘉慶二十五年莊人楊祿等建祀阿里山通事吳鳳事見列傳光緒十八年邑人請

列祀典未准

三山國王廟在縣治南隅粵籍九莊合建

臺北府附郭淡水

霞海城隍廟原在大佳臘堡八甲街爲霞海人合建成豐二年械鬪街燬移建於大稻埕

龍山寺在艋舺街西南乾隆三年建爲府治最古之寺嘉慶二十年地震悉圯再建

慈聖宮在大稻埕同治五年郊商合建祀天上聖母

保安宮在大佳臘堡大隆同街

惠濟宮在芝蘭一堡石角莊之芝山巖乾隆五十三年芝蘭莊人吳慶三等建祀開漳聖王其地小邱獨立石蹬數十

級關一門右有片石刻洞天福地四字

文昌祠在惠濟宮之傍道光二十年里人潘定民建祀文昌

劍潭寺在芝蘭一堡劍潭之畔臺灣志略謂潭有樹大可數抱相傳荷人插劍於樹故名鄭氏之時華人之居此者結

茅祀佛至乾隆三十八年僧榮華募資新建

西雲巖寺在八里坌堡觀音山之麓曰獅頭巖乾隆三十三年胡林獻地建寺一名大士觀山高二千餘尺中峯竝立

自遠望之宛如觀音跌坐寺外有反經石二其一形如馬鞍每置羅經盤於上則子午針反向爲卯酉故名

文昌廟在擺接堡枋橋莊同治二年莊人林維源建

廣濟宮在擺接堡枋寮莊雍正間開墾之人合建爲該堡最古之廟

慈祐宮在興直堡新莊街康熙二十五年建祀天上聖母

文昌廟在興直堡新莊街嘉慶十八年縣丞曾汝霖捐建

武聖宮在興直堡新莊街乾隆二十五年貢生胡焯猷建祀漢漢壽亭侯關羽

先齋宮在興直堡二重埔莊乾隆二十一年建祀先農

龍山寺在縣轄滬尾街乾隆間建規模頗大光緒十二年巡撫劉銘傳奏請賜匾御書慈航普度四字懸於寺中今存

福祐宮在縣轄滬尾街乾隆間建祀天上聖母光緒十二年巡撫劉銘傳奏請賜匾御書翼天昭佑四字懸於廟中今

猶存

慈生宮在芝蘭二堡噶里岸莊永歷二十三年龍溪同安兩縣來此之人合建祀五穀大帝三官大帝天上聖母福德

正神爲縣轄最古之廟蓋該地原爲番地故移墾之人建廟祀神以祈景福也乾隆四十四年水災毀塌莊人重建其

後疊修

三將軍廟在芝蘭二堡噶喇別莊關渡康熙五十四年莊民合建祀鄭氏部將中提督劉國軒左武衛何祐智武鎮

李茂以其有功北鄙也每年四月十七日致祭香火頗盛

關渡宮在芝蘭二堡關渡祀天上聖母俗稱關渡媽祖香火頗盛康熙五十六年漳泉興化之人合建乾隆四十七年重建

寶藏巖卽石壁潭寺在拳山堡下臨新店溪境絕幽靜康熙間郭治亨捨園爲寺與康公合建其後治亨之子佛求則爲寺僧

新竹縣

長和宮在縣治北門口街乾隆七年同知莊年守備陳士挺合建祀天后嘉慶二十四年脩

水仙宮在長和宮之側同治二年郊商捐建祀夏禹

地藏庵又稱嶽帝廟在東門後街道光八年同知李慎彝守備洪志宏倡建祀地藏菩薩並東嶽大帝

天公壇在東門內咸豐元年建祀玉皇上帝

北極殿在竹北一堡蘆竹莊道光九年林功成倡建祀玄天上帝

金闕殿在竹北一堡客雅莊乾隆間建祀玉皇上帝後祀三官

慈天宮在竹北一堡北埔莊先是金廣福設隘墾田嘗祈神佑至咸豐三年乃建廟中祀釋迦配以天上聖母神農大

帝文昌帝君三山國王諸神而旁祀淡水同知李嗣業墾首姜秀鑾姜榮華三人同治十三年脩

文昌祠在竹北一堡新埔莊道光二十三年舉人陳學光倡建祀文昌春秋致祭並爲鄉人士文社

文武廟在竹南一堡大南埔莊道光二十五年建祀漢忠義侯關羽

文林閣在竹北一堡高梯莊光緒二年建祀文昌爲鄉中學宮

五穀大帝廟在竹南一堡五穀王莊嘉慶二年業戶張徽陽等倡建祀神農

三山國王廟在竹北一堡樹杞林莊嘉慶十五年開墾粵人建同治九年脩此外尚有數處均爲粵莊所祀

三聖宮在竹南一堡頂街頭莊咸豐四年建祀開漳聖王開臺聖王保生大帝

龍鳳宮在竹南一堡草店尾街祀王審知稱開閩聖王按審知河南固始人唐末爲福建觀察使帥軍入閩平亂封瑯

琊王固始人從之者衆唐亡天下俶擾遂自立稱閩王臺多漳泉人故祀之

褒忠廟在竹北二堡枋寮莊稱義民亭先是朱一貴吳福生等役各縣俱建義民祠春秋致祭而林爽文之役莊人赴

義而沒者頗多詔賜褒忠之額乃建此亭五十三年林先押等建廟以祀粵籍義民並祀三山國王同治二年巡撫徐

宗幹晉同心報國之額光緒十四年巡撫劉銘傳亦晉赴義捐軀之額

集義亭在竹北二堡新埔莊光緒三年建祀死事義勇

褒忠祠在竹南一堡頭份莊光緒十年頭份以南百二十莊人張維垣等捐資萬金合建祀朱一貴吳福生林爽文等

役死事義勇

軍大王廟在竹北一堡埔尾莊同治六年莊人建以祀先民無以名之而稱爲軍大王按此地原爲番界瘴厲披猖而我先民冒危難闢土田以殞沒於斯者不知凡幾故後人建廟祀之以妥其靈亦以追念遺烈也光緒十五年重建萬善廟在竹北一堡大窩莊先是咸豐五年莊人建於三重埔莊以祀拓殖番地而死之人光緒三年改建於此

竹蓮寺在南門巡司埔祀觀世音先是移民初至僅建小刹其後業戶王世傑乃捐地以建爲新竹最古之寺道光五年紳士林紹賢脩之迨同知五年紳士莊榮陸湯奇才等又募捐重建

金山禪寺在竹北一堡金山面莊乾隆五十年郭陳蘇三姓始設隘防事開墾結茅祀佛以祈福佑咸豐三年乃建寺曰香蓮庵同治間復建之以寺前有泉稱靈泉寺又名金山禪寺

臺灣通史卷二十三

臺南 連雅堂 撰

風俗志

連橫曰。六藝聖人之書也。是故禮以節人。樂以發和。書以道事。詩以達意。易以道化。春秋以道義。撥亂世反之正。莫近於春秋。春秋之時。王熄詩亡。孔子傷焉。故爲其書。以究天人之際。通古今之變。其用弘矣。夫拘於天者。不足以治人。泥於古者。不足以制今。風俗之成。或數百年。或數十年。或遠至千年。潛移默化。中於人心。而萃爲群德。故其所以繫於民族者寔大。夫夏人尙忠。殷人尙質。周人尙文。一代之興。各有制作。是故食稻者其人柔。食麥者其人剛。食稷者其人狹。所食不同。而秉氣異焉。臺灣之人。中國之人也。而又閩粵之族也。閩居近海。粵宅山陬。所處不同。而風俗亦異。故閩之人多進取。而粵之人重保存。唯進取故其志大。其行肆。而或流於虛。唯保存故其志堅。其行陋。而或近於隘。是皆有一偏之德。而不可以易者也。

緬懷在昔。我祖我宗。橫大海。入荒陬。臨危禦難。以長殖此土。其猶清教徒之遠拓美洲。而不忍爲之輿隸也。故其輕生好勇。慷慨悲歌。十世之後。猶有存者。此則群德之不墜。而有繫於風俗焉。豈小也哉。

歲時

立春之前一日。有司豫塑春牛。置於東郊之外。至日往迓。謂之迎春。男女盛服。觀衣香扇影。雜喧滿道。春牛過處。兒童爭摸其耳。或鞭其身。謂可得福。迎春如在歲首。尤形鬧熱。宛然太平景象也。

元旦。各家先潔室內。換桃符。鋪設一新。三更後。開門祀神。燃華燭。放爆竹。謂之開春。次拜長上。晉頌辭。出門訪友。投刺賀。見面道吉祥語。客至。饗以甜料檳榔。一品卽行。親友之兒女。至以紅線串錢贈之。或百文數十文。謂之結帶。是日各家皆食米丸。以取團圓之意。或絕暈祀井門。竈爆竹之聲。日夜不絕。

初二日。祭祖於家。新婚者。以是早往外家賀春。設宴饗之。婿歸贈以儀。初三日。出郊展墓。祭以年糕甜料。自是日至暮春。墦間之地。往來不絕。

初四日。備牲設醴。燒紙馬。謂之接神。市肆始開門貿易。

初九日。傳爲玉皇誕辰。各街演劇致祭。自元旦至望日。搢紳之家。多設筵宴客。互相酬酢。蓋取春酒介壽之意。

元宵之夕。自城市以及鄉里。點燈結彩。大放烟火。競演龍燈。士女出游。笙歌達旦。各街多設廟會。而臺南郡治三山國王廟。則開賽花之會。陳列水仙數百盆。評其優劣。亦雅事也。赤嵌筆談謂元宵未字之女。偷折人家花枝竹葉。爲人詬詈。以爲異日必得佳婿。此風今已無矣。二月初二日。爲社公辰。各街多釀資致祭。群聚讌飲。謂之頭衙。而以十二月十六日爲尾衙。頭始也。尾終也。衙集也。謂春東作而初集也。故鄉中尤盛。商賈亦然。

三月初三日。古曰上巳。漳人謂之三日節。祀祖祭墓。而泉人以清明祭墓。謂之嘗墓。嘗春祭也。祭以餠餅。治牲醴。掛紙錢。歸乃食之。餠餅以麵爲衣。內裹蔬肉。炸油者謂之春餅。嘗墓之禮。富貴家歲一行之。常人則兩三年一行。婦孺歸時。各插榕枝於髻。以祓不祥。三月十九日。傳爲太陽誕辰。寔則有明。思宗殉國之日也。以麵製豚羊。豚九頭。羊十六頭。猶有太牢之禮。望東祭之。帝出乎震也。家家點燈。欲其明也。亡國之思。悠然遠矣。

二十三日。天后誕辰。南北鄉人多赴北港晉香。粵莊尤盛。自春初至月杪。旗影鸞聲。相續於道。晉香之人。盜不敢劫。劫之恐神譴也。

五月初五日。古曰端午。臺人謂之午日節。插蒲於門。蒲艾爲湯。以角黍時果祀祖。婦女帶繭虎。以五色絲製烏獸花果之屬。兒童佩之。謂可辟邪。沿海競鬪龍舟。寺廟海舶皆鳴鑼擊鼓。謂之龍船鼓。從前臺南商務盛時。郊商各釀金製錦標。每標值數十金。先數日以鼓吹迎之。各選健兒鬪捷。觀者滿岸。數日始罷。

六月初一日。人家以米丸祀祖。謂之半年丸。或以望日行之。

七月初一日。謂之開獄門。各家致祭。自是日至月杪。坊里輪流普度。延僧禮懺。大施餓鬼。先放水燈。以照幽魂。尙鬼之俗。漳泉爲甚。糜錢巨萬。牢不可破。

七月初七日。古曰七夕。士子供祀魁星。祭以羊首。上加紅蟳。謂之解元。值東者持歸告兆。以羊有角爲解。而蟳形若元字也。富厚之家。子女年達十六歲者。糊一紙亭。祀織女。刑牲設醴。以祝成人。親友賀之。入夜。婦女陳花果於庭。祀雙星。猶古之乞巧也。

十五日。謂之中元。臺人以清明爲春祭。中元爲秋祭。冬至爲冬祭。各祀其祖。必誠必腆。非是

者幾不足以爲人子孫。

八月十五日。謂之中秋。各祭社公。張燈演戲。與二月初二日同。春祈而秋報也。兒童建塔點燈。陳列古玩。士子遞爲謙飲。製月餅。硃書元字。擲四紅奪之。以取秋闈奪元之兆。夜深時。婦女聽香。以下休咎。

九月初九日。謂之重陽。以麻粢祀祖。兒童放紙鳶。繫以風箏。自朔日起。人家多持齋。曰九皇齋。泉籍爲尙。

十月十五日。謂之下元。人家有祀神者。

冬至之日。祀祖。以米丸粘門戶。前一夕。兒童塑雞豕等物。謂之添歲。猶古之亞歲也。

十二月十六日。祀社公。謂之尾衙。工人尤盛。以一年操作至是將散也。而鄉塾亦以上元開課。尾衙放假。外出之人多歸家度歲。

二十四日。治牲醴。焚紙馬。各祭所祀之神。謂之送神。至明年正月初四日。如前儀。謂之接神。翌日以爲天神下降。鑒察人間善惡。莫敢褻黷。語言必慎。

除夕之日。以年糕祀祖。并祭宅神門竈。以飯一盂。菜一盂。置於神位之前。上插紅春花。以示

餘糧之意。先數日。親友各饋物。是夕燃華獨。放爆竹。謂之辭年。閤家圍爐聚飲。爐畔環錢。既畢。各取錢去。曰過年錢。陳設室內。以待新年。

宮室

臺灣宮室。多從漳泉。城市之中。悉建瓦屋。以磚壘牆。比隣而居。層樓尙少。以地常震。故其棟梁必堅。椽桷必密。可歷百數十年而不壞。堂構之謀。其慮遠矣。

富厚之家。各建巨厦。環以牆。入門爲庭。升階爲室。大約一廳四房。房爲兩廂。廳之大者廣約一丈八尺。上祀神祇。或祀祖先。可爲慶賀宴饗之用。房之左。長輩居之。婢僕居於兩廂。合族而處者。則巨厦相連。旁通曲達也。

鄉村之屋。架竹編茅。亦有瓦屋。土墜爲牆。久而愈固。棘籬環之。以畜雞豚。所謂五畝之宅也。前時墾地之人相聚而居。外築土圍。以禦番害。故謂之堡。而澎湖則處於水隈。故謂之澳。所謂四隩旣宅者也。

澎湖近海。築牆皆用硃砧。生於水濱。似石而脆。螺蚌巢之。亦可煨灰。價廉用廣。取之不竭。以船載來。府治亦有用者。

臺灣雖產材木。而架屋之杉。多取福建上游。磚瓦亦自漳泉而來。南北各處間有自燒。其色多赤。

屋脊之上。或立土偶。騎馬彎弓。狀甚威猛。是爲蚩尤。謂可壓勝。而隘巷之口。有石旁立。刻石敢當三字。是則古之勇士。可以殺鬼者也。

臺之富家。少建庭園。或於宅內略植花木。然如臺南府治吳氏之園。亭臺水石。布置甚佳。而飛來峰尤勝。壘石爲山。幽邃曲折。雖居城市之中。而有邱壑之趣。若竹塹林氏之潛園。則爲一時觴詠之地。文酒風流。及今已泯。而霧峰林氏之萊園。依山築室。古木蕭森。頗有自然之妙也。

衣服

臺灣多燠。南北稍殊。夏葛冬裘。儘堪度歲。故無狐貉之需。而仕宦之帶來者。僅於迎春用之。然春日載陽。野花已放。負暄之獻。汗流浹背矣。

南北氣候。大甲爲界。大甲以下。愈南愈暖。至恒春而燠。故冬不衣裘。其上則愈北愈寒。基隆亦有積雪。今則人烟日盛。地氣爲溫。立夏以後。全臺俱熱。皆衣葛布矣。

地不種棉。故無紡績。尺縷寸帛。皆自外來。而男女多用素布。鄉村則尚青黑。以其不易緇也。青黑之布。各地自染。澣之不褪。外省之人甚珍重。以爲土宜。蓋以溪水清澈。白能受色也。沿海漁戶。悉以薯榔染衣。其色爲赭。渝水不垢。所業不同。則所服亦異。固可一望而知也。

綢緞之屬。來自江浙。紳富用之。建省以後。杭綾盛行。局緞次之。大都以藍爲袍。以玄爲褂。亦有怡紅公子。慘綠少年。爭華競美。月異日新。則五花十色。所尚不同矣。

海通以後。洋布大消。呢羽之類。其來無窮。而花布尤盛。色樣翻新。婦女多喜用之。若泉州之白布。福州之綠布。寧波之紫花布。尙消行於鄉村也。

衣服之式。以時而易。從前男子之衣。皆長過膝。袖寬四五寸。自同治季年以來。衣則漸短。而袖漸寬。有至一尺二寸者。今則漸復其初矣。

紅閨少婦。繡閣嬌娃。選色取材。皆從時尚。臺灣以紅爲瑞。每有慶賀。皆着紅裙。雖老亦然。嫠婦側室。則不得服。其禮稍殺。

男女成婚之時。先卜吉日。延福命婦人。以白布爲製衣袴。謂之上頭服。取其潔也。婚後收之。沒時以此爲殮。

漳泉婦女大都纏足。以小爲美。三寸弓鞋。繡造極工。而粵人則否。耕田力役。無異男子。平時且多跣足。粵籍業農。群處山中。其風儉樸。故衣青黑之布。婦女之衣。僅以本色爲緣。而袴相同。每出門。以黑布覆髻上。纏繞項後。俗不着裙。富家亦然。以其便於操作也。沿海多風。近山多瘴。商工農漁。皆裹黑布。而士子則戴小帽。衣長衣。有事必加短褂。彬彬乎儒雅之林也。

鞋襪之屬。皆求之市。前時多自漳泉配來。亦有本地製者。建省以後。漸尙上海之式。粧飾之物。莫不皆然而摺紳之家。日趨奢美矣。

婦女首飾。多用金銀。一簪一珥。隨時而變。富家則尙珠玉。價值千金。纏足少艾。或以金環束脚。旁繫小鈴。丁冬之聲。自遠而至。月下花間。如聞環佩矣。

髻髻之式。城鄉不同。老少亦異。垂髻之女。年十四五。始有梳頭。或爲盤蛇之樣。或爲墜馬之形。而粵婦則高髻燕尾。別饒風韻。

前時婦女出門。必携雨傘。以遮其面。謂之含蕊傘。相傳爲朱紫陽治漳之俗。後則閣之如杖。尙持以行。而海通以後。改用布傘。以蔽炎日。

歸清以後。悉遵清制。而有三不降之約。則官降吏不降。男降女不降。生降死不降也。清代官服皆有品級。而胥吏仍舊。婚時。男子紅帽袍褂。而女子則珠冠霞佩。蟒襖角帶。端莊華麗。儼然明代之宮裝。若入殮之時。男女皆用明服。唯有功名者始從清制。故國之思。悠然遠矣。

飲食

臺灣產稻。故人皆食稻。自城市以及村莊。莫不日三餐。而多一粥二飯。富家既可自贍。貧者亦食地瓜。可無枵腹之憂。地瓜之種。來自呂宋。故名番薯。沙坡瘠土。均可播植。其價甚賤。而食之易飽。春夏之間。番薯盛出。掇爲細絲。長約寸餘。曝日乾之。謂之薯纖。以爲不時之需。而澎湖則長年食此。可謂饋貧之糧也。薯之爲物。可以生食。可以磨粉。可以釀酒。可以蒸糕。唯長食者。須和以鹽。始可消化。若羹以糖者。僅爲茶點而已。

稻之糯者爲朮。味甘性潤。可以磨粉。可以釀酒。可以蒸糕。臺人每逢時歲慶賀。必食米丸。以取團圓之意。則以糯米爲之也。端午之粽。重九之棗。冬至之包。度歲之糕。亦以糯米爲之。蓋臺灣產稻。故用稻多也。

麥爲溫帶之產。臺灣較少。其麥粉多來自他省。近則多用洋粉。製餅作麵。皆粉爲之。消用頗

宏歲時慶賀必用紅龜。象其形也。白者謂之饅頭。則喪祭爲之爾。糕餅之餡多用豆。或以麻或搗落花生爲末而和之。臺灣產糖。故食糖亦多也。

酒以成禮。祀神燕客多用老酒。以甬釀之。味甘而醜。陳者尤佳。故曰老酒。市上可沽。然不及家釀之美。老酒之紅者用於嫁娶。取其吉也。村莊之間。或以地瓜爲酒。其味較淡。而番社則以黍釀之。親朋相見。以此爲歡。亦既醉止。載歌載舞。頗有太古之風。番俗凡有罪者。課其牛酒。一飲之後。嫌疑盡釋。故無用刑之罰。而漢人之與媾和者。亦以牛酒。然番既嗜酒。酗飲之後。每至僨事。挾彈而出。殺人爲雄。其性然也。外省之酒。如北地之高梁。紹興之花朝。消用亦廣。海通以後。漸用洋酒。其數甚微。唯爲官紳酬酢之物。尙不至爲漏卮也。

臺灣之饌與閩粵同。沿海富魚蝦。而近山多麋鹿。故人皆食肉。饌之珍者爲魚翅爲鵝且。皆土產也。盛宴之時。必燒小豚。而粵莊則殺豬。以其首饗貴客。閩粵之中各有佳肴。唯嗜之不同爾。

故例禁殺耕牛。食之者寡。而談果報者。且以食牛有罪。蓋以祀天祭聖。始用太牢。平日未堪食此。以其有耕田之勞也。凡宰牛者。謂之牛戶。例須納稅。鄉間每私屠之。若遇祈雨求晴之

時。官必禁屠。而民間之建醮祀神者亦多斷暈。以寓齋戒之意。

樣爲臺南時果。未熟之時。削皮漬鹽。可以爲羞。或煮生魚。其味酸美。食之強胃。黃時汁多而甘。衆多嗜之。或以下酒。然非臺南人不知此味。赤嵌筆談謂臺人以波羅蜜煨肉。鳳梨煮肺。亦海外奇製。信不誣也。

番石榴亦名奈菱。遍生郊野。盛出之時。切皮棄子。和以油糖。下鹽少許。煮而食之。亦可下飯。檳榔可以辟瘴。故臺人多喜食之。親友往來。以此相餽。檳榔之子色青如棗。剖之爲二。和以萆葉石灰。啖之微辛。旣而回甘。久則齒黑。檳榔之性。棄積消濕。用以爲藥。近時食者較少。盈女郎競以皓齒相尙矣。檳榔之幹。其杪如筍。切絲炒肉。味尤甘美。臺人謂之半天筍。

臺灣果子最多。盛出之時。其價甚賤。而臺又出糖。故各處多製蜜餞。如新竹之萌薑。嘉義之梅李。鳳山之鳳梨糕。尤馳名。近數年來。旗後醫生林璣璋始以西法製鳳梨爲罐頭。售之他處。若能擴大規模。消用愈廣。亦利源也。

冠婚

成人之禮。男冠女笄。臺灣多以婚時行之。唯富厚之家。子女年達十六者。七夕之日。祀神祭

祖父師字之。戚友賀之。以紙製一亭。祀織女。以介景福。

議婚之時。媒氏送女庚帖於男家。書其年月日。三日內家中無事。然後訂盟。間有誤毀器物者。則改卜。亦古者問名之意也。

訂盟之日。男家以戒指贈女。附以糕餅之屬。母嫂親往。女奉茶。既定。女家留宴。或僅遣媒氏送之。

納采之禮。俗曰插簪。男家以金簪一對。繫朱絲。置於盒內。或用銀簪。視其貧富。具豚羊糕餅糖品鮮花老酒大燭之屬。媒氏乘轎前導。鼓吹送之。女家酬以糕餅時果。若香蕉鳳梨芋頭紅柑之類。各以其物分饋親友。

納徵之禮。俗曰完聘。男家具婚書聘金。介以鳳冠蟒襖衣裳繡靴金蠟珠花及大餅糖品之屬。送至女家。又以錫製檳榔兩座。每座四葉。一書二姓合婚。一書百年偕老。女家收一。復婚書以糕餅時果答之。又以紅帽緞靴袍褂鞋襪及荷包扇袋書籍筆硯之類饋婿。別以錫盒兩座。一植蓮蕉。一植石榴。以銀製榴實四顆。桂花數朶。繫紅絲纏繞枝頭。謂之連招貴子。男家種於庭際。以示昌盛。納徵之禮。略同納采。而臺南則同時行之。

請期之日。命媒氏送日課於女家。別具更儀。女家反之。更儀者催粧之禮也。

親迎之日。卜吉而冠。擇戚屬少女父母兄弟俱存者爲賓。倣古者筮日筮賓之禮也。婿坐堂上。置冠履新衣於竹篩。以香薰之。祓不祥也。賓三梳婿髮而加之冠。三加之義也。旣冠。拜先祖告廟也。次拜父母。無父母者主婚者代之。醮以酒。申戒辭。倣醮席也。次拜諸父兄長。皆答之。重成人也。是時女亦行笄禮。如前儀。唯賓用童子。旣畢。設筵以饒。女首坐。父母兄弟姊妹以次陪。酒三巡而徹。凡冠笄之禮。俗曰上頭。先以糯米磨爲大丸。上點以紅。分饋親友。是日合家食之。以取團圓之意。

親迎之時。婿具衣冠。乘大轎。圍紅綵。媒氏先導。鼓吹從之。以朋輩四人爲燦行。兩童子提燈。兩童子鳴鑼。皆乘轎。沿途放爆竹。雖遇官長不令避焉。凡納徵親迎。各具禮盤。一人肩之。先行以爲贊。盤內置豚羊肩各一。鹿脯兩片。明筋兩束。冬瓜冰糖各數斤。紅酒兩瓶。女家收之。答以糕餅時果之屬。唯親迎易鹿脯爲鴨。鴨形如雁。以行奠雁之禮。

婿至女家。駐轎於庭。款燦行者於別室。女弟三致茶湯。婿具儀答之。次致荷包。答以練裙。贈女弟以花炮。女盛粧出廳。父醮以酒。母命之立於堂中。向外而拱者三。婿答之。母爲着練裙。

父蒙以帕。婿退。花轎進門。紫姑扶女登轎。樂作而行。以兩童子提宮燈。乘轎前。媵婢從之。女家放爆竹。閉門。以示不歸之意。非親迎者。婿俟於堂。禮稍殺。

花轎之後。蓋以竹篩。朱畫八卦。避不祥也。既至少。駐於庭。一童子以盤奉雙柑。請新人出。婿揖之。女拱手答拜。紫姑扶出。豫請福命。婦人攜新人手。以一手擎竹篩覆之。足履紅氈。婿並行。直入洞房。以竹篩置床上。案上置銅鏡一。交拜訖。婿爲揭帕。并坐案前。燃華燭。飲合卺酒。翌日。紫姑歸。婦家傳語告成婚也。男家以鮮花糖包饋之。

三日。廟見。拜祖先。成婦道也。次拜舅姑。坐而受之。次拜伯叔諸母。立而答之。衆就坐。新婦獻茶。致履襪之屬。以爲贄。分卑幼以荷包。各答以儀。既畢。宴新婦於堂。諸母姊妹陪之。姑酌酒。數巡。徹席。送婦家。引新婦入廚房。親井臼。理蘋蘩之事。是日。婦家以食物餽女。命女弟致之。轉致之姑。別以首飾香奩之屬饋女。女弟乘轎往。鼓吹前導。婿迎入。坐於堂左。獻茶。少頃。導入房。俗曰探房。宴之。婿及新婦饋以儀。媵翁母亦饋之。又答以糕餅柑蕉之屬。

旋車之期。臺南以第四日。而各屬或以五。六日。七八日。先期外父母具柬。命女弟請之。婿與女偕來。鼓吹前導。至家。女先入。婿從之。合拜先祖。次拜外父母及諸父諸母。各具贄。反之。分

卑幼以儀受而不報。就坐獻茶。少頃開宴。婿居左。宴女於內。亦居左。畢辭歸。外母率眷屬出見。婿揖之。外父以席送婿家。報前貺也。饋婿以儀及米糕糖豆大餅紅桃時菓之屬。又以雞雞兩對置轎中。婿家畜之。以寓蕃衍之意。

凡新婚。戚友致賀。以三日宴女賓。四日宴男賓。數月之後。兩家有慶。乃具筵相宴。是爲會親之禮。

喪祭

父母病篤。置床堂左。謂之搬鋪。易簣之義也。既絕。乃哭。披髮袒臂。跣足擗踊。少須分告戚屬。既嫁之女。聞喪卽歸。望閭而哭。越日乃殮。

將殮。梳沐襲衣含飯。設坐堂中。備物以祭。謂之辭生。既畢。子女扶就殮。憑棺哭。親友臨弔。設靈於堂。早夜哭。朝夕上飯。七日一祭。謂之一旬。七旬卒哭。延僧禮懺。入夜徹靈。凡喪視家之有無。或三旬而徹。或百日而徹。卑幼之禮稍殺。

三旬之日。女婿祭之。以祭品分致戚屬。而親友之奠者。多在卒哭。

謝弔以夜。孝男具喪服。一人持燈。至門。免冠拜。置帖門縫。不敢見也。分胙於人。謂之答紙。

除靈之時。收魂帛於匣。祭時乃啓。期而小祥。再期而大祥。朔望朝夕奠。禫猶素服。餘哀未忘也。

凡葬於卒哭之後者。前三日舉哀。朝夕奠。曰開堂。親友畢弔。曰辭堂。厥明移柩。舉奠出門。魂轎香亭之屬畢具。以一人在前放紙。鼓樂從之。富家或糊方相。裝鬼卒。謂之開路神。至墓焚之。親友白衣送。或祭於道左。謝以帛。將至。孝男跪謝。親友返。各謝以帛。葬之時。孝男撮土。既畢。題主設祭。而反。至家設坐以祭。三日。至墓謝土。

大祥以二十四月爲期。而臺人有計閏扣除者。謂死者無閏。唯縉紳家乃遵制行之。忌辰必祭。生日亦祭。富厚之家且有演劇置酒者。謂之陰壽。戚友亦具禮賀之。非禮也。

清明之日。祭於宗祠。冬至亦然。祭畢飲福。小宗之祠。一族共之。大宗則合同姓而建。各置祀田。公推一人理之。或輪流主之。凡祀田不得私自變賣。無宗祠者祭於家。家祭之禮。載於歲時。泉人日中而祭。漳人潮人質明而祭。

演劇

演劇爲文學之一善者。可以感發人之善心。惡者可以懲創人之逸志。其效與詩相若。而臺

灣之劇尙未足語。此臺灣之劇。一曰亂彈。傳自江南。故曰正音。其所唱者大都二簧西皮。間有崑腔。今則日少。非獨演者無人。知音亦不易也。二曰四平。來自潮州。語多粵調。降於亂彈一等。三曰七子班。則古梨園之制。唱詞道白皆用泉音。而所演者則男女之悲歡離合也。又有傀儡班。掌中班。削木爲人。以手演之。事多稗史。與說書同。夫臺灣演劇。多以賽神坊里之間。釀資合奏。村橋野店。日夜喧闐。男女聚觀。履舄交錯。頗有驩虞之象。又有採茶戲者。出自臺北。一男一女。互相唱酬。淫靡之風。伴於鄭衛。有司禁之。

歌謠

臺灣之人。來自閩粵。風俗旣公。歌謠亦異。閩曰南詞。泉人尙之。粵曰粵謳。以其近山。亦曰山歌。南詞之曲。文情相生。和以絲竹。其聲悠揚。如泣如訴。聽之。使人意消。而粵謳則較悲越。坊市之中。競爲北管。與亂彈同。亦有集而演劇。登臺奏技者。勾欄所唱。始尙南詞。間有小調。建省以來。京曲傳入。臺北校書。多習徽調。南詞漸少。唯臺灣之人。頗喜音樂。而精琵琶者。前後輩出。若夫祀聖之樂。八音合奏。間以歌詩。則所謂雅頌之聲也。

臺灣通史卷二十四

臺南

連雅堂

撰

藝文志

臺灣。三。百。年。間。以。文。學。鳴。海。上。者。代。不。數。睹。鄭。氏。之。時。太。僕。寺。卿。沈。光。文。始。以。詩。鳴。一。時。避。亂。之。士。眷。懷。故。國。憑。弔。河。山。抒。寫。唱。酬。語。多。激。楚。君。子。傷。焉。連。橫。曰。吾。聞。延。平。郡。王。入。臺。之。後。頗。事。吟。詠。中。遭。兵。燹。稿。失。不。傳。其。傳。者。北。征。之。檄。報。父。之。書。激。昂。悲。壯。熱。血。滿。腔。讀。之。猶。爲。起。舞。此。則。宇。宙。之。文。也。經。立。清。人。來。講。書。移。往。來。曲。稱。其。體。信。乎。幕。府。之。多。士。也。在。昔。春。秋。之。際。鄭。爲。小。國。聘。問。贈。答。不。失。乎。禮。齊。楚。秦。晉。莫。敢。侵。凌。孔。子。曰。子。產。有。辭。諸。侯。賴。之。此。則。文。章。之。有。益。於。國。也。清。人。得。臺。耆。舊。多。物。故。光。文。亦。老。矣。猶。出。而。與。韓。又。琦。趙。行。可。鄭。廷。桂。等。結。詩。社。所。稱。福。臺。新。詠。者。也。其。時。臺。灣。初。啓。文。運。勃。興。而。清。廷。取。士。仍。用。八。比。士。習。講。章。家。傳。制。藝。葩。塞。聰。明。汨。沒。天。性。臺。灣。之。文。猶。寥。落。也。連。橫。曰。我。先。民。非。不。能。以。文。鳴。也。我。

先。民。之。拓。斯。土。也。手。耒。耜。腰。刀。銃。以。與。生。番。猛。獸。相。爭。逐。葦。路。藍。縷。以。啓。山。林。用。能。宏。大。其。族。艱。難。締。造。之。功。亦。良。苦。矣。我。先。民。非。不。能。以。文。鳴。且。不。忍。以。文。鳴。也。夫。開。創。則。尙。武。守。成。則。右。文。昔。周。之。興。陳。師。牧。野。一。戎。衣。而。天。下。定。及。成。康。繼。統。機。樸。作。人。制。禮。作。樂。爲。後。王。範。漢。高。以。馬。上。得。天。下。陸。生。曰。陛。下。以。馬。上。得。之。能。以。馬。上。治。之。乎。故。漢。之。文。章。亦。卓。越。千。古。臺。灣。當。鄭。氏。之。時。草。昧。初。啓。萬。衆。方。來。而。我。延。平。以。故。國。淪。亡。之。痛。一。成。一。旅。志。切。中。興。我。先。民。之。奔。走。疏。附。者。競。競。業。業。共。揮。天。戈。以。挽。虞。淵。之。落。日。我。先。民。固。不。忍。以。文。鳴。且。無。暇。以。文。鳴。也。夫。以。臺。灣。山。川。之。奇。秀。波。濤。之。壯。麗。飛。潛。動。植。之。變。化。可。以。拓。眼。界。擴。襟。懷。寫。游。踪。供。探。討。固。天。然。之。詩。境。也。以。故。宦。游。之。士。頗。多。撰。作。若。孫。元。衡。之。赤。嵌。集。陳。夢。林。之。游。臺。詩。張。湄。之。瀛。壖。百。詠。皆。可。誦。也。光。緒。十。五。六。年。灌。陽。唐。景。崧。來。巡。是。邦。道。署。舊。有。斐。亭。景。崧。葺。而。新。之。輒。邀。僚。屬。爲。文。酒。之。會。臺。人。士。之。能。詩。者。悉。禮。致。之。揚。風。扞。雅。作。者。雲。興。旣。而。景。崧。升。布。政。使。就。任。臺。北。臺。北。初。建。省。會。游。宦。寓。公。簪。纓。畢。至。景。崧。又。以。時。集。之。潤。色。昇。平。一。時。稱。盛。臺。灣。固。無。史。也。康。熙。三。十。三。年。巡。道。高。拱。乾。始。纂。府。誌。略。具。規。模。乾。隆。二。十。九。年。重。修。其。後。靡。有。續。者。各。縣。雖。有。方。志。而。久。已。遺。佚。或。語。多。粗。漏。不。足。以。備。一。方。文。獻。光。緒。十。八。

年。臺北知府陳文騷淡水知縣葉意深稟請纂修通志。巡撫邵友濂從之。設總局於臺北。以布政使唐景崧巡道顧肇熙爲監修。陳文騷爲提調。通飭各屬開局採訪。以紳士任之。二十一年略成。續進總局。猝遭割臺之役。戎馬倥偬。稿多散失。其存者亦唯斷簡而已。初海東書院藏書頗富。至是亦遭兵燹。而臺灣之文獻亡矣。今但列其書目與其作者。以供後人之考求焉。

表一

臺灣府志十卷康熙二十三年巡道高拱乾輯

重修臺灣府志二十卷乾隆六年巡道劉良璧輯

續修臺灣府志二十五卷乾隆十一年巡道六十七輯

新修臺灣府志二十六卷乾隆二十九年巡道覺羅四明輯

臺灣縣志十卷康熙六十年知縣王禮輯

重修臺灣縣志八卷乾隆十七年知縣魯鼎梅輯

新修臺灣縣志八卷嘉慶十二年知縣薛志亮輯

鳳山縣志十二卷康熙五十八年知縣李丕焜輯

重修鳳山縣志十二卷乾隆二十九年知縣王英曾輯

諸羅縣志十二卷雍正二年知縣周鍾瑄輯

彰化縣志十二卷道光十二年知縣李廷璧輯

噶瑪蘭志略十四卷道光十七年通判柯培元輯

噶瑪蘭廳志八卷道光十九年通判薩廉輯

淡水廳志八卷同治九年同知陳培桂輯

澎湖廳志十五卷光緒十九年同安林豪輯

右方志十五種凡二百卷

表二

臺灣志稿 卷臺灣王喜撰

淑齋詩文集四卷臺灣陳鵬南撰

剛齋集二卷臺灣張從政撰

通虛齋集二卷 臺灣王克捷撰

半石居詩草一卷 臺灣曾曰唯撰

草廬詩草二卷 東寧游草一卷 臺灣黃一撰

東寧自娛集一卷 臺灣陳斗南撰

半嵩集四卷 臺灣章甫撰

鶴山遺集六卷 臺灣陳思敬撰

達五齋家誠四卷 海內義門集四卷 小滄桑外史二卷 風鶴餘錄二卷 歸田問俗記四卷

嘉義陳震曜撰

陶村詩集二卷 彰化陳肇興撰

戴案紀略二卷 施案紀略一卷 讓臺記二卷 彰化吳德功撰

偷閒集一卷 淡水陳維英撰

石房樵唱一卷 淡水施銓撰

淡水廳志稿四卷 北郭園集十卷 淡水鄭用錫撰

靜遠堂詩文抄三卷淡水鄭用鑑撰

潛園琴餘草二卷潛園唱和集二卷淡水林占梅撰

一肚皮集十八卷三長贅筆十三卷經餘雜錄十二卷小草拾遺一卷淡水吳子光撰

周易義類存編三卷易義總論一卷古今占法一卷觀潮齋詩集一卷淡水黃敬撰

周易管窺四卷淡水楊克彰撰

讀史劄記二十四卷竹里館詩文集淡水彭培桂撰

鳧湖居筆記四卷傍榕小築詩文集四卷淡水彭廷選撰

新竹探訪冊十二卷十癖齋詩文集新竹陳朝龍撰

竹梅吟社擊鉢吟四卷新竹陳瑞陔輯

偏遠堂詩集二卷新竹鄭如蘭撰

越南紀略四卷炎荒紀程四卷香祖詩草一卷澎湖蔡廷蘭撰

鳳山探訪冊八卷鳳山盧德祥撰

雲林探訪冊十卷

臺東採訪冊五卷

右臺灣人士著書四十種凡二百零三卷

表三

臺灣輿圖考一卷 草木雜記一卷 流寓考一卷 臺灣賦一卷 文開文集一卷 文開詩集一卷

鄞縣沈光文撰

福臺新詠一卷 沈光文輯

島噫詩一卷 島居隨錄二卷 同安盧若騰撰

靖海記二卷 平南事實一卷 晉江施琅撰

臺灣郡志稿六卷 臺灣雜記一卷 山川考略一卷 海外集一卷 蓉洲文集一卷 無錫季麒光撰

郊外集一卷 鐵嶺沈朝聘撰

東寧唱和詩一卷 季麒光沈朝聘合撰

臺灣紀略一卷 長樂林謙光撰

海上紀略一卷 鄭氏紀事一卷 稗海紀游一卷 番境補遺一卷 仁和郁永和撰

平臺紀略一卷東征集六卷漳浦藍鼎元撰

游臺詩一卷漳浦陳夢林撰

赤嵌筆談四卷番俗六考一卷番俗雜記一卷大興黃叔瓚撰

巡臺錄一卷浮山張嗣昌撰

臺灣風土記一卷衡陽劉良璧撰

臺灣采風圖考一卷番社采風圖考一卷使署閒情一卷滿洲六十七撰

瀛壖百詠一卷錢唐張涓撰

婆娑洋集二卷仁和范咸撰

澄臺集一卷長州莊年撰

赤嵌集四卷桐城孫元衡撰

桴園詩一卷丹霞吳藻撰

碧浪園詩一卷輪山楊宗城撰

澎湖志略十一卷江夏胡格撰

澎湖志略續編二卷三水蔣黃梅撰

澎湖紀略一卷安岳周於仁撰

小球琉漫誌十卷邵武朱仕价撰內分六編曰泛海紀程曰海東紀勝曰瀛厓漁唱曰海東謄語曰海東月令曰下

淡水寄語

海東札記二卷武陵朱景英撰

東瀛祀典一卷貴陽蔣允焄撰

臺灣志略三卷濟寧尹士俚撰

噶瑪蘭說略一卷東游詩草一卷馬平楊廷理撰

蛤仔難紀略一卷閩縣謝金鑾撰

東槎紀略四卷桐城姚瑩撰

渡海前記一卷渡海後記一卷東溟文集二卷南通徐宗幹撰

治臺必告錄八卷大興丁日健輯

六亭文集四卷臺灣守城私記一卷德化鄭兼才撰

臺灣隨筆一卷徐懷祖撰

臺北紀事一卷丹陽胡應魁撰

東瀛載筆二卷馬克惇撰

臺灣小記一卷龔柴撰

臺灣番社考一卷鄭其照撰

搜篋拾遺一卷龍溪石福祚撰

臺灣地輿圖說二卷新建夏獻綸撰

東瀛識略八卷無錫丁紹儀撰

海音詩一卷侯官劉家謀撰

臺灣雜記一卷湘陰黃逢昶撰

訓番俚言一卷寶應王凱泰撰

化番俚言一卷揭陽吳光亮撰

日本窺臺始末一卷開山記四卷樂平袁聞柝撰

巡臺退思錄三卷岳陽劉琰撰

潛園寓草一卷閩縣林維垣撰

草草草堂詩草二卷海寧查元鼎撰

臺陽聞見錄六卷澄懷園唱和集二卷詩畸四卷善化唐贊袞輯

東海集一卷安溪林鶴年撰

臺海思慟錄一卷思慟子撰

右宦游人士著書八十種凡一百六十卷

小宮瀧人千善書八册上二頁六十一卷

臺灣思德錄二卷題詞十册

東瀛漫一書文苑林語序

臺灣開闢見說六卷新對國朝保集二卷新創國登記其書

草草草草草二卷新書其書

新編萬草一卷題詞林語序

遊記其書二卷新書其書

大正九年十二月二十五日印刷
大正九年十二月二十七日發行

臺灣通史中冊
洋裝三冊定價金拾貳圓

臺南市大宮町四丁目六拾五番地

著作兼發行者 連雅堂

臺北市撫臺街二丁目百四拾六番戶

印刷所 臺北印刷株式會社

臺北市大稻埕建昌後街二番戶

發行所 臺灣通史社

臺北市北門街二拾四番戶

賣捌所 株式會社宏文社



國立台灣師範大學圖書館

索書號 922.9
458
1.2 登錄號 04053

書名 台灣通史(中)

借閱人	借期	借閱人	借期
670725	10.27		
653314	12.11		

索書號 922.9
458
1.2

登錄號 04053

國立台灣師範大學圖書館

到期單

請照以下日期還書

63.11.14	68.12.26	
63.12.20		
64.1.23		
5.24		
64.5.24		
續借 64.6.7		
64.11.4		
65.1.5		
65.3.17		
66.5.10		
68.11.10		

臺灣師大圖書館

10004053